


बण्टा

डॉ. अमरेन्द्र



बण्टा

अंगिका बाल-उपन्यास

बण्टा

(अंगिका बाल-उपन्यास)

डॉ. अमरेन्द्र



© Dr. Amrendra

उपन्यास : बण्टा
लेखक : डॉ. अमरेन्द्र
संस्करण : ई. २००६
प्रकाशक : अंगिका संसद, भागलपुर (बिहार)
मुद्रक : एमएलपी, भागलपुर
मूल्य : ७५ रूपये

BANTA (NOVEL) By Dr. Amrendra

आपनों बचपन के

—अमरेन्द्र

सुनों नूनू-बाल-बुतरु सिनी

अप्रैल सें ही जे रं सूरज तपना शुरु होलौं, कि ठण्डा होय के नामे नै लेलकौं । दुर्भाग्य देखो कि अबकी सावनो-भादों सुक्खे रहलौं । पानी पड़बो करलौं तें बड़डी देर करी ।

मौन उक-बिख करहैं रहलौं भर कातिक तांय । आबें आधों अगहन बीती रहलौं छौं, आरो राती बिजली पंखा चलाय लें पड़ी रहलौं छौं, बिजली तें रहै नै छौं—पंखा हूकों, आरो की ।

आबें सुनों,

हेने हालों में तोरों लें चार-चार किताब पूरा करलियौं ।

गर्मी के प्रभाव खाली नदी, गाछ-बिरिछे पर नै पड़ै छै, आदमी पर तें आरो । सोचौ, केना कें तोरा सिनी लें चार-चार किताब तैयार करलें होभौं । अनुवादवाला किताब बाहर छपना छेलै, से जल्दी-जल्दी सब काम करी कें भेजलां तपलौं ताबा रं कोठरी में बैठील कें । दोबारा पढ़ै के मौको नै छेलै, न मने बनलै ।

बची गेलै बण्टा, सोचलें छेलियै, एकरा दिसम्बर में छपबैबै, फेनु मौन होलै, नया साल यानी २०१० जनवरी में छपबैबै । यही सोची जुलाय २००६ में पूरा होलौं ई उपन्यास कें दोबारा नै देखलियै ।

आरो देखों, आय १४ नवम्बर यानी बाल दिवसर पर हठाते मॉन होय गेलै कि जेना हुएँ, यही साल छपवाय देना छै । आय्ये तोरा लें ई दू शब्द लिखलियौं आरो कल्हे-परसू प्रेसों में दे देभौं, ताकि दिसम्बर के शुरुवे में यहू उपन्यास तोरों हाथों में हुएँ । नया साल में नया बात सोचलौं जैतै ।

मतरकि एक बात, ई उपन्यास के बण्टा जों तोरों सिनी के साथी बनें पारलौं, तें हमरा बड्डी खुशी होतौं । आरो सुनी ला, बण्टा बड़ों होय चुकलौं छै । बड़ों मतलब बूढ़ों नै । मतलब कि नै बच्चा, नै जुआन, बीचों-बीचों के । सोचलें छियै कि अगला उपन्यास में ओकरों बादवाला कारनामा बतैय्यौं । मतरकि पहिलें तोहें ई तें बतैय्यौ कि 'बण्टा' केन्हों बुझैलौं ।

सम्पर्क :

लाल खां दरगाह लेन,
सराय, भागलपुर, ८१२००२
मो. ९९३९४५१३२३

तोरों सिनी के

लाल काका

१४ नवम्बर २००६ (बाल दिवस)

डॉ. अमरेन्द्र रॉ अंगिका बाल साहित्य

०१. ढोल बजै छै ढम्मक ढम (कविता-संग्रह)
०२. बुतरु के तुतरु (कविता-संग्रह)
०३. बाजै बीन बजावै तीन (कविता-संग्रह)
०४. एक छड़ी पर अण्डा नाचै (कविता-संग्रह)
०५. तुक्तक-मुक्तक (कविता-संग्रह)
०६. पंचगव्य (एकांकी-संग्रह)
०७. दुपल्लो (एकांकी-संग्रह)
०८. फैसल रॉ जासूसी (उर्दू बाल उपन्यास के अनुवाद)
०९. शिकार आरो शिकारी (उर्दू शिकार कथा के अनुवाद)
१०. जंगल रॉ पहचान (उर्दू बाल उपन्यास के अनुवाद)
११. बण्टा (उपन्यास)
१२. घटोत्कच (बालखण्डकाव्य) प्रकाश्य

बण्टा

बण्टा घण्टा भरी सें देखी रहलौं छै—तीन-तीन भैंस ओकरो बारी में घुसी ऐलौं छै आरो बड़ी निचिन्ती सें खेतों के घास कचरें लागलौं छै । एक-दू दाफी वैनें हट-हट करी कें भगैय्यो के कोशिश करलें छेलै, एक-दू झिटकियो एक-एक करी कें सबके दिश फेकलकै, मतरकि भागै के बात तें दूर, भैंसें मुड़ियो उठाय कें बण्टा दिश नै देखलें छेलै । वहूं सोचलकै, आखिर की बिगाड़िये रहलौं छै भैंसें, आपनों एक दिश चरी रहलौं छै, बाबू जन्नें परोल के लौत रोपलें छै, हुन्नें तें भैंस सिनी नहिये नी जाय रहलौं छै । जों हमरों भगैला सें कहीं हुन्ने दिश भागी जाय, तें भारी मुश्किल । हमरा सें भैंस सिनी तें भागैवाला नै छै, लोतो रौंदतै, खैवो करतै आरो मुफ्त में मार खैबों हम्में । बाबू कहतै—तोंही भैंसों कें हिन्नें भगैनें होबैं । आरो यहू कहतै—तोहें जरूर खेलै लें भागी गेलों होवैं आरो हिन्नें भैंसें सब लौत मोचरी गेलै ।

बाबू के याद ऐतै बण्टा कें कुछ झुरमुरी रं बुझैलें आरो निसुआड़ी के एक ठार, पाँच-छों बार दाँया-बाँया करी कें, तोड़ी लेलकै आरो भैंस के नगीच आवी कें खाड़ों भै गेलै, कि जों केन्हों कें एक्को भैंसें हिन्नें मुँह उठैलकै कि ओकरो मुँहे पर मारतै । वैनें बाबू कें हेन्है कें मारी कें कै दाफी भैंसी कें भगैतें देखलें छै ।

साटों लै कें बण्टा के खाड़ों होना छेलै कि भैंसियो सिनी ओकरो दिश मुँह उठाय कें इस्थिर होय गेलै—नै गर्दन हिलाबै, नै पुछड़ी । वैनें भैंसिया सिनी के आँखी दिश देखलकै, “अरे बाप रे बाप, सब के आँख कारों पत्थर के गुल्ली रं एकदम इस्थिर—नै मटकी मारै छै, नै पिपनी हिलै छै ।” आरो सबके आँख बण्टाहै दिश गड़लौं ।

ओकरा डोर लागें लागलै । लागलै कि सब भैंसिया एक्के दाफी ओकरो दिश दौड़ी पड़तै आरो ओकरा खूँची-खाँची कें रक्खी देतै ।

एतना सोचना छेलै कि बण्टा भैंसिया सिनी कें देखले-देखले आठ-दस कदम पीछू कल्लें-कल्लें हटलै, फेनू हठाते पीछू मुड़ी कें सरपट भागलें आपनों दुआरी पर आवी कें खाड़ों होय गेलै आरो वहीं सें वैनें ऊ सब कें गुराय कें देखलकै ।

सब भैंस होन्हे कें घास कचरें लागलौ छेलै—बीचों-बीचों में नेंगड़ी हिलाय-हिलाय कें ।

ओकरा याद ऐलै—आठे, दस रोज पहिलकों तें बात छेकै, “अनारसी काका के भैंस हमरों खेतों में घुसी गेलों छेलै । बाप रे बाप, अनारसी काका के भैंस छेकै—जेना बिना सूड़वाला हाथी । देखथैं हम्मं पुआली तरों में सुटियाय गेलों छेलियै, आरो वहीं सें खोर हटाय-हटाय कें भैंसिया कें देखतें रहलौ छेलियै । बाप रे बाप, आपनों घोंघरी सिंहों में की रं लोंत लपेटी कें खीची लै छेलै आरो जीहा में फँसाय कें गटकी लै । सब लोंत सुरकला के बादे झुमलों-झुमलों खदैया दिश बढ़ी गेलै । ऊ तें भगवाने हमरा बुद्धि देलकै कि भैंसी के जैतै, हम्मं अनारसी का के घोर भागलियै । कानी-कानी काका सें सब बात कहलियै आरो बाबू के मारों सें हम्मं बची गेलियै । अनारसी कां बाबू के समझाय देलें छेलै, ‘देख पचरासी, बच्चा बुतरू कें है रं बैल-बोतू रं डंगेलों नै करैं—गोबध लागतौ । अरे बच्चा-बुतरू के मनो में तें गैये के नी मॉन बसै छै । गाय, माय, बच्चा, सब बरोबर । आबें तोहें है रं आपने बच्चा कें पीटै छैं, तें दूसरा के बच्चा कें तोहें की दुलरैबैं । टोला भरी के बच्चा डरों सें कुछ भले नै बोलौ, भीतरी मनो सें तें राकसे कहतें होतौ । राकस का, राकस बाबा, राकस नाना, आरो नै जानौं की-की । अरे पचरासी, बच्चा तें सिलोट नाँखी होय छै, जे देखै छै, वही लिखाय जाय छै आरो होने फेनू जिनगी भर घोकै छै । कल फेनू वहुं होने रं करतै, तें तोहें कहबैं—कुलों में कलंक जनमलौ छै । बच्चा कें दुलार करभैं, गलती कें समझाय कें बतैभैं, तें वहुं वहे रं करतै । आय जे बच्चा सिनी उद्दण्ड बनी गेलौ छै, वैमें हमरों सिनी के दोख बुझैं पचरासी, खाली बच्चे कें गरियैला सें कुछ नै होय वाला छै । हम्मं तें कहभौ—आपने बच्चा कें नै, टोला भरी के बच्चा के साथ खेलें, कल टोला भरी के बच्चा वास्तें तोहें आपनों पितियों, आपनों नाना, आपनों

बाबा रं बुझैबे । की समझलैं.....आबें भैंसे तोरों परोली के लोंत चाटिये गेलै, तें ये में बण्टू के की दोख । है दस बरिस के बुतरु भला भगाय लेतियै भैंसी कें की ? जानवर तें जानवर होय छै, हमरौ सिनी जानवरे रं करवै तें जानवर आरो मनुक्खों में की अन्तर । है ले, सौ टाका । तोरों नुकसान हम्में समझै छियौ । बण्टू कें मारियै नैं ।”

आरो पचरासीं ओकरा ठिक्के नै मारलें छेलै । बण्टा कें समझै में नै ऐलौं छेलै कि केन्हें नी ओकरो बाबूं ओकरा मारलकै । की अनारसी का के समझैला पर, आकि बाबू कें सौ टाका मिली गेलों छेलै, ये लेली । जे भी हुएँ, अनारसी का के भैंसीं परोली लोंत कें चाटी की गेलों छेलै, बण्टा कें तें आजादी मिली गेलों छेलै । लोतों के रहतें, ऊ दिन भरी नै तें ठीक सें खेलें पारै, नै आरामे करें पारें । दिन भरी बस एकरे चिन्ता लागलौं रहै कि कहीं कोय बकरिये नै टटिया के फाँक सें घुसी आवें ।

भैंस-गाय घुसै, तें टटिया के बड़ी जोर सें आवाज हुऐ, से ओकरा समझहौ में देर नै लागै कि कोय भैंस-गाय घुसै के कोशिश करी रहलौं छै । भनक मिलथैं ऊ साटों लै कें टटिया दिश बिरनी रं उड़ै, जेना अभी ओकरा काटिये लेतै, लेकिन ई बकरिया, पाठा, पाठी सें बण्टा बड़ी परेशान रहै, कखनी टटिया के फाँक सें घुसी जाय आरो ओकरा कुछ पतो नै लागै । ऊ तें जबें खैतें-खैतें कान पटपटावै, तबें ओकरा समझै में आबै कि बकरी-छकरी घुसी गेलों छै ।

एक दाफी यहें रं मोटों-नाटों पाठा टटिया कें केन्हों ठेली-ठाली भीतर घुसी गेलै आरो चर्च-चर्च करी घास कें निगलना शुरु करी देलकै । कुछ देर लेली तें बण्टां ओकरा देखतें रहलै आरो फेनू मुहों में हवा भरी कें साँस रोकी लेलकै । बण्टा के दोनों गाल बेलुन नाँखी फुली गेलों छेलै । ऊ एकदम हौले-हौले, जेना खोटा-पिपरी चलतें रहें, पाठा दिश बढ़लै आरो जेन्हें ओकरा लागलै कि आबें ऊ केन्हौ कें नै भागें पारें, झपटी कें पठवा कें धरिये तें लेलकै । पहिलें तें वैं ओकरो पछुलका टेंगड़ी धरलकै, फेनू ओकरो दोनों कान आरो फेनू ओकरो पीठों पर सवार होय गेलै ।

पीठी पर सवार होतैं, पठवा ओकरो भार सें मुक्त होय लेली हिन्नें-हुन्नें भागना शुरु करलकै । बण्टा कें तें जेना ओकरो मनो लायक घोड़ा मिली गेलों छेलै ।

पठवा जेना-जेना तेज भागै के कोशिश करै, तेना-तेना बण्टा के देहों में गुदगुदी बढ़ै, आरो वै बायां हाथों से ओकरो पुछड़ी पकड़ी के ऐठे कि आरो तेज भागै । तखनी ओकरो दायां हाथ कस्सी के पठवा के दायां कान धरलें रहै । पठवा के तेज होतैं बण्टा के दोनों हाथ पठवा के दोनों कानों पर आवी जाय ।

बण्टा तब तांय ओकरा खेतों में चारो दिश दौड़ैतें रहलै, जब तांय ऊ एकदम से अघाय नै गेलै, खुदूदे हाँफें नै लागलै । पठवा तें हाँफतें-हाँफतें के दाफी गिरियो गेलों छेलै । तखनी ऊ ओकरो पीठी से उतरी जाय आरो ओकरा काने धरलें उठाबै । पठवा के उठै भर के देर रहै कि ऊ लद सना ओकरो पीठी पर बैठी जाय ।

कंठों तक अघाय गेलै बण्टा, तें पठवा के टटिया लगीच लानी के ओकरा पीछू से एक लंग्घी मारलकै । पठवा एक बार तें गिरलै, मजकि उठथें हेनो लगै छड़क्का उड़लै, जेना मरखन्नों साँढ़ देखी बुतरु उड़ै छै ।

ऊ दिन बण्टा बहुत खुश छेलै आरो रही-रही के ओकरा बिट्टू के ख्याल आवी जाय ।

बिट्टू यानी दू साल के ओकरो भतीजा । मायं बाबू से कहलकै कि थोड़ों देर ले एकरा खेलाबौ, तें बाबू चित्त लेटी के गोड़ ठेहुना से मोड़ी लेलकै आरो पंजा के अड़कन दै गोड़ों पर बिट्टू के बिठाय के जोर-जोर से हिलाबे-डुलाबे लागलै । बोललों जाय-घुघुआ घू, मलेल फूल, लबबों घोर उट्टें, पुरानों घोर खसे ।

बिट्टू झुलवा पर गाना सुनी के चुप होय गेलों छेलै । ई देखी बाबू एक दाफी आपनों टांग तें एत्तें ऊच्चों उठैलकै कि बिट्टू ससरी के जेना पेटे पर आबी जैतियै । ऊ डरों से काँपें लागलै आरो वही डरों में ओकरो गू-मूत बाहर निकली गेलै । बिट्टू के गू-मूत बाबू के टाँगी पर पसरै भर के देर छेलै कि बाबू हेने ओकरा उठाय के एक दिस राखी देलकै, जेना कि बाबू के देहों पर भोहा पिल्लू चढ़ी गेलों रहें आरो देखतैं झट से ओकरा हटाय देलें रहें । बिट्टू जे रं कानना शुरु करलें छेलै कि सौंसे टोला औनाय गेलों छेलै ।

बण्टा बाबू वाला घुघुआ घू आरो पठवा वाला सवारी के मिलाय छै आरो एत्तें गदगद होय जाय छै कि आपनों जंग्घा पर खड़े-खड़ थपड़ी बजैतें उछलें लागै छै ।

कि तभिये ओकरो ध्यान भैंसी दिश गेलै । भैंस तें परछत्ती लुग चरतें-चरतें आवी गेलों छेलै ।

ऊ जोर सें चिकरलै । आवाज सुनलकै तें पचरासी दौड़ले-दौड़ले हाता में घुसी गेलै । परछत्ती लुग भैंस कें खाड़ों देखी बगले में धरलों साटों कें खींची लेलकै आरो एक साटों कस्सी कें भैंसी के धौनों पर दै देलकै । साटों खैतें भैंस एक दाफी सरंग दिश मूँ करी कें बाँऽऽऽऽ करलकै आरो सीधे घुमी कें बहियारी दिश भागलै ।

बहियारिये दिशों सें अक्सर भैंस घुसी आबै छेलै । हुन्नें एकदम उदामों छेलै आरो ओतें बड़ों घेरा कें अड्डा या टटिया सें घेरबों मुशिकल छेलै ।

भैंसिया के भागथें पचरासीं बण्टा कें गोदी में उठाय लेलकै आरो ओकरो पीठ सहलाबें लागलै । बाबू सें डॉट सुनै के जग्घा में ई रं दुलार पावी कें ऊ तें जेना सब बाते भूली गेलै । नै पठवा वाला बात याद रहलै, नै भैंसी केरो बात ।

दुलारला के बाद पचरासीं बण्टा कें नीचें उतारलकै आरो कहलकै, “बण्टू, परसू सें तोहें इस्कूल जैबे । आय माट साहब सें हम्में बात करी लेलें छियै । पूवारी टोला सें कै छौड़ा तें जाय छै । लछमनिया, घोंघी, झबरा, मठिया आरनी; ओकरे साथ तहूँ चल्लों जय्यें । है देख; तोरों वास्तें खल्ली आरो सिलोटो लानी देलें छियौ ।”

ई कही पचरासी आपनों दाँया हाथ कुर्ता के दाँया जेबी में डाललकै आरो डेपो नाँखी खल्ली ओकरो हाथों में देतें कहलकै, “है ले खल्ली आरो ई सिलोट ।”

वैने बायां कंधा सें गमछी उतारलें छेलै, जेकरो एक छोरी में की बांधलें छेलै, ई तें बण्टा कें पता नै चललै, मतरकि दुसरो छोरी में बांधलें सिलोट ओकरा तुरत्ते दिखाय गेलै । जब तांय पचरासी ओकरा खोलतियै बण्टा थपड़ी बजैतै आपनों जग्घा पर उछलतें रहलै—एक, दू, तीन, पाँच, आठ, दस । रुकलै तभिये, जबे पचरासीं ओकरो हाथों में सिलोट राखी देलकै । सिलोट लै भर के देर छेलै कि ऊ फुर्र सना माय लुग दौड़ी पड़लै ।

माय सूपों में कुछ फटकी रहलें छेलै कि तखनिये वै सिलोट-खल्ली माय के आगू में राखी कें वांही पर लट्टू नाँखी घूरें लागलै ।

रात कें सुतबों करलै तें माय सें सट्टी कें नै, सिलोट सें सट्टी कें । छाती पर सिलोट राखले ओकरा नीन आवी गेलों छेलै, जेकरा बड़ी आहिस्ता सें ओकरो माय हटाय कें राखी देलें छेलै कि कहीं नीनों में चॉक नै पड़ी जाय ।

“है तें कहों कि बण्टु के सिलोट खल्ली तें कीनी देलौ, मजकि पिहनी कें की जैतै, यहा डाँड़ी सें सटलों पैंट आरो मजूरो नाँखी कपड़ा के गंजी पिहनी कें ।” बण्टामाय पचरासी सें कद्दू छिलतें-छिलतें भोरे वक्ती कहलकै ।

“अरे मजूरो के बेटा मजूरो नाँखी कपड़ा नै पहनतै, तें की पहनतै ।” ई बात कहलें तें छेलै हाँसिये हाँसी, मतरकि पचरासी के कंठ भरिय गेलों छेलै, जेकरा बण्टा माय तुरत्ते भाँपी लेलें छेलै ।

“तोहें चिन्ता कथी लें करै छों । हम्मं आय्ये घंटाघर जाय कें बण्टू वास्तें कमीज-पैंट कीनी ऐबै । सेथरों तें दुकान धारा-पांती सें रहै छै । सस्तों-महगों, सब किसिम के तें कुर्ता, पैंट बिकै छै । सौ टाका में कमीज-पैंट दोनों होय जैतै । सोचलें छेलियै कि जबें बण्टू के इस्कूली में नाम लिखैबै, तें लब्बों-लब्बों कमीज, पैंट कीनी देवै । यही लें तें, हम्मं सौ टाका नीछी कें राखी देलें छेलियै ।” बण्टामाय हुलासों सें कहलकै ।

ई सुनथें पचरासी के मुँहों पर रौनक उतरी ऐलै । तहियो आपने बात कें धरतें फेनू कहलकै, “ठीक छै, आरू जों नहियो रहतियै टाका, तभियो बण्टू इस्कूल तें जैबे करतियै । अरे भीखनपुर के कालिये थान वाला इस्कूल नी जैतै, कोनो मौन्टेसी इस्कूल तें नहिये नी, कि बुतरु कें हौ दौ, है दौ, ई कीनौ, हौ कीनों । सेर भरी के बच्चा छों, तें पसेरी भर के किताबों सें बोझैलों बैग । बण्टू कें जानौ छै, तें कत्तें दूर । एक दरबनिया लगैते कि इस्कूलिये दुआरी पर रुकतै । आरो बोझों की ? बैठै लें एक एकठो चट्टी आरो लिखै लें एक टा सिलोट यही तें साथों में रहतै ।”

आरो वहेँ दिन बण्टा वास्तें लब्बों-लब्बों कपड़ा आवी गेलों छेलै । बहुत कुछ सोचियै कें ओकरी मायं कपड़ा आनलें छेलै—कुछ बड़े-बड़े ।

बण्टा झब-झब ओकरा चढ़ाय लेलें छेलै । पैंट छेलै, तें ठेहुना सें दू अंगुल नीचें आरो कमीज छेलै, तें जाँघ भर ।

पचरासीं देखलकै तें कहलकै, “है ठिक्के करलौ बण्टूमाय । आबें

कत्तो जल्दी बण्टू बढ़तै, तें दू साल तें पैंट-कमीज खाँटों नै पड़ै वाला छै ।”

“यहँ सोची कें तें दू अंगुल बड़ों कमीज किनलें छियै ।”

“ठीक करलौ, होना कें हम्में यहू सोचलें छेलियै, दुखहरन वाला जे पैंट-कमीज छै, ओकरै छटवाय कें छोटों करवाय देबै । कपड़ा में होले छै की । एतें मजगूत छै कि पाँच, छों महीना चलिये जैतियै । खैर, ओकरो ज़रूरते नै पड़लै ।”

“हेनों करियै कें तोहें कौन बुद्धिमानी के काम करतियो । दरजी काटी-छाँटी कें नाँपों के बनैतियों, तें जानै छौ, कत्तें लेतियों ? ओत्तें में तें ई नया कपड़ा आवी गेलै ।”

हुन्नें पचरासी आरो बण्टामाय में बातचीत चली रहलौ छेलै, आरो हिन्नें बण्टा लब्बों-लब्बों कमीज-पैंट, चप्पल पिहनी कें मारे खुशी सें गद्गद होय रहलौ छेलै ।

खाली पैटे-कमीज नै, बण्टामायं हवाई चप्पलो जे लेलें छेलै, ऊ बण्टा के गोड़ों सें आधों इंची बड़े । बण्टा तें तखनिये सें गनगनाय रहलौ छेलै, जखनी ओकरो गोड़ों के छाप ओकरी माय नें एक कागजों पर लेनें छेलै ।

आबें जबें हवाई चप्पल ओकरो गोड़ों में छेलै, तें ओकरो मॉन करी होलै कि पंजा बल्लों खूब हुमचौ । रहलौ नै गेलै तें पंजा बल्लें वै ऐड़िया कें खूब उठैलकै, फेनू बॉल लगाय कें एड़िया चप्पल में धंसाय देलके । फॉल ई होलै कि बायां चप्पल के एक दिशों के लब्बड़ वाला फीता बाहर निकली गेलै ।

कहीं टूटी तें नै गेलै, ई खयालों सें तें बण्टा एकदम कनमुहों होय गेलै मजकि जल्दिये ओकरी माय हाथों में चप्पल लेलकै आरो फीता के छोरी पर बनलौ छोटों रं के चकरी कें चप्पल के छेदों में ठेली-ठाली कें, पीछू बनलौ छोटों रं गोल खद्दो में अँटाय देलकै । फेनू समझैतें कहलें छेलै.... “है रं उछलवे-कुदवे आरो कहूँ बीचे सें फीता टूटी गेलौ, तें नढ़िये गोड़ जैयें इस्कूल ।”

माय के बात बण्टा बड़ी ध्यानों सें सुनलें छेलै, यही लें मॉन करथों ऊ पंजा आकि चप्पल पर एड़िया भरी हुमचै के मॉन मारले रही गेलै ।

मजकि जबें आपनों बाबू के साथ चललै तें वै आपना कें रोकें नै

पारै । ऊ दौड़ी के पच्चीस हाथ आगू बढ़ी जाय आरो फेनू दौड़ले बाबू लुग आबी जाय । पाँच कदम बाबू साथें चलै, तें फेनू पच्चीस हाथ दौड़ी के आगू बढ़ी जाय आरो वहे रं दौड़ी के बाबू लुग आबी जाय । हेनै करी के ऊ इस्कूल पहुँची गेलों छेलै ।

बण्टा के वहीं इस्कूल में बिठाय के पचरासी लौटी ऐलों छेलै—एकदम निचिन्त होय के ।

बण्टा के इस्कूल जैवों बड़ी अच्छा लागै । वहाँ कोय पढ़ाय-लिखाय तें हुऐ नै । जैते के साथ पाँच मिनट के प्रार्थना हुऐ आरू फेनू वहू गलगुदुर । हुन्ने पाँचो मास्टर गप करी रहलें छै आरो हिन्ने सब बुतरु-बतराओ सिनी ।

मास्टर सिनी के रस तखनिये भंग हुऐ, जखनी कोय लड़का चिचियाय उठै, “मास्टर जी, दिनेशिया हमरा छुछुन्दरी कहै छै”, “मास्टर जी उरवशिया हमरा लेधू पंडित कहै छै ।”

तखनी मास्टर जी है देखै छै कि कौने चटियां शिकायत करलकै आरो केकरो बारे में शिकायत करलकै । बस दीवारी के एक मोखा में राखलें साटों उठाय छै आरो जे सामना में पड़ी गेलों, सिटपिठाय के राखी देलकों । नै होलों तें बाद में दू-चार ऊपरों से धौलो दै देलकै । जखनी इस्कूल में है रं कांड चलै छै, तखनी से एक घण्टा लेली इस्कूली में एकदम शांति बनलें रहै छै । एकदम सकड़दम । सब चटियां खोड़ा या ककहरा सिहारें लागै छै—कोय तें आवाज करी के, कोय मने-मन ।

बण्टा है समय में मुड़ी झुकैलें कोन्हराय के खाली सबके ताकते रहलें । खास करी के मास्टर सिनी के । आरो जबे ऊ निचिन्त होय छै कि कांही कुछ खतरा नै छै, तें वें आपनों मूड़ी उठाय के कुछ हेन्हे मुँह पटपटावें लागै छै, जेना वें मनेमन कोय पाठ के सिहारतें रहें । पाठ सिहारै के तें कोय बाते नै छेलै, केन्हे कि पाठ याद करबों बण्टा लें पहाड़ उठैबों नाँखी लागै । के दाफी वें घरों में कोशिशो करलें छेलै कि जे मास्टर साहब याद करै लें देलें छै, ओकरा याद करी लें । मतरकि ई बात ओकरा लें एकदम कठिन बुझैलै ।

सिलोटी के एक दिशों के कुछ याद करै, तें दुसरो दिश के लिखलें भूली जाय आरो दुसरो दिश के लिखलें याद करै, तें पहिलों दिश के भूली जाय ।

तखनी ओकरो सब गोस्सा सिलोटिये पर उतरै । वैं दोनों हाथों सें पकड़ी कें सिलोट कें हेनै उठाबै, जेना कोय भारी चीजों कें झटकै सें उठैलें रहें आरो वहे तेजी सें पटकरी दै लें नीचें तक लानै, जेना फोड़िये देतै मतरकि पटकै नै । नया सिलोट फूटी जाय के चिन्ता सिलोट उठैथें मनो में दुकी जाय ।

हौ वक्ती आपनों गोस्सा शांत करै लेली वैं एक्के काम करै कि पेटों पर सें गंजी कें ऊपर ससरै आरो सिलोटी पर लिखलें सब अक्षर कें पहिलें पेटों पर छापै । पेटों पर छपलौ अक्षर कें कुछ देर ऊ देखथें रहै, छपलौ उलटा अक्षर कें पढ़े में ओकरा बड़ा आनन्द आबै आरो पढ़ी लेला के बाद सिलोटिये कें पेटों पर दू-तीन बार रगड़ी-रगड़ी कें अक्षर मेटाय दै । जेना वैं आपनों गोस्सा के कारणे कें रगड़ी मेटाय देलें रहै ।

बण्टा के आय पच्चीसमों दिन बीती रहलें छै, इस्कूली में ऐबों । एक-एक लड़का सें ओकरो घन्नों परिचय होय गेलों छेलै आरो इस्कूली सें गायब रहै के एक-एक गुर सें ऊ परिचित होय चुकलें छेलै ।

इस्कूल सें गायब रहै के एकेक तरीका ओकरो नसे-नस में उतरी गेलों छेलै । हुन्नें गुरु जी कें कही दै कि माय के तबीअत खराब छै आरो घरों में आबी कें कही दै कि ओकरो ओटी विहाने से दरद करी रहलें छै, नै रहलें गेलै तें इस्कूलों सें चल्लों ऐलियै ।

आरो ऊ दिन छुट्टिये-छुट्टी रहै छेलै बण्टा लेली ।

पचरासी कभी-कभार सोचबो करै कि आखिर आयकल बण्टू के ओटी में दरद कैन्हें रही-रही कें उठी जाय छै । वैंनें ई बातों पर बण्टू के माय सें एक-दू दाफी बातो करलें छेलै । मतरकि बण्टामायं ई कही कें भरम मेटी देलकै कि घरों में रहै छेलै तें कुछ न कुछ मुँहों में देतै रहें, आबें तीन-चार

घण्टा निराहारै रहै लें लागै छै, तें कुछ बुझैतें होतै । अभ्यास होय जैतै, तें सब ठीक होय जैतै ।

मजकि हौ दिन आबै के नौबते नै ऐलै । बण्टा के घरौवा नाम एक छौंड़ा, दू-चार आरो छौड़ा कें बताय देलकै, “अरे एकरों नाम ध्रुव कुमार थोड़े छेकै, है तें ओकरों बाबू के गढ़लों नाम छेकै, जे ई इस्कूली में लिखाय देलें छै । एकरों असली नाम तें छेकै बण्टा ।”

बस की छेलै, तखनिये सें बण्टा ध्रुव कुमार के जग्घा में बण्टा बनी गेलै । ई बात जबें गुरु सिनी के कानों में गेलै, तें गुरुवो सिनी के जीहा पर ध्रुव कुमार के घरौवे नाम चढ़ी गेलै ।

आबें भले गुरुजी आरनी कें ई बात कचोटै वाला नै लागें, मजकि बण्टा तें भीतरे-भीतर कुढ़ी कें रही जाय, जखनी कोय गुरु जी पचास चटिया के बीचों में ओकरा बण्टा कही दै । “एकरा सें की होय छै कि ओकरों असली नाम बण्टा छेकै, ध्रुवकुमार नये नाम छेकै तें की । आबें असली नाम हमरों यहें भेलै ।” वें मनेमन सोचै ।

एकरों सें ज्यादा बण्टा कें दुखमोचना सें चिढ़ हुऐ, जे दू-चार छौड़ा कें एकठो फेंकड़ा सिखाय देलें छेलै, आरो ऊ छौड़ा वकत-कुवकत वहें फेंकड़ा दुहरावें लागै—

जेकरों नाम छै बण्टा
वें की पढ़थै, घण्टा ।

दुखमोचना इस्कूल भरी में सबसे ज्यादा पढ़ै-लिखै में तेज छेलै, यै लेली ओकरों सब पर धौंस भी चली जाय । बदमासियो करै तें कोय गुरु जी ओकरा मारै नै ।

वही एक हेनों लड़का छेलै, जे अकल्ले रिक्शा पर चढ़ी कें आबै । बाप कचहरी में नामी बड़ा बाबू छेलै । दुखमोचन के बाबू हफ्ता में एक दिन जरुरे इस्कूल आवी जाय । आबै, तें लागै जेना—इस्कूल इस्पेक्टर आवी गेलों रहै । देखथैं, सब गुरु जी पैरड लेली खाड़ों, जेना सिपाही रहें ।

जाय के पहलें सब गुरु जी कें जरुरे हुनी चाय-पान कराबै । यहा सें दुखमोचन के एक दुसरे रं के नवाबी छेलै, इस्कूली में ।

लेकिन बण्टा कें एकरा सें की । ऊ दिन दुखमोचना के पकिया साथी गरीबा इस्कूल सें लौटी रहलें छेलै ।

बैशाखों के शुरुआती दिन, मतरकि रौद तें जेना देह जराय दे वाला ।

कण्ठ सूखें लागलै, तें गरीबा इस्कूली सें आगू पचास हाथ दूरी पर गड़लों चापाकल के नगीच खाड़ों होय गेलै आरो कॉपी-किताब पेटों में खोसी कें चापाकल के हैंडिल ऊपर उठाय कें फेनू नीचें तांय दबाय देलकै । पानी निकललै, तें आगू बढ़लै—चुरु लगाय लें, मतरकि तखनी तांय तें पानी सोंऽऽ के आवाज करतें चापाकल के भीतर घुसी गेलै । वैं फेनू सें वहें रं आपनों देह के सौंसे भार देतें हैंडिल उठैतें ओकरा नीचें करी देलकै । अबकी पहिलका सें ज्यादाहै पानी निकललै, लेकिन जब तांय कि चापाकल के मुँहों सें आपनों चुरु सटैतियै, अबकियो दाफी पानी वहें रं सोंऽऽ करतें चापाकल के नीचें उतरी गेलै ।

बण्टा दूरे सें खड़ा होय कें तमाशा देखी रहलौ छेलै । ओकरा भीतरे-भीतर गुदगुदी होय रहलौ छेलै कि बच्चू फेरों में पड़लौ छै । वैं बोलैबों करतियै केकरा, ओकरों सिवा तें आरो वहाँ पर कोय छेवो नै करलै ।

दुखमोचनें आँख उठाय कें इस्कूली दिश देखलकै, शायत कोय लड़का इस्कूली सें अभी निकलतें रहें । मतरकि वहाँ कोय नै छेलै । एकदम सून-सपाट होय गेलौ छेलै ।

दुसरों दिश नजर घुमैलकै तें ओकरों नजर बण्टा पर पड़लै । सोचों में पड़ी गेलै—पुकारौं कि नै पुकारौं । कि हुन्नें सें बण्टा पहिलें बोली पड़लै “की बराय दियौ की ?” आरो दौड़ले-दौड़ले चापाकल लुग आबी गेलै ।

दुखमोचना कें प्यासे एत्तें लागलौ छेलै कि ऊ कुच्छू बोलै के स्थितिये में नै रहै । हुन्नें जेन्हें बण्टां सिलोट जमीन पर राखी कें हैंडिल दोनों हाथों सें धरलकै कि हुन्नें दुखमोचनो चापाकल के मुँहों सें आपनों दोनों हाथ कें दोना रं बनैतें सटाय देलकै ।

ओकरों हाथ तें जरूरे चापाकल के मुँहों सें सटलौ छेलै, मजकि नजर बण्टाहै दिश तनलौं ऊपर उठलौं, कि जल्दी सें वैं हैंडिल कैन्हें नी दबाय रहलौ छै । हुन्नें बण्टा के मनौं में तें एक दूसरे बात घुमड़ी रहलौ छेलै । वैंनें हैंडिल कें हौले-हौले एक-दू दाफी ऊपर-नीचें करलकै आरो फेनू एक बारगिये हेनौं जोरों सें दबाय देलकै कि पानी हों-हों करी कें बाहर निकली ऐलै ।

हौ पानी दुखमोचना के दोना नाँखी बनलौं हाथों सें बाहर छिलकी

कें ओकरा सौंसे मुँहों कें भिगैतें, कालर, जेब, पैंट, सबकें भिंगाय देलकै । अकबकाय कें सोझों होलै, तें मुँहों-गर्दन के पानी टघरी कें पैण्टों में खोसलों कौपी-किताब सबकें सरगद करी देलकै ।

दुखमोचना के देखै लायक स्थिति देखी कें बण्टा भीतरे-भीतर गनगनाय उठलै, मतरकि चेहरा पर हेने कुछ बनावटी भाव लानलें होलें छेलै, जेना—यैमें ओकरो कोय दोष नै रहें आरो ई बात के ओकरो दुखखो बहुत रहें ।

हुनं दुखमोचना के मूं गोस्सा सें तमतम करी रहलें छेलै । प्यास-त्यास तें कखनिये खतम होय चुकलें छेलै ।

ओकरो ई हालत देखी कें बण्टा कें थोड़ों टा कचोट होलै, तें कहलकै, “हम्मं नै जानलियै कि हैंडिल दबैला सें पानी हेना कें होहाय जैतै, अच्छा अबकी होले-होले चलैवौ । एतें तें धूप छै । पाँचे मिनटों में कमीज-पैंट सुखी जैतौ । बस्ता पेटों सें निकाली कें धूपों में राखी दें ।”

मतरकि दुखमोचना बण्टा के एक्को बातों के कोय जवाब नै देलकै आरो पेटों के आगू, पैंटों में खोसलों बस्ता निकाली कें सीधे घोर दिश बढी गेलै ।

आबें बण्टा कें आवै वाला खतरा के आभास हुएँ लागलै । “जरूर वें ई बातों के बदला लेतै । हेन्हों गुम्मी साधी कें कैन्हें गेलै । मतरकि वें करै की पारें । है तें हुएँ नै पारें कि ऊ हमरा सें भिड़तै । एक्के पटकनिया में तें सब गुरी भुतलाय जैतै....तबें ई हुएँ पारें कि वें पीछू सें लंग्धी मारी दें आरो हेन्हों जग्घों मारें, जहाँ कि कादो-कीचड़ रहें ।” ई बात सोचिये कें बण्टा एक मिनटों लें एकदम सावधान होय गेलै ।

मजकि वहाँ आबें कोय नै छेलै । दुखमोचना आँखी सें ओझल होय गेलें छेलै ।

बण्टा नीचें राखलों सिलोट-पेन्सिल उठैलकै आरो आपनों घोर लगे छड़पनिया दे देलकै ।

घोर तें आबी गेलै, मजकि दोसरो दिन इस्कूल जाय कें ओकरो हियाव नै हुएँ । बण्टा मने-मन सोचै, “दुखमोचन जरूर बदला लै के कोय तरीका ढूँढतें होतै, आरो केना कें लेतै, ई कहना मुश्किल ।” सोचतें सोचतें बण्टा हेनों कुछ सोची लै कि सोचियै कें ऊ डरी उठै, वें मने-मन सोचलकै,

“हुएँ सकै छै, वें गुलेली सें गोली चलाय दै आरो गुलेली के गोली ओकरो कोकड़ी, पीठी आकि गोड़े सें लगी गेलै, तबें तें बाप रे बाप, दस दिन खटिया सें सटलौ रहौ । एक दाफी गुलेली सें कस्सी के गोली वें एक ठो पठिया पर चलाय देलें छेलै । आधौ घंटा तक ऊ पठिया वहीं पर छटपटैतें रही गेलै । ऊ तें केकरो पता नै चललै, नै तें वहें दिन हमरा निनौन होय जैतियै ।”

गुलेल के बात सोचतें ओकरा लागलै कि एक हनहनैतें ऐतें गोली ओकरो पनखोखा सें लागलौ छै आरो ऊ छटपटावें लागलौ छै । बण्टा एकदम सें सिहरी गेलै । सोचलकै, “नै, ऊ इस्कूल नै जैतै । कम-से-कम दू-तीन दिन तक नहिये जैतै । तब तांय दुखमोचना के गोस्सा जरूरे उतरी जैतै । फेनू, की हममें मारलें छियै, की पीटलें छियै ? जों पानी होहाय के निकली गेलै तें, हमरो की दोष ।” वेंनें आपना के निर्दोष दिखैतें मन के ढाढस बंधैलकै कि काहीं कुछ नै होतै ।

आरो यहें सोची के कि कांही कुछ नै होतै, वेंनें काँखी में सिलोट-किताब दबैलकै आरो दोसरो दिन इस्कूली दिश चली देलकै । दूरे सें जखनी ओकरो नजर चापाकल पर पड़लै, ओकरो आँखी में कलको वाला घटना घूमी गेलै । होहैतें पानी आरो दुखमोचन केरो सरगद होलौ कमीज, पैंट, बस्ता । बण्टा के ठोरो पर हस्सी फैली गेलै ।

ऊ मने-मन गुदगुदैतें इस्कूली के पिण्डा तांय पहुँचलै । ओकरा घोर आचरज होलै कि एक भी बच्चा हल्ला-गुल्ला नै करी रहलौ छेलै आरो दुखमोचन, सब लड़का सें अलग, ऊ मरखन्नौ मास्टर जमुआर लुग बैठलौ होलौ छेलै, जेकरो मार सें यमराजो थरथर काँपै छेलै ।

अभी बण्टा पिण्डा के ऊपर चढ़लौ नै होतै कि जमुआर गुरु जी झपटी के ओकरा धरलकै आरो बिना कुछ पूछलें छड़ी सें सिटपिटाय देलकै वें तब तांय सिटपिटैतें रहलै, जब तांय कि जमुआर गुरु जी थक्की नै गेलै ।

बण्टा कटलौ कबूतर नाँखी छटपटैतें रहलै, मतरकि कोय मास्टर बचाय लें नै ऐलै । लड़का सिनी के तें खैर डरो सें जाने निकली रहलौ छेलै; ऊ की बचाय लें ऐतियै !

जबें जमुआर मास्टर मारतें-मारतें हफसें लागलै, तें मारबौ छोड़ी देलकै आरो एक दिश राखलौ कुर्सी पर बैठी रहलै । बण्टा कमीजों सें, बाँही सें, आरो अंगुरी सें लोर पोछतें होनै के खाड़े रहलै । एक घण्टा नै, दू घण्टा

नै, तीन घण्टा नै, चार-चार घण्टा, जब तांय कि आखिरलका घण्टी जोरों सें टनटनाय नै उठलै ।

घण्टी के टनटनैतें सब चेला-चटिया सिलोट, बस्ता, बोरिया लेलें फुर्र पार होय गेलै । मतरकि बण्टा होनै कें खाड़ों रहलै । ओकरा साहस नै होलै कि आपनों सिलोट-कॉपी उठावें ।

मतर है सब कत्तें देर होतियै । आखिर गुरुओ आरनी कें तें जाय के हड़बड़ी छेवे करलै, से जमुआर मास्टर नें कर्रों बोली में कहलकै, “देख बण्टा ई सब कुर्सी घोष बाबू के दुआरी पर पहुँचाय के काम तोरों आरो भोरोहो आवी कें तोरहै सबटा कुर्सी यहाँ लानी कें राखना छै । बस ई समझें कि आय सें ई काम तोरों होलौ । समझी गेलें । जो, एक-एक कुर्सी कें घोष बाबू के ऐंगना में रखी आव, तबें घोर जय्यै ।” ई कही कें जेन्हें जमुआर गुरु जाय लें उठलै कि आरो सिनी गुरुओ उठी कें आपनों-आपनों रस्ता पर बढ़ी गेलै ।

बण्टा पीछू सें सबकें जैतें देखतें रहलै । वैनें दायं हाथ घुमाय कें पीठी पर राखलकै, तें एकबारगिये तिलमिलाय गेलै । हाथ वहीं पर पहुँची गेलै, जैठां छड़ी सें चमड़ी उखड़ी गेलों छेलै । ऊ तुरते बत्ती नाँखी तनी गेलै आरो दर्द खतम होय के इन्तजारी में आँख मुनी लेलकै ।

अंगुरी छुवाय गेला के कारणें जे घाव लहरी उठलों छेलै, ऊ जेन्है कें कम होलै, बण्टा सब कुछ भुलाय कें कुर्सी दिश बढ़लै आरो एकेक कें घोष बाबू के दुआरी पर राखी ऐलै । अनदिना के बात रहतियै तें कोय बात नै छेलै, मजकि इखनी तें ओकरों पीठी में जरियो टा झुकला सें दरद हुँ लागै । तहियो वै पाँचो कुर्सी उठाय कें ठीक जग्घा पर राखी ऐलों छेलै आरो फेनू बस्ता उठैनें आपनों घोर दिश बढ़ी गेलै ।

रस्ता में वै कें दाफी आँखी के लोर दायं-बायं बाँही सें पोछलें होतै, कहना मुश्किल । मतरकि घोर पहुँचतै, ऊ एकदम गुम होय गेलों छेलै । वैनें नुकाय कें कमीज खोललें छेलै आरो जल्दी सें गंजी पिहनी लेलकै कि कहीं माय ओकरों घाव नै देखी लें । नै तें पिटाय के कारण पूछतै । फेनू एक-एक बात खुलतै आरो बाबू कें जबें मालूम होतै कि दुखमोचन साथें वै की करलें छै, तबें पीठ सहलाय के बदला उल्टे बाबू ओकरा डंगैतै ।

से बण्टा सबटा दरद घोंटी कें पीवी गेलै । साँझ कें ऊ खेलै लें नै

निकललै । डिजना, सिंघवा, भूधरा, दुआरी पर बुलाय लें ऐवो करलै, तें वैं यही कही कें सब दोस्तों कें लौटाय देलकै कि गुरु जी ढेरे टास्क दै देलें छै, सब कें पूरा करना छै, यै लेली आय खेलै लें नै जैतै ।

साथी सिनी कें आचरजे लागलें छेलै, बण्टा के बात सुनी कें । मतरकि कुछ बोललै नै आरो दुआरी पर सें सब लौटी ऐलै । जखनी डिजना, भुदरा आरनी ओकरो लुग गेलें छेलै, तखनी सचमुचे में वैं कुछ सिलोटी पर लिखी रहलें छेलै ।

लिखतियै की, बस हिन्नै-हुन्नै टेढ़ों-मेढ़ों रेखा बनाय रहलें छेलै आरो बनैतै-बनैतें एक ठो हेनो नक्शा बनी उठलें छेलै कि ऊ जेना कोय भूत रहें ।

बण्टा हठाते बड़ी सावधान होय उठलै । वैंने बड़ी ध्यान सें ऊ बनी गेलें नक्शा कें देखलकै आरो कुछ देर तांय देखतें रहलै । फेनू वैं सिलोट कें कभी दायां दिश, कभी बायां दिश घुमाय कें ऊ नक्शा में बड़ों-बड़ों कान, बड़ों-बड़ों आँख बनैलकै । आँख के पिपनी सुइयाँ नाखी खाड़ों-खाड़ों । ऊपरलका ठोरी के ऊपर दोनों दिश दू बोढ़नी रं मूँछ आरो ठोरों सें बाहर निकललें भाला नाँखी वैं दाँत बनैलकै ।

सबसे बाद में ओकरो माथा पर बाल बनैलकै, ठीक होने, जेना कटैया के ढेरे गाछ उगी ऐलें रहें । बाल के दोनों दिश साँड़ों वाला भालाहै नाँखी निकललें सींग ।

नक्शा बनैलें होलै तें बण्टां ओकरा बड़ी गौर सें देखलकै । देखलकै तें खुश होय उठलै । एकदम खुश । तबें वैं मोटों मोटों अक्षर में नक्शा के नीचू एक-एक अक्षर याद करी एकटा नाम लिखलकै—जमराज जमुआर गुरु जी ।

बनैला-लिखला के बाद जबें वैं गौर सें फेनू नक्शा देखलकै, तें एकदम सें गदगदाय गेलै । जेना ओकरो सबटा दरदे फुर पार होय गेलें रहें ।

कुछ देर तांय तें फोटू कें देखलै रहलै, फेनू सिलोट कें जमीन पर राखी कें दोनों मुट्ठी कस्सी लेलकै । दांत-मूँ किच्ची कें दोनों मुट्ठी तब तांय कसतें रहलै, जब तांय मुट्ठी में दरद नै हुएँ लागलै ।

साँझ उतरें लागलें छेलै । बण्टां बाबू के आवाज सुनलकै, तें झट सना सिलोट के राकस कें मेटाय कें कोठरी दिश भागी गेलै आरो सिलोट

बस्ता में नुकाय कें राखी देलकै ।

हौ दिन ऊ खाय-पीवी कें सुतै लें गेलै, तें जल्दिये सुती रहलै । नैं तें माय सें बिना कहानी सुनलें सुतै नै ।

बण्टामाय कें समझै में नै आवी रहलौ छेलै कि आखिर बण्टा एत्तें भोरे-भोर इस्कूल कैन्हें जाय लें मार करी रहलौ छै । हेनौ तें कहियो नै होलै । आखिर पूछिये बैठलै, “अरे बण्टू, आय एत्तें जल्दी इस्कूल जाय के कैन्हें धड़पड़ी छौ ?”

बण्टाहौ जानै छेलै कि घरों में कोय-न-कोय ई सवाल करतै जरूरे, से वैं पहिलै सें एकरों जवाबो दूढी कें राखलें छेलै । से, माय जेना कें पुछलकै, ऊ तेन्है कें बोली पड़लै, “आय गुरु जीं हमरा पर भार देलें छै । घोष बाबू के यहाँ सें लै कें सबटा कुर्सी इस्कूली में हमरै राखना छै । यहाँ लें धड़पड़ी छै । गुरु जी आवै सें पहिलें जे कुर्सी सबटो राखना छै ।”

“ओ, इ बात छै” बण्टो माय निचिन्त होतें कहलकै, “तें, बेटा जल्दी-जल्दी खाय ले । रातको रीटी तें छेवे करौ, नॉन, तेल लै ले, नैं तें अचारी तेल के दू बूंदे डाली दें । एकदम स्वादिष्ट होय जैतौ । खैलौ रहवे तें हम्मूं निश्चिन्त रहवौ ।”

अचारी के बात सुनथैं बण्टा के मुँहों सें लार टपकी ऐलै, मतरकि वैं आपनों जीहा पर काबुए राखवों अच्छा समझलकै । ओकरा खूब याद छै कि यहाँ अचारी के चक्कर में ऊ चक्कर खाय चुकलौ छै ।

बात ई होलौ छेलै कि ओकरी माय बड़ों-बड़ों टिकोला के फाँक करी कुच्चा बनैलें छेलै । रोज तें आपने सामना में कुच्चा धूपों में सूखै लें दै, मतरकि हौ दिन बण्टामाय कें जरूरी कामों सें पड़ोसी कन जाना छेलै । रिश्ता में पित्तियो लागै, केना नै जैतियै ।

कुच्चा वाला बोय्यम धूपों में राखी देलकै, आरो बण्टा कें बोललै कि देखतहैं रहियैं—बकरी-चकरी मूँ नै दै दौ ।

मतरकि बच्चा-बुतरु पर की भरोसों, से बण्टामायं बण्टा के साथें साथ बिलटाहौ के कही देलकै, “बिलटू, जरा कुच्चा देखतें रहियें—बकरी-चकरी मूँ नै दै दें । हम्मं घण्टा-दू घण्टा में लौटवौ ।” आरो ई कही के ऊ ऐंगन सें बाहर निकली ऐलै ।

ऐंगन के बीचों में कुच्चा वाला बोय्यम, तेल सें चुपचुप चमकी रहलौ छेलै, आरो ओतन्हें ओकरा देखी के बण्टा के आँखो चमकी रहलौ छेलै । जत्तें बोय्यम भरी तेल भरलौ छेले, ओत्ते हिन्नं बण्टा के मुँह भरी लार ।

आखिर वें कत्तें देर टुकटुक कुच्चा के देखतें रहैतियै । मन में ऐलै कि एकटा फाँक निकाली के खय्ये लेवै, तें माय के की पता चलतै । से वें बोय्यम के ढक्कन उठैलकै आरो एकटा फाँक मुँहों में टप सना दै देलकै, जना कोय बगुलां पोठिया मछली धरी के चोंच के भीतर करी लेलें रहें ।

एकरो बाद एक फाँक निकालियो लेलकै कि छहारी में बैठी के आनन्द सें खेलौं जैतै । फाँक लै के कपड़ा सें होनै के बोय्यम रों मूँ बांधलकै आरो बरण्डा पर बिछैलौं खटिया पर आवी के बैठी रहलै ।

बण्टा के की मालूम छेलै कि ओकरो करतूत सब बिलटां देखी रहलौ छै । आरो कोय बात होतियै तें एकरो शिकायत वें मौसी सें कही के बण्टा के मारो खिलैतियै, मतरकि यहाँ तें कुच्चा खाय के बात रहै । बिलटाहौ के मुँहों में कुच्चा देखी के लार आपन्हें आवी रहलौ छेलै ।

आबें चूँकि बण्टा ओकरो शुरुआत करी चुकलौं छेलै, यै लेली ओकरा कांही सें कोय खतरो नै बुझाय छेलै । ऊ तमतमैलौं बण्टा लुग ऐलै आरो कहलकै, “यहें कुच्चा के रखवाली करी रहलौं छें । खैबे तोहें, आरो ढेंस लागतै हमरा पर । मौसी ई मानतै, कि हम्मं नै खेलें छियै ? यहें सोचतै कि सिखा-बुद्धि करी के दोनों खेलें होतै । आबें जबें तोरो कारण हमरा पर शक करवे करतै, ढेंस लागबे करतै, तें कैन्हें नी हम्मू कुच्चा खैय्ये लीयै । आरो हम्मं देखलें छियौ, तोहें दू-दू कुच्चा खेलें छें । तोहें दू कुच्चा, तें तोरो सें कौन मानै में हम्मं कम । एक महीना के बड़ों छियौ, से हम्मं चार कुच्चा खैबौ ।” एतना कही बिलटा दनदनैले बोय्यम दिश गेलै; बोय्यम के मुँहों पर बान्हलौं कपड़ा के खोललकै आरो गिनी के सीधे चार कुच्चा निकाललकै । बोय्यम के मूँ बान्हलकै आरो बण्टा लुग आवी के एक-एक करी के चटकारा दै-दै खावें लागलै ।

बण्टा के मुँहों के कुच्चा खतम होय चुकलौं छेलै । अब तांय जोहो जीहा पर थोड़ों खटरस बचलौं छेलै, वहू आलोपित होय गेलै । मन में गोस्सो बढी गेलै । सोची रहलौं छेलै, “बिलटा कत्तो आपनों मौसेरों-ऊसेरों भाय रहें, घोर तें हमरे छेकै आरो हमरे कुच्चा पर एकरों हेनों अधिकार । हम्में दू ठो खैबै, तें यैं चार ठो खैतै ।”

बण्टा गोस्सा सें तमतमाय उठलै आरो बिना कुछ कहले सीधे बोय्यम दिश दड़बनिया दै देलकै । मुन्हन खोललकै आरो दायौं हाथों सें एक बोकटों कुच्चा निकाली कें बायां हाथों सें जेना-तेना घुमाय कें मुन्हन बान्ही देलकै ।

बरण्डा पर लौटलै, आरो बिलटा कें देखाय-देखाय काटी कें खाबें लागलै । चाटी-चाटी कें खाय के सवाले नै छेलै, कैन्हें कि ओकरों हाथों में कुच्चा के आठ-दस फाँक सें कम नै छेलै । तेल सें चपचपैलौं होला के कारण ऊ गरय मछली रं मुट्ठी सें फिसली रहलौं छेलै, जेकरा वैं बायां हाथ सें लैकें मुँहों में टप सें दै दै ।

बिलटा के मॉन तें होलै कि ओकरों हाथों सें सबटा छीनी कें एक्के साथ आपनों मुँ में राखी दै, मतरकि एकरों जरूरते की छेलै, जबें कि सामना में कुच्चा के खजाना राखलौं छेलै । वैंने बण्टा सें कहलकै, “एत्तें-एत्तें कुच्चा लेलैं, तें कोय बात नै, मुन्हन तें ठीक सें बान्ही देतियैं । ऊ की हम्में बान्हवै । अच्छा चलें, बान्ही दै छियौ ।”

आरो बान्हें सें पहिलें बिलटौ एक बोकटों कुच्चा निकाली कें कुछ बायां हाथों में राखलकै, कुछ मुँहों में, आरो दोनों हाथों के सहारा सें बोय्यम पर कस्सी कें मुन्हन बांधी देलकै; हेनों कि बण्टा खोलें नै पारें ।

मतरकि आबें बण्टा कें वहाँ पहुँचै के जरूरते नै छेलै । अघाय गेलौं छेलै । आबें तें ऊ दोनों हाथ कें धरती पर रगड़ी-रगड़ी तेल-हल्दी कें मेटाय के कोशिश करी रहलौं छेलै कि माय कें पतो नै लागें ।

बिलटौ आपनों हाथ-मुँ कें एक ठो फेकलौं कागज सें साफ करी, फेनू दोनों हाथों कें धुरदौ सें रगड़ी लेलकै । भरपेट भोजें बण्टा और बिलटा के दोस्ती कें एकदम्म घन्नों करी देलें छेलै । दोनों भीतर सें गनगनाय गेलै । हेनों भोज खाय के खुशी में दोनों में सें केकरौ ख्याले नै रहलै कि बोय्यम के कुच्चा आधों सें अधिक ओराय चुकलौं छै ।

हौ तें बण्टामाय कें चिन्ता छेलै कि कहीं ऊ दोनों खेलै-कूदें में नै लागी गेलों रहें आरो हुन्नें बकरी बोय्यम लोढ़काय कें कुच्चा तितिर-बितिर करी देलें रहें । से ऊ पड़ोसी के यहाँ सें चल्लै तें सीधे घोर दिश, एकदम धतर-पतर ।

घरों में घुसतें ओकरा आँख बोय्यम पर पड़लै, तें माथों सन्न रही गेलै । ओकरा ई देखी कें आचरज होलै कि बोय्यम पर मुन्हन तें ठीके-ठाक बन्धलौ छै, मतरकि कुच्चा एकदम अधियाय गेलों छै ।

बण्टामाय कें समझें में कुछुवे देर नै लागलै । ऊ सनसनैलें बरण्डा पर ऐलै आरो बण्टा के दोनो हाथ लैकें सूंघलकै । बण्टा के दोनों हाथ एकदम गमगम करी रहलौ छेलै । धुरदा पर रगड़ला सें की होतै, अचार के काहीं गन्ध जाय छै । हाथों सें ज्यादा कहीं मूँ महकी रहलौ छेलै ।

हाथों के हल्दी-तेल तें केन्हों कें छूटी गेलों छेलै, मतरकि ठोरों पर तेल आरो हल्दी अलगे सें चमकी रहलौ छेलै ।

बण्टौ कें समझें में देर नै लागलै कि आय ओकरों मैय्ये हाथें नै, बाबुओ हाथें निनौन छै । माय बाबू कें कहतै आरो फेनू ओकरों कुच्चा के मजा आखिर में खट्टा होय कें रहतै ।

माय के तमतमैलों मूँ देखी कें बण्टा बिना मूँ खोलले बिलटा दिश कुल्हों उठैलकै आरो आँखी सें बार-बार इशारा करी बतैलकै, कि एकरा में ऊ असकल्ले नै, बिलटौ शामिल छै ।

आबें ये में के कतें शरीक छै, है तें बण्टामाय कें पता लगैवों कठिन छेलै । पतो लगाय कें की करतियै—आखिर बहिनबेटा छेलै बिलटा, ओकरा तें नहिये मारें सकै छेलै । की पता बिलटै के सनकैला पर बण्टाहों कुच्चा खाय लेलें रहै । बहुत सब अन्देशी कें बण्टामाय नें तें बण्टा कें मारलकै, नै बिलटाहै कें कुछ कहलकै । बस बोय्यम उठैलकै आरो कोठरी के सबसैं उपरलका ताखा पर राखी देलकै ।

बण्टा हौ दिन कें भूलें नै पारै छै । जबें भी अचार लुग पहुँचै छै कि ओकरा कुच्चा वाला बात याद आवी जाय छै ।

“अचार के तेल निकालें पारवें कि बोय्यमे गिराय देवें । ठहर, हम्मी निकाली दै छियौ, हुएँ सकै छै, तोहें सब्भे तेले नै होहाय कें राखी दें ।” बण्टा माय नें पीछू सें कहलें छेलै आरो आपन्हें सें तेल निकाली कें रोटी में मली

देलेँ छेलै, जेकरा बण्टा एक अखबारी में लपेटी केँ बस्ता में राखी लेलकै आरो ई कहतेँ जल्दी-जल्दी निकली गेलै कि कुर्सी सड़ियैला के बाद वैं वाहीं बैठी केँ खाय लेतै ।

घरों सेँ चललै, तेँ सीधे सरपट दौड़लेँ इस्कूले जाय केँ ऊ रुकलै । बस्ता काँखी पेटों में दबाय के कोय सवाले नै छेलै । दौड़े में गिरौ पारें, से वैं बस्ता केँ छाती में दोनों हाथों सेँ कस्सी केँ दबाय लेलेँ छेलै ।

इस्कूल पहुँचलै तेँ वहाँ एकदम सुन-सपाट छेलै । एकदम सुनाफड़ में इस्कूलो तेँ छलै । जब तांय इस्कूल के बच्चा आरो गुरु जी आवी नै जाय, हुन्नेँ एक्को आदमी नै दिखावै । हों, पीछू दिश एक बड़ों रं पोखर जरूरे छेलै, जेमें भैंस सिनी हेलतेँ रहें । भैंसी केँ हेलतेँ देखी केँ बण्टा के मॉन गदगद होय जाय । इस्कूल में छुट्टी होला के बाद ऊ कुछ-न-कुछ देर लेली पोखरी दिश जरूरे चल्लों आवै । पानी में हेलतेँ भैंसी केँ देखै, तेँ ओकरोँ मॉन करै कि ऊ सीधे ओकरोँ पीठी पर कूदी जाय । शायत कूदियो जैतियै, मतरकि पोखर तेँ तीन मरद गड्ढा में छेलै । पता नैं भैंस कोन दिशा सेँ आरो केना घुसी जाय छै । वैं सोचै आरो घुरी आवै ।

आय तेँ इस्कूल ऊ बहुत पहिलेँ पहुँची गेलों छेलै । ऊ पोखरियो दिश जाबें पारै छेलै, मतरकि ओकरोँ दिमागो में तेँ तूफान उठी रहलें छेलै, “बाप रे बाप, की रं मारलेँ छेँ मरखन्ना जमराज मास्टर नें । खेलरी उदारी देलेँ छेँ । ऊ तेँ माय नें चूतड़ परकोँ घाव नहिये देखलेँ छे । देखतिये तेँ की इस्कूल आवेँ देतिये ।”

बण्टा रों मनोँ में तूफान उठी रहलें छेलै । वैंनेँ आपनोँ बस्ता इस्कूल के दीवारी सेँ सटाय केँ राखलकै आरो घोष बाबू के दुआरी पर पहुँची गेलै ।

काठों के कुर्सी । बच्चा लेँ भारी बोझों सेँ कम नै छेलै । मतरकि बण्टा केँ ऊ दिन कुर्सी सिनी होनों भारी नै बुझैलै । ऊ कुर्सी के पीछू उल्टा

दिशा सें खाड़ों हुएँ आरो पीठी पर कुर्सी के डाली इस्कूल पहुँचाय दे । कुर्सी उठैला पर ऊ एत्ते झुकी जाय कि कुर्सी ससरै के सवाले नै छेलै ।

एक, दू, तीन, चार, पाँच । बण्टा पाँचो कुर्सी उठाय के इस्कूली के बरण्डा पर राखी ऐलै आरो हिन्नें-हुन्नें देखी के आहिस्ता-आहिस्ता पोखरी दिश चल्लो गेलै । एकरा एकरों सुधे नै छेलै कि रोटी के गंध पावी के कोय कौआ, चिल्ला, कुत्ता ओकरो बस्ता लै के उड़े पारें ।

पोखरी दिश सें लौटलै, ते आमों के पत्ता में कुछ नुकैले ऐलै आरो एकेक कुर्सी पर हिन्नें-हुन्नें पत्ता के घुमावें लागलै, जेना—सिलोटी पर खल्ली सें कुछ लिखतें रहें ।

सबे कुर्सी पर कुछ-कुछ लिखला के बाद वें आमों के पत्ता इस्कूली के पिछुवाड़ी के झाड़ी में रिंगाय के फेंकी देलकै । ऊ पत्ता कोय ठेपो थोड़े छेलै कि रिंगाय के फेंकला सें दूर जाय के गिरतिये । दू हाथ आगू उड़लै आरो फेनू नीचे गिरें लागलै । ऊ ते खैर तखनिये जोरो के हवा उठलै आरो सब पत्ता सिनी उड़ियाय के पोखरी में जाय गिरलै ।

बण्टा के निश्चिन्ती भेलै । लौटी के ऐलै आरो बस्ता उठाय के पिण्डा सें नीचे उतरी गेलै । लड़का सिनी के ऐवों शुरु होय गेलो छेलै । मतलब कि गुरुओ जी के आवै में आबे देरी नै छेलै ।

वें सोचलकै—कुच्छू देर आरो रुकी जाँव, जब तांय गुरु जी आरनी नै आवी जाय छै, फेनू नै जानों की सोचलकै कि ऊ चुपचाप वैठां सें खिसकी गेलै—आपनों सब बस्ता-बोरिया समेटनै ।

इस्कूली में ई नियम छेलै कि जब तांय प्रार्थना नै खतम होय जाय, तब तांय गुरुजी आरो चेला-चटिया बराण्डा के बाहरे रहै । बराण्डा के बाहरे प्रार्थना होय आरो यही ले सब लड़का गुरु जी सिनी के आवै तांय बाहरे में धुर-फिर करतें रहै ।

जबे सब गुरु जी आवी गेलै, ते प्रार्थना शुरु होलै । एक दिश गुरुजी सिनी आरो दोसरो दिश सब लड़का । लड़का सिनी रेघाय-रेघाय गावी रहलो छेलै—

ईश्वर अल्लाह तोरे नाम

सबके सन्मति दौ भगवान ।

आरो जमुआर गुरु जी सब के बीच खोजी रहलो छेलै बन्टा के ।

आखिर ऊ दिखाय कैन्हें नी रहलौं छै ! आखिर गेलै कहाँ ! कुर्सी सब आनले छै; हुएँ सकै छै फेनू खाय लें घोर चल्लौं गेलौं होतै । खाय कें आवी जैतै । सोची कें जमुआर गुरु जी निश्चिन्त होय गेलै ।

हुन्नें प्रार्थना खत्म होलै तें लड़का सिनी आपनों-आपनों जग्घा पर बैठै लें दौड़ी पड़लै । गुरुओ आरनी आपनों-आपनों कुर्सी पर आराम सें बैठलै ।

मजकि आय आराम वाला बाते कहाँ छेलै । कुछ देर बादे देह-हाथ चुनचुनाबें लागलै । एक ठो के चुनचुनैतियै तें कोय दुसरो बात होतियै । यहाँ तें सब गुरु जी के होने हाल छेलै ।

पहिलें तें केहुनिया नोचैबों शुरु होलै, फेनू पीठ आरो चूतड़ साथे-साथ । सब गुरु जी परेशान—पहिलें पीठ नोचें कि पहिलें जांघ । अजीब दृश्य होय गेलौं छेलै—कोय गुरु जी जांघ खोखरी रहलौं छेलै, तें कोय दोनों हाथों के पीछू करी पीठ, आरो कोय तें कोहनिये भमौरै में लागलौं छेलै ।

ई हालत देखी कें लड़का सिनी डरों सें थरथराय रहलौं छेलै । जानें की होय गेलै गुरु जी सिनी कें । बात कुछुओ हुएँ, मार तें आखिर ओकरै सिनी के पड़तै ।

क्लास में सब लड़का-बुतरु, जेठ के ताव में हक-हक करतें कबूतर, कौआ नाँखी चुप छेलै आरो गुरुजी आरनी सावन-भादो में कौआ-कबूतर नाँखी आपनों देह-हाथ खुजलावै में बेहाल ।

बण्टा मनेमन अनुमान लगैलकै—हुरकुस्सी के असर चढ़तैं सब गुरु जी ओकरो घोर दिश दौड़तै आरो ओकरा घरों सें खीची कें धुनाटतै । से वें इस्कूल खत्म होला के बादे घोर लौटवों भला समझलकै ।

वहें होलै । बलुक इस्कूल खत्म होला के आधों घण्टा बादे ऊ घोर दिश चललै । एकदम सावधानी पूर्वक । कि “कहीं कोय गुरुजी रास्ता में नै मिली जाय । पता तें लगिये गेलौं होतै कि देह-हाथ नोचवाय के की

कारण छेकै आरो केकरो ई करतूत होतै । हमरा मार पड़लौं ढेरे दिन थोड़े होलौं छै । मिनट में सब पता लागी गेलौं होतै । वहु में कि हम्में क्लासो सें गायब छेलियै, तें शंका केकरौ आन पर जाय के कोय सवाले नै उठै छै ।”

यहें सोचतें-विचारतें ऊ आहिस्ता-आहिस्ता आपनों घोर दिश बढी रहलौं छेलै कि हठाते ओकरो गोड़ घरों सें दू बाँस पीछुवे थमी गेलै । एकबारगिये । देखलकै कि सब मास्टर तें ओकरे घरों के बाहर खड़ा छै । साथे-साथे चौधरी काकाहौ दू-चार आदमी साथें खड़ा छै ।

बण्टा के देहों में जेना करेण्ट लागी गेलौं रहें आरो गोड़ों में जना पंख । ऊ सीधे उल्टे पाँव हौले-हौले बसंबिट्टी दिश ऐलै आरो पैटों में बस्ता कें आधों खोसी कें, लगै उड़ैन सबौर दिश दै देलकै । बसंबिट्टी पार करी कें लीची बगान, फेनू आम बगीचा, आरो वहीं सें लोदीपुर वाला एकपैरिया धरी कें सबौर दिश एक्के साँस भागलौं चल्लौं गेलै, जब तांय ऊ सबौर नै पहुँची गेलै ।

बण्टा रों गायब होय जाय के खबर सौंसें मुहल्ला में फैली गेलै । चौधरी काका तें तखनिये गुरु सिनी कें कहीं सुनैलें छेलै, “देह-हाथ की नोचै छौं गुरु जी, बण्टा नै मिललौं तें मुहल्ला वालां ठिक्के देह-हाथ नोची देतौं । की सोचलौ, गरीबों के बेटा छेकै, जूट के खोर पतार रं डंगाय दियै । की वहा रही गेलै जमाना ? वहें रं मारै के छेकै लड़का कें ? की समझै छौ, बण्टा माय-बाप कें नै तें संगियो साथी नै जानलकै । हमरा सब मालूम होय गेलौं छै कि जखनी बण्टा खलिहान में धान नाँखी पिटाय रहलौं छेलै, तखनी आरो गुरु जी सिनी तमाशा देखी रहलौं छेलै, जेना भालू के नाच होतें रहें । बण्टा कें खाली नै नी मिलै लें दौ । तबें देखियौ कोर्ट-कचहरी के तमाशा ।”

घरों के लोग आरो मुहल्लो वालां सोचलें छेलै कि गोधूली बेला होतें न होतें बण्टा जरुरे घोर लौटी ऐतै, मतरकि गोधूली बेला के पूछें, रात के दोसरों पहर बीतें लागलै, मतरकि बण्टा के काहूँ पता नै छेलै ।

आखिर जैतै कहाँ ! इस्कूली के पोखरी में चोरबत्ती घुमाय-घुमाय कें देखलें गेलै । बंसबिट्टियो में चार सेल के चोरबत्ती के रोशनी घुमाय-घुमाय कें फेंकलें गेलें, मतरकि बण्टा की, कोय्यो किसिम के संदेहो नजर नै ऐलै । जे दू-चार सियार हुआ-हुआ करै के ताकों में बैठलें छेलै, चोरबत्ती के रोशनी देखी, वहू नै जानौ कौन बिलों में जाय कें सुटियाय गेलै । जरियो टा कन्नो खरखुर होलै, तें मुहल्ला वाला हुन्नै घुसी-घुसी कें खोजलकै—शायत डरों सें सुटियाय कें बैठलें रहें बण्टा, मतर सब प्रयास बेरथ ।

बण्टा के जे-जे आपनों दोस्त छेलै, ऊ तें ओकरा खोजै में परेशान छेवे करलै, मतरकि सबसं ज्यादा ही सिनी खोजै में आरो परेशान छेलै, जे सिनी कें बण्टा सें लड़ाय-झगड़ा होतैं रहै । ऊ सबकें मनो में पुलिस, दारोगा सें बड़ी कें चौधरी काका रों डोर छेलै । सब पुरानों झगड़ा के कसर यहे में निकलै वाला छै ।

ई सोची कें मनमुटाव राखै वाला दोस्त तें आरो खोजै में अस्त-व्यस्त छेलै । चार-चार छौड़ा के जेरों बनाय कें रातो-रात बरहपुरा, लालूचक लोदीपुर, इशाकचक, मुंदीचक, खोजी चुकलें छेलै । की पता बरहपुरा के कब्रिस्तान में छुपी कें बैठलें रहें, आकि फेनू मुंदीचक के गढ़ैया में ।

जेरों कें मालूम छेलै कि मुन्दीचक के गढ़ैया में बण्टा कें सबसं ज्यादा मौन लागै छै । गढ़ैया में जमलें पानी आरो पानी के ऊपर बाँस भरी बिछलें जलकुम्भी । बण्टा कें आरो कोय काम नै रहें, तें साथी सिनी साथें कुम्भी कें खींची-खींची नगीच लानै, फेरू वै पर असकल्लों बैठी कें हिन्नै-हुन्नै डोलतें रहै, जेना भैसिया पर आराम से बैठलें ओकरा पानी में हंकैतें रहें । है बस ओकरों साथिये सिनी कें मालूम छेलै कि वही गढ़ैया में एक खोहो बनलें छै । खोह की छेलै, लोगें माँटी खोदतें-खोदतें एतें भीतर तांय खोदी देलें छेलै कि सुरंग नाँखी लागै । बण्टा आरनी वहा सुरंग में बायां दिश आरो एक खोह खानी देलें छेले, जेकरा में दू आदमी आसानी सें छिपी कें बैठें पारें । जखनी ई गढ़ैया में बण्टा आनन्द मनावै आरो माय-बाबू आकि हेने आदमी कें ऐतें देखै, जे घरों में शिकायत करे, तखनी ऊ वहे सुरंग के सुरंग में घुसी कें बैठी रहै ।

बण्टा कें खोजै में बदहवास ओकरों दोस्त सिनी वहू गढ़ैया के सुरंग तक गेलें छेलै । राते में चोरबत्ती लेने । सुरंग में घुसी कें चोरका सुरंगो तक

रोशनी मारी कें देखलकै । चोरबत्ती के रोशनी पड़तैं सुरंग में बैठलौं कुत्ता भूंकतैं एह्ने तेजी सें उछली कें भागलै कि डरों सें चारो साथी वही पर एक दुसरा के ऊपर लुढ़की कें चिचयावें लागलै । चोरबत्ती छिटकी कें एक दिश फेंकाय गेलै ।

हौ तें चोरबत्ती के बटन हेनो दबाय देलौं गेलौं छेलै कि ऊ जरतैं रही गेलै, नै तें अन्हारों में सबके प्राणे निकली जैतियै । एक नें दौड़ी कें चोरबत्ती लेलकै आरो बारले-बारले चारो घोर लौटी ऐलै । एकरों बाद ऊ सब फेनू खोजै लें नै निकललै । ई सोची कें—आबें जे होतैं सें होतैं ।

संझवाती बेरा होय गेलौं छेलै, जखनी बण्टा भिट्ठी पहुँचलै । दौड़तें-दौड़तें थक्की जाय, तें कोय गाछी के नीचू थिराय लै । हेन्है कें पहुँचलें छेलै ऊ आपनों मौसी के गाँव, भिट्ठी ।

ठीक गाँव के सिमाने पर मिली गेलौं छेलै बिलटा । बण्टा कें देखथें ओकरो खुशी के ठिकानों नै रहलै, होनै कें बण्टा के । मतरकि बिलटा के मनो में हठाते शंका उठलै, “है वक्ती ई असकल्ले ! इस्कूल बस्ता सब कुछ लेनै ! जरूर कांही कुछ बात छै ।” आरो ई शंका उठलें वै पूछियो लेलकै, “एक बात तो बताव बण्टा, तोहे काँहीं घरों सें भागी कें तें नै ऐलौं छें ?”

“हों, भागी कें ही ऐलौं छियै ।” आरो बण्टा एकेक बात सुनाय देलकै, खड़े खड़ । पीठी के घाव तक दिखाय देलकै—कमीज आरो गंजी कें उपर उठाय कें ।

बिलटां देखलकै—आकरो पीठी पर होने छड़ी के दाग उभरी गेलौं छेलै, जेना गिलहरी के पीठी पर मोटों-मोटों रेखा । बिलटा के मुँहों सें आह निकली गेलै ।

मतरकि बण्टा के चेहरा पर चमक छेलै । ऊ बोललौं जाय रहलौं छेलै, “आय बुझैलौं होतै सब गुरु सिनी कें, सबके कुर्सी पर हुरकुस्सी रगड़ी देलें छेलियै । इस्कूल सें घोर गेलियै, तें सब गुरु जी वहाँ हाजिर छेलै । बस की छेलै, हम्में यहाँ लें लगै उड़ोन दै देलियै । ई तें जानवे करै छेलियै कि यहें रास्ता भिट्ठी जाय छै । जहाँ-जहाँ रुकियै, लोगों सें रस्ता पूछी लियै । कोय

कुछ पूछे, तें मौसा के नाम बताय दिये । आरो यहाँ आवी गेलियै ।”

“ठीक करलें तोहें । आबें तोरा कुछ नै बोलना छै । सब बात हम्मिं माय कें बतैवै । आबें तोरा आपनों घरो नै जाना छै । चल घोर चल ।”

राती जखनी खाट पर सब बैठलै, तखनी बिलटा के माय नें बण्टा के पीठ उघारी कें बिलटा के बाबू कें देखैतें कहलें छेलै, “देखौ, राकसें की रं फूल किसिम बच्चा कें खुचलें छै ।”

बिलटा-बाबू सुखलौं-सुखलौं लहू आरो पपड़यैलौं चमड़ी कें देखलें छेलै आरो बड़ी गंभीर होतें कहलकै, “बंटू आबें यहाँ सें नै जैतै । यांही पढ़तै । कल्हे इस्कूली में नाम लिखाय दै छियै । तोहें भोरेरियें किसना के हाथों सें खबर भिजवाय दियौ कि बंटू भिट्टी में छै । खबर तें अखनिये भिजवाय देतियै, मतरकि इखनी कोय आदमी बगीचे-बगीचा जाय वाला नै मिलतै ।”

मौसा के बात सुनी कें बण्टा के मॉन तें एकदम हलहलाय उठलै, बस हेने मॉन करे लागलै कि वही ठां उछलें-कूदें लागै । मतरकि सबटा खुशी दबैने हेने बैठलौं रहलै, जेना—सबसें चोराय कें मुँहों में रसगुल्ला दबैनें, होलै-हौले ओकरो रस तालू आरो जीहा सें गारतें रहें ।

खैला-पीला के बाद बण्टा आरो बिलटां खटिया कें ऐंगना में पारलकै । दोनों छिनमान जामें बच्चा रं लागै । जन्म सें बस एक महिना के अन्तरे सें बड़ों-छोटों छेलै ।

खटियां पर जेन्हें मोटों गेंदरा दै कें वै पर चादर बिछैलौं गेलै, दोनों बढिया सें गोड़-हाथ धोय कें, पोछी-पाछी कें राजकुमारे रं लोघड़ी गेलै । दोनों लें अलग-अलग तकिया । बण्टा कें तें घरों के ख्याले नै रहलै ।

“सुनों बिलटामाय, हम्मं जरा हटिया सें घूमी कें आवै छियौं, जों टेलीफोन बूथ खुल्ला होतै, तें केन्हों कें भीखनपुर खबर करवाय के कोशिश करै छियौं । वहू लगतै तबें नी । सारों, हिन्ने से पचास बार टेलीफोन करों, तें हुन्ने से बोलतौं—सभी लाइन व्यस्त हैं । जेना लागै छै टेलीफान नै रहें, बम्बई, कलकत्ता, दिल्ली के सड़क रहें—लाइन व्यस्त है ।” बिलटाबाबू चिढ़तें होलें बोललै “खैर देखै छियौं, तोहें डढ़िया लगाय लें ।”

“पता नै कखनी ऐतै आबें हुनी” बिलटा मायं मने-मन सोचलकै आरो खटिया के गोरपारी दिश दोनों के पैर उठाय कें बैठी गेलै । खटिया पर

बैठे भर के देर छेलै कि रोजके नाँखी बिलटा कहलकै, “माय कोय खिस्सा कहें नी ।”

खिस्सा के बात सुनथें बण्टा जेहों ओघरैलों छेलै, उठी कें बैठी रहलै ।

“नै बेटा, उठै के काये जरूरत नै छै, लेटले-लेटले सुनें । एक ठो खिस्सा सुनाय छियौ—छौ भाय राजकुमार आरो एक भाय बिज्जी के ।” रूपसावाली दोनों के गोड़ कें बारी-बारी सें हौले-हौले मलतो जाय आरो खिस्सा कहतें जाय रहलौ छेलै, “एक ठो राजा छलै । राजा कें अपार सम्पत्ति छलै ।”

“हमरों चौधरियो काका सें भी ज्यादा ?” बण्टा बीचों में जिज्ञासावश पूछलकै ।

“तोरो काकौ सें ज्यादा । राजा रं केकरा धोन हुएँ पारें ! तें, ऊ राजा कें सात रानी छेलै । मतरकि एक्को टा सन्तान नै । से राजा बड़ी दुखी रहै । घरे में उदास बैठलौ रहै ।”

“तें हुनी खेलै-ऊलै लें कैन्हें नी चल्लौ जाय छेलै ।” बण्टा फेनू बीचे में टोकलकै ।

“हों जाय छेलै नी, शिकार खेलै लें । तखनी राजा आपनों छोटकी रानियो कें साथ लै लै । राजा छोटकी रानी कें बहुत मानै छेलै ।”

“एत्तें ?” बण्टा सुतले-सुतले दोनों हाथ दोनों दिश फैलैतें पूछलकै ।

ई देखी रूपसावाली कें हँसी आवी गेलै आरो वहूँ दोनों हाथ फैलाय कें कहलकै, “हों एत्तें ।”

“अभी खिस्सा शुरुवे होलौ छेलै आरो बण्टा तीन दाफी टोकी चुकलौ छेलै । तबें तें ई खिस्सा भोरो तांय पूरा नै हुएँ पारतै ।” ई सोची कें बिलटां हौले सें बण्टा कें चुट्टी काटलें छेलै । तें, बण्टा समझी गेलै कि खिस्सा सुनै वक्ती ओकरा टोका-टोकी नै करना छै । मतरकि ऊ सुतलौ नै रहलै, उठी कें बैठी रहलै । यैलें कि कांही सुनतें-सुनतें नीन नै आवी जाय ।

रूपसावाली खिस्सा आगू बढ़ाय देलें छेलै, “एक दाफी राजा असकल्ले जंगल दिश शिकार खेलै लें निकली गेलै, नै छोटकी रानी लेलकै, नै कोय सेनापति, नै कोय सिपाहिये ।

“ऊ दिन राजा आरो निराश छेलै । सोचलो जाय कि तभिये जंगल में हुनका एक साधु दिखाय पड़लै । पता नै, राजा के मनो में की होलै कि हुनी साधु नगीच पहुँची गेलै । घोड़ा पीछुवे के एक गाछी सें बांधी देलकै ।

“जबे राजा साधु के नगीच पहुँचलै तें साधु राजा के मूँ उदास देखी कहलकै, ‘तोहें देखलहें सें राजा बुझाय छौ, मतरकि तोरो चेहरा पर ई दुख कैन्हें छौ ?’

“राजा साधु के गोड़ छुवी के आपनो सबटा दुख सुनाय देलकै । राजा रों दुख सें द्रवित साधु हुनका एक चांदी के छड़ी देलकै, आरो कहलकै, ‘पूरब दिश गेला पर कोस भरी के दूरी पर एक गाछ छै, जे पचास गाछ सें घिरलौ छै । सबटा गाछ आम केरो छेकै, आरो सब्भे में आम फरै छै । जे गाछ रों आम छोटो-छोटो बुझावौ, बस वही गाछों सें तोहें सात आम ई छड़ी सें तोड़ी लियो । याद राखियो, कभियो सात सें ज्यादा तोड़े के लोभ नै करियो, नै तें तोड़लौ सातो आम सहित छड़ियो गाछी सें सट्टी जैतौ ।’

“साधु सें छड़ी पावी के राजा के खुशी के तें कोय सीमाहै नै रही गेलै । हुनका सें आशीर्वाद आरो छड़ी लै के राजा पूरब दिस चली देलकै । कोस भरी बढ़ला पर ठिकके हुनी पचास आम गाछों के बीच एक ठो छोटो आम वाला गाछ देखलकै । राजा छड़ी सें सात आम तोड़लकै आरो लौटें लागलै । कि तखनिये हुनका मनो में ई बात उठलै कि कैन्हें नी छोटकी रानी वास्तें एक ठो आरो आम तोड़ी लौ । ई सोची के राजा आठमो आम तोड़ी लेलकै । तोड़े के देर भर छेलै कि आठो आम आरो ऊ छड़ी गाछी सें जाय के सट्टी रहलै ।”

“जा ।” बण्टा रों मुँहो सें हठाते निकललै ।

“ई देखी राजा पछतैतें-उछतैतें फेनू साधु लुग गेलै आरो लोभ के कहानी सुनैलकै । यहू कहलकै कि आबे फेनू लोभ नै करतै । राजा के बात सुनी के साधु फेनू दोसरो छड़ी देलकै । छड़ी लैके राजा फेनू वहे पूरब दिश बढ़ी गेलै । मतरकि अबकी कोय लोभ नै करलकै । बस सात ठो आम तोड़लकै आरो राजमहल दिश बढ़ी गेलै । राजमहल पहुँची के सातो रानी के एक-एक आम पूजा-पाठ करी के खाय लै ले कहलकै ।

“बड़की छवो रानी तें जल्दी-जल्दी पूजा-पाठ करी आम खाय लेलकै, मतरकि छोटकी रानी आम के कोठरी के ताखा पर राखी के दासी

सिनी साथें गंगा नहाय लें चल्लो गेलै । सोचलकै, हेनो फल गंगा नहैला के बादे ग्रहण करना चाही । हुन्नें छोटकी रानी गंगा नहाय लें गेलै आरो हिन्नें कन्हौं सें एक ठो बिज्जी ऐलै आरो ऊ आम के चाटी के छोड़ी देलकै ।”

“तबें तें आम में जहर भरी गेलो होतै ।” बण्टा के चुप नै बैठलो गेलै, से जानै के ख्याल सें पूछलकै ।

“जहर तें नै भरलै, मतरकि चाटला के असर ई होलै कि आरो सब रानी के तें राजकुमार होलै, मतरकि छोटकी रानी के बिज्जी । राजा तें ई खबर पैहें उदास होय गेलै, मतर छोटकी रानी दुखित होय्यो के दुखित नै होलै—ई सोची के कि जबें विधि के यहे मॉन छै, तें यहे सही । हुन्नें राजकुमार सिनी धीरें-धीरें बड़ो हुएँ लागलै । जबें छवारिक रं सबठो होय गेलै तें सब्भें राजा के कहलकै कि आबें ऊ सिनी व्यापार करै लें परदेश जाय लें चाहै छै । राजा ई सुनी के बड़्डी खुश होलै आरो हुनी इजाजत दे देलकै । जबें ई बात बिज्जी के मालूम होलै, तें बिज्जियो जाय लें माय लुग मचलें लागलै । छोटकी रानी के बहुते मना करला के बादो बिज्जी एक नै मानलकै आरो वनिज वास्तें छवो भाय साथें निकली गेलै । छवो राजकुमार घोड़ा पर छेलै आरो बिज्जी उछललो-कुदलो घोड़ा सिनी के आगू-पीछू चल्लो जावें लागलै ।”

“तें, कोय भाय आपनो घोड़ा पर बैठाय नै लेलकै ?” बण्टा बड़ा मुरझैलो रं आवाज में बोललकै ।

“नै बैठलकै । भैय्यो सिनी बिज्जी के भाय कहै में चिढ़ै छेलै । नै चढ़ैलकै, तहियो बिज्जी ऊ देश पहुँची गेलै जौन देश के राजा कन छवो राजकुमार गेलै आरो परिचय दे के वहाँ बड़ो-बड़ो पदों पर काम करे लागलै । सांझे छवो राजकुमार एक्के कोठरी में अलग-अलग पलंग पर आवी के सुती जाय ।”

“आरो बिज्जी ?” बण्टा बड़ी चिन्तित होतें पूछलकै ।

“बिज्जियो वहे कोठरी में कोय पलंग के नीचे राती सुती रहै । कोय राजकुमार के मालूमो नै हुऐ । जखनी भुरकवो नै उगै, बिज्जी कोठरी सें निकली के कुम्हारों के यहाँ चल्लो जाय ।”

“कुम्हारों कन कथी लें ।” बण्टा के आश्चर्य बढी गेलै ।

“बिज्जी वहे कुम्हारों कन काम करे लागलो छेलै । दिन भरी

गदाहा पर भिट्टी ढोवै आरो साँझे कुम्हारे कन खाय-पीवी कें राती राजकुमारों लुग आवी जाय । पेटभत्तै पर बिज्जीं कुम्हारों कन नौकरी करी लेलें छेलै । आरो कुम्हार छेवो करलै एक नम्बर रों कंजूस । एत्तें सस्ता में काम करै वाला आरो के मिलतियै । सें बिज्जी कें पेटभत्ता पर राखी लेलें छेलै ।

“एक दिन जबें बिज्जी पलंग के नीचे ओघरैलों छेलै कि वैं राजकुमार सिनी के आपसी बातचीत करतें सुनलकै, कि ठीक पाँचमों रोज सब आपनों राज लौटी जैतै । जे जत्तें कमैलें छै, सब बोरा में कस्सी-कुस्सी आपनों-आपनों घोड़ा पर लादी लेतै । ई सब बातचीत सुनी कें बिज्जी सोचें लागलै कि वैं तें धोंन कमैलें नै छै, वैं की लै जैतै । ऊ रात भरी सोचन्हें रहलै आरो एकदम भोररिये कुम्हारों कन काम करै लें चल्लों गेलै ।

“कुम्हारों कें एकटा बेटा छेलै, जे रातिये वक्ती पौर-पखाना वास्तें निकलै । ऊ डरगुहो ओत्ते छेलै । जौन दिनों सें बिज्जी घरों में ऐलों छेलै, बिज्जिये ओकरों साथ मैदान जाय । ऊ दिन जबें कुम्हार के बेटा साथें पोखरी दिश गेलै, तें एकान्त पावी कें बिज्जीं कहलकै, ‘तोहें सच-सच बताव कि तोरों बाबू धोंन कमाय कें कौन तहखाना में राखै छों । राजा सें लैकें प्रजा तांय के काम करै छौ, तोरों बाबू सें बढी कें मातवर तें राजाहौ नै होतै । आय तोहें ई बात नै बतैलें कि तोरों बाबू धोंन कहाँ राखै छौ, तें हम्में तोरा काटी लेवौ, आरो तोहें मरी जैबे ।’

“बिज्जी के बात सें कुम्हारों के बेटा डरी गेलै आरो सब्भे टा बात बताय देलकै कि बाबू आपनों धोंन या तें चाक के नीचें गाड़ी कें राखै छै आकि फेनू जाँतों चक्की के नीचें । सबटा बात सुनी कें बिज्जीं कहलकै, ‘सुन, जों तोहें केकरौ ई बात बतैलें कि तोहें ई बात हमरा बतैलें छें, तें तोरा हम्में काटी लेवौ, आरो तोहें मरी जैबे ।

“वही दिन सें बिज्जी ई मौका में रहें लागलै कि केना सबटा धोंन निकाललें जाय । निकालियो लेतै, तें लै जैतै केना, यहू सब सोचै । आखिर वैं उपाय निकालिये लेलकै । कुम्हारों कें एक गधैया छेलै, जे एक टांग से लंगड़ी छेलै । कुम्हारें ओकरा खैय्यो लें नै दै । जे मिलै वही खाय लै । एक राती बिज्जी जाँतों सें दूर हटी कें आपनों नाखून सें माँटी खोदना शुरु करलकै आरो जाँतों लुग पहुँची गेलै । देखै छै कि हीरा, मोती, पन्ना, लाल, एक बोरिया में भरलें छै । वैंनें केन्हों खींची कें निकाललै आरो गधैया कें

बोरा खोली सबटा हीरा, मोती खिलाय देलकै । ठीक वहे रं चाक के नीचहौ सें हीरा, मोती निकाली-निकाली गधैया के खिलाय देलकै ।

“आबे ठीक वहे दिन, जे दिन राजकुमार सिनी के लौटे के बात छेलै, बिज्जी कुम्हारों के पास ऐलै आरो कहे लागलै कि एते दिन तोरा कन हम्में काम करलियोँ, आबे हम्में आपनों देश जाय ले चाहै छी । ओते दूर पैदल केना जेवों, से तोहे आपनों लंगड़ी गधैया दे दे । कुम्हार ई सुनहें खुश होय गेलै कि लंगड़ी गधैया से मुक्ति मिललौ । वै तुरंत ‘हों’ करी देलकै । कुम्हारों के हों कहतें बिज्जी गधैया ले के वहाँ से निकली गेलै आरो राजकुमार सिनी के साथे साथ चलै लागलै । ई देखी के राजकुमार सिनी हाँसे । राजकुमार घोड़ा पर छेलै आरो बिज्जी गधैया पर । भला गधैया घोड़ा के बराबरी करे पारतियै । देखहें-देखहें राजकुमार सिनी आगू निकली गेलै । लेकिन राजमहल पहुँचलै सब आगुए-पीछू ।

“मतरकि गधैया हौ हीरा, मोती, मुहर, केना खाबे पारें ।” बिलटा कहतें-कहतें उठी बैठलै ।

“सुनलै नै, कुम्हारें ओकरा खाय ले नै दे छेलै, तबे करतियै की । जे मिललै वही खाय गेलै ।”

“आगू के खिस्सा ते सुन..... ।” एतना कहतें बण्टा कहलकै, “तबे की होलै मौसी ?” आबे बण्टाहौ उठी के बैठी गेलै ।

“तबे । तबे सब राजकुमारें आपनों कमैलों धौन खोली-खोली के दिखावे लागलै । राजा साथे छवो रानी बड़ी खुश होलै आरो जखनी बिज्जी गधैया साथे राजमहल पहुँचलै, ते सब राजकुमार हाँसे लागलै, मतरकि बिज्जी गधी साथे आपनों माय लुग पहुँची गेलै आरो गदही के ऐंगना में बान्ही के माय से डांग लाने ले कहलकै । छोटकी रानी के जरियो टा बात समझै में नै आवी रहलौ छेलै, से डांग लानी के बिज्जी के हाथों में थमाय देलकै । तबे की छेलै, बिज्जीं गदही पर डांग बरसाना शुरु करलकै । हुन्ने डांग पड़े आरो हिन्ने गदही लीद के जग्घा में हीरा, जवाहरात निकालले जाय । ऐंगना में हीरा, मोती, मुहर, केरो ढेर लागे लागलै । छोटकी रानी ई देखी के सन्न छेलै ।”

“है बात राजा आरो राजकुमार के नै मालूम होलै ?” बण्टा बड़ा धीरें से बोललै, जेना-बगले में राजकुमार खाड़ों रहे आरो वै सुनी नै ले ।

“हों, राजा कें मालूम होलै, मतरकि जबें राजकुमारो सिनी कें मालूम होलै तें आपनों लानलों धोंन के आधा हिस्सा दै कें छवो राजकुमारें बिज्जी सें ऊ गदही खरीदी लेलकै । बिज्जियो विरोध नै करलकै । दै देलकै । आबें तें बिज्जी के ऐंगना में गोड़ राखै भरी के जगह नै छेलै, कहाँ हीरा, मोती नै बिछलों छेलै ।

“हुन्नें राजकुमारें सिनी गदही कें ऐंगना में बांधी कें डंगाना शुरू करलकै । मतरकि बेचारी लंगड़ी गदही हीरा, मोती केना लीद करतियै । ऊ तें सब बिज्जिये कन गिराय देलें छेलै । बहुत डंगावें लागलै तें गदही मारों सें घास वाला लीद करी कें घिनाय देलकै ।”

ई सुनी कें तें बण्टा आरो बिलटा के हँसी जे छुटलै, तें रुकवां नै रुकलै । रुपसोवाली कें हँसी आवी गेलों छेलै । ई सब हँसी तें तब्बें रुकलै, जबें द्वारी पर बिलटाबाबू के झिंझिर खटखटैबों साथें ‘हम्में छेकां’ के आवाज होलै ।

रुपसावाली उठलै, तें बण्टा आरो बिलटा तुरत खटिया पर लुढ़की कें आँख मुनी लेलकै ।

“बात होलौं ?” हुड़का खोलतें रुपसावालीं पूछलकै ।

“हों, होलै” भैरो कापरीं ठंडा स्वर में कहलकै, “बाते नै होलै, हम्में कही देलियै, कि बण्टू आबें साल, छः महीना यहीं रहतै । नाम लिखाय देबै, बिलटू साथें पढ़तै-लिखतै ।”

“तें, दुल्हार्जी की कहलकौं ?”

“कहतै की, हमरों बात हुनी मानी लेलकै ।”

“आबें तोरों काम रहलौं कि बण्टू के नाम कोय दिन इस्कूली में लिखाय ऐयो ।”

आँख मुनले-मुनले बण्टा आरो बिलटां सब बात सुनलें छेलै । सुनी कें दोनों के मॉन बड़का बेलून नांखी फूली कें पानी रं पातलों होय गेलै—कि आबें फूटथै कि तबें ।

होना कें तें भैरो कापरी कृषि कॉलेजों में कल्के छेलै, मजकि ज्ञान में कोय प्रोफेसर-डॉक्टर सें कम नै । दुनिया भरी के गाछ-बिरिछ के जानकारी सें लै कें हजार किसिम के दबाय-दारू के जानकारी राखै । मॉर-मोकदमा के दांव-पेच तें जत्तें भैरो कापरी कें मालूम छेलै, ओत्तें वकीलो वैरिस्टर कें नै होतै । भले गाँव के ऊ मुखिया नै रहें, मतरकि गाँव के छोटों सें छोटों मामलौ पर मुखिया, पंच जरूरे भैरो कापरी सें मिलै ।

बण्टा के घाव आरो देहों के दरद छुड़ाय वास्तें कोय डॉक्टर लुग जाय के जरूरत नै पड़लै । मौसा जे जड़ी-बुटी देहों सें लगाय दै, वही काफी । पाँच दिन पुरतें न पुरतें सब घाव हेनों चोखैलै, सबटा दरद हेनों फुरपार होलै जेना फटाका के आवाज सुनी बगीचा रों बानर ।

होना कें बण्टा के दरद तें वहें रात दूर होय गेलों छेलै, जॉन राती वें सुनलकै कि ऊ आबें याहीं रहतै । ई सुनला के बाद भला दरद केना, की बुझैतियै । खूब घोर नीनों में हौ राती ऊ सुतलों छेलै । रात-रात भरी वें सपना में बिज्जी कें देखतें रहलै—की रं घोड़ा रों पीछू-पीछू दौड़लों जाय रहलों छै । केना पलंग नीचें घुर-घुर करी रहलों छै । केना बिल बनैतें-बनैतें जाँतों-चाक तांय पहुँची गेलै । केना सबटा हीरा, मोती, मुहर निकाली कें लेंगड़ी गदही कें खिलाय देलकै आरो केना हिन्नें बिज्जी गदही कें डांग मारै, तें हुन्नें सें लीद बदला हीरा-मोती गिरावै ।

सपनाहें में बण्टा कें बिज्जी सें दोस्ती होय गेलै । खूब गाढ़ों दोस्ती । रात-रात भरी दोनों बाजी लगैलकै कि बेशी तेज के दौड़ें पारें । बिज्जी खूब जोर लगैलकै, मजकि बण्टा तें घोड़ा निकललै । बिज्जी रस्ता में हाँफी रहलों छेलै । ई देखी बण्टा झट सना ओकरा गोदी में उठाय लेलकै आरो देर तांय ओकरों पीठ सहलैतें रहलै ।

बिहानै जब उठलों छेलै तें मौसी ओकरा पीठ सहलाय रहलों छेलै । पूछलकै, “की अभियो खूब दरद करी रहलों छौं ?”

“नै कुछुवो नै ।” बण्टा धड़फड़लै उठलै ।

रुपसावालीं एकरा सच्चे मानलकै, कैन्हें कि गरम तेल में जड़ी डाली कें एत्तें लगाय देलें छेलै कि रात भरी में जरूरे दरद सोखी लेलें होतै ।

पाँच दिन, आठ दिन, दस दिन । ठीक दसमों दिन घरों में पंचायत

बैठलै कि बण्टा के कौन क्लासों में नाम लिखैलौं जाय आरो कौन इस्कूली में ।

इस्कूल के नाम सुनलैं बण्टा के जमराज गुरु जी के मार याद आबी गेलै । एक-एक साटों । पड़...पड़...पड़...पड़... । याद करतैं बण्टा ऐंठी के रही गेलै । अभी आरो कुछ बोलतियै कि बण्टा पहिले बोली उठलै, “हम्मं घरे में पढ़बै, इस्कूल नै जैबै ।”

भैरो कापरी बात के समझी गेलै । कहलकै, “यहाँ गुरु जी होनों नै छै, जे तोहें सोची रहलौं छैं । आबें तोरों मरजी पर छै कि तोहें अंग्रेजी इस्कूल में पढ़ै लें जैबै कि सरकारी इस्कूल में ? मौसीं यही कही रहलौं छै कि अंग्रेजी इस्कूल में ही नाम लिखाय दौ । अंग्रेजी से पढ़तै-लिखतै तें बड़का नौकरी मिलतै, बड़का इज्जत मिलतै । तोरों की मौन छै ? अंग्रेजी सें सकें पारबै ?”

“सकें केन्हें नी पारतै । अभ्यास करला सें तें आदमी पहाड़ो उठाय छै ।” रुपसावाली बण्टा सें पहिलें बोली उठलै ।

“सुनों, तोहें कुछ समझै-बुझै तें छै नै, खाली फेंकड़ा पढ़ै छै । अंग्रेजी पहाड़ नै छेकै, मूसों छेकै । मूसों, जे आदमी के पहाड़ हेनों दिमाग के भीतरे-भीतर कुतरी के हिलाय दै छै । समझलौ । निहाल करी रहलौं छौं नी बिलटू ।” थोड़ों मूं ऐंठतें भैरो कापरी बोललै, “अंग्रेजी इस्कूल में पढ़ैवों बेटा के । अंग्रेजी के आठ टा शब्द घोके में आठ दिन लगावै छौं । तोहें समझै लें केन्हें नी चाहै छै कि बच्चा आपने माय-मौसी लुग रहै छै, परों घरों में नै आरो आपने माय बच्चा के ठीक सें पालै-पोसै छै, परों घरों के जोर-जनानी दू पैसा दिऐं पारें, बच्चा के गू-मूत नै देखें पारें आरो नै एकरों खयाल कि बच्चां खैलकै कि नै, नीन ऐलै कि नै ?.....के लकड़सुंग्घां लकड़ी सुंग्घाय देलें छौं कि बेटा के पढ़ैवों तें अंग्रेजी पढ़ैवों, बहिन-बेटा के पढ़ैवों तें अंग्रेजी पढ़ैवों । तोरों बस चलौं तें हमरों नाम तोहें अंग्रेजी इस्कूली में लिखाय दौ । हम्मं नौकरी करै लें चललियौं । तोरहै सिनी तै-तमन्ना करी लें कि बण्टा कहाँ पड़थौं । बाबू बनथौं कि लाट साहब ।”

आरो जखनी साँझे लौटलै, तें फेनू घरों के पंचायत बैठलै, जैसैं बण्टा, बिलटा दोनों गायब छेलै । भैरो पूछलकै “बण्टू नै दिखावै छै ।”

“हिन्नं-हुन्नं कन्हौं बिलटू साथें खेलतें होतै ।”

“तैं, की तैं भेलै ?”

“तय की होतै । बण्टू साफ बोलै छै कि हम्मैं इस्कूल नै जैबै, नै सरकारी, नै अंग्रेजी । घरे में पढ़बै । आबैं तोंही बताबों, ओकरा घरों में के पढ़ैतै । मानी लें कि ऊ इस्कूल नहिये जाय छै, ओकरों लें घरे में गुरु जी राखियो दै छियै । तैं, गुरु जी दिन भरी तैं नहिये नी पढ़ैतै । बिहनकी ऐतै आकि सँझकी, घण्टा भरी रहतै आरो चल्लों जैतै । हुन्नैं दस बजतैं-बजतैं बिल्टू इस्कूल चल्लों जाय छै, बेचारा ई असकल्ले रही जैतै । भला असकल्लों एकरों मॉन की लागतै । सबसें बड़ों चिंता तैं यहें बातों के छेकै ।”

“तोरा चिन्ता करै के कोय जरूरत नै छै । हम्मैं नौकरी पर जेबै तैं आपनों साथ लै लेबै । कॉलेजों में बड़का ठो मैदान छै । गाछ-बिरिछ छै, किसिम-किसिम के चिड़िया, मधमक्खी कें घोर, किसिम-किसिम के फूल, पत्ती । आपने मॉन लागलौ रहतै । फेनू हम्मैं तैं रहबे करबै । जबें आपने मनौ सें बोलतै कि इस्कूल जैबै, तैं नाम लिखाय देलौ जैतै ।”

आरो यहें बात पक्की मानलौ गेलै ।

तिनकौड़ी निषाद कें गाँव भरी के लोग माँछो काका कहै छै । मछली मारै के काम करै छै । एकदम भोरे-भोर उठलौ, जाल उठैलकों आरो गंगा दिश कखनी गेलौ कि, कोय जानो नै पारें । हुन्नैं आकाशों सें सुरुज हुलकै छै, आरो हिन्नैं माँछोका बड़का चंगेरा लेलें गाँवों में बूलें लागलौ ।

तिनकौड़ी निषाद के कोशिश रहें छै कि सबसें पहिलें भैरो कापरी के यहें पहुँचें । हुनका तीन सेर वाला मछली चाही आरो तीनो सेर । भैरो कापरी कन दू-चार आदमी ऐतैं-जैतैं रहै छै, कभी कोय, तैं कभी कोय, कभी ई, तैं कभी ऊ, कभी है, तैं कभी हौ । तीन सेर मछली के मोले की !

बण्टा जखनी घरों पर रहै छेलै, तैं बंशी लै कें दोस्तो सिनी साथें नै होलौ तैं सूरु बांध चल्लौ गेलौ; वहीं वंशी में गूड़-सत्तू वाला चारा फंसाय कें मछली फंसाय के कोशिश करतें रहलौ । कभी फँसलौ, कभियो नहियो ।

फँसवो करलौं तें डरौं सें घोर नै आनलकौ कि माय-बाबू डाँटतो—मछली मारै लें केन्हें गेलौं छेलें ? से वैं पकड़लौं मछली रस्ता भरी तें हुलासे सें लानै मतर घोर लगीच ऐतें-ऐतें बड़ी दुखित मनौं सें दोस्त केँ दे है । ई बात सें ओकरौं दोस्त ओकरा सें बड़ी खुश रहै कि ओकरा टेंगटा-पोठिया चार-पाँच ठो आरो मिली जाय ।

भैरो कापरी के दुआरी पर माँछो काका पहुँचै कि—बण्टा सबसें पहलें दौड़ी केँ पहुँचै आरो काका लुग खाड़ौं होय जाय छै । चंगेरा उतरतैं ओकरौं आँख एकेक मछली के पीछू घूरें लागै, “बाप रे बाप, एत्तें-एत्तें बड़ौं मछली । किसिम-किसिम के मछली ।” चंगेरा में मछली जत्तें घुर-फुर करै, ओत्ते बण्टा के मनो ठो । कि है छुवौं, कि हौ छुवौं । “की एत्तें-एत्तें बड़ौं मछली वैं उठावें पारतै । हों, दोनों हाथ लगैला पर उठें पारें । मतरकि जौं कहीं काटी लें । बाप रे बाप, कत्तें बड़ौं-बड़ौं गलफरौं छै । केकरो केकरो मूँछों कत्तें बड़ौं । आँख केन्हों काँचों के गुल्ली रं चमकै छै ।”

बण्टा के मनौं में किसिम-किसिम के भाव उठतें रहै छै; माँछो का जब तांय दुआरी पर बनलौं रहै छै ।

“माँछों का जरा दस मिनिट बैठियौं । हुनी तुनुक मिसिर जी केँ मछली के नेतौं दे लें गेलौं छौं ।” रुपसावाली ऐंगने सें बोललै ।

“कोय बात नै छै बेटी, बैठले छियै ।”

मौसी के बात सुनी केँ बण्टा निचिन्त होय गेलै । सोचलकै, “होय गेलै, आधौं घण्टा सें पहिलें आवै वाला नै छै मौसा ।” ऊ वहीँ पर पालथी मारी केँ बैठी रहलै । ओकरा एकरो होश नै रहलै कि धरती पर बेठी रहलौं छै तें पैटों में धुरदा लागतै । ऊ तें हेन्है केँ बैठतें ऐलौं छै । उठलौं तें दोनों हाथ पीछू करी पैटों केँ झाड़ी लेलकौं । बस होय गेलै । जेना ऊ साबुन में साफ करी लेलें रहें पैटों केँ ।

“अरे नूनू पैट धुरियाय जैतौ ।” माँछो काका कहलकै ।

“छोड़ौं नी काका । पहलें हमरा ई बतावौं कि है एत्तें बड़ौं मछली मिलै छौं कहाँ ?”

“गंगा में मिलै छै आरो कहाँ ?”

“गंगा में मिलै छै एत्तें बड़ौं-बड़ौं ! ई तें लागै छै जेना समुद्री मछली छेकै ।” बण्टा एक दाफी अंगुली बढ़ाय केँ छुवै के कोशिश करलकै, मतरकि

ई सोची कि उछली नै जाय, हाथ खींची लेलकै ।

“तोहें, बोललै तें एकदम ठीक बेटा, हिलसा समुद्रे वाला मछली छेकै ।”

“तें गंगा में केना आबी जाय छै ?”

“अण्डा दै लें । हिलसा मछली कें अण्डा दै लें मीठा पानी चाही । समुद्र के पानी तें खारों होय छै, यै लेली समुद्रों सें चली कें, नै खाली ई यहाँ तक आबी जाय छै, इलाहाबाद के गंगो तांय पहुँची जाय छै ।”

“मतरकि है मछली हमरों घर में तें कभियो नै ऐलै ?”

“ऐतै कहाँ सें बेटा । आबें ई मिलै कहाँ छै । कभी काल फँसी गेलों । जबें फरक्का बांध नै बंधलों छेलै, तखनी बोहों के बोहों मछली यहाँ तक आबी जाय छेलै । आदमी हिलसा छोड़ी कें कोय मछली नै खाय छेलै । बांध बंधी गेलै तें मछलियो हिन्नं आबै नै पारै छै । एतें बड़ों-बड़ों आबें रेहुओ मछली कहाँ मिलै छै ।”

“तबें हमरा सिनी जे रेहू मछली घरों पर खाय छियै, ऊ कौन रेहू मछली छेकै ?” बण्टा माँछो का कें देखतें पूछलकै ।

“ऊ सब नकली रेहू छेकै । जादा सें जादा रेहू के किसिम कहों । रेहुए की कहै छौ, आबें तें मांगुर, नैनी, कोशी, चीतल, गरै, मांच, कतला, मिरगल, हिलसा, सब दुर्लभ होय रहलौ छै ।”

माँछो का के मुँहों सें मछली के एतें-एतें नाम सुनी कें बण्टा के आँख फाटी कें रही गेलै । “बाप रे बाप, कतें-कतें नाम जानै छै । कौन इस्कूली में पढ़लें छै काकां । नै, मनो सें घोक्तें होतै, यही सें काकां एतें-एतें नाम जानै छै ।” बण्टा एक क्षण लेली सोचलकै आरो आपनों भाव कें बिना जानले देलें वैं माँछों का से आगू पूछलकै, “काका हिलसा तें मानी लें बांधी कें कारण नै आबै पारै छै, मतरकि है सब मछली कैन्हें नी मिलै छै ?”

“अरे एतें सब बात जानी कें तोहें की करवा । बड़को-बड़को जानबे करै छै तें की करै पारै छै । बतैला सें तें दुखे होय छै ।” ई कही कें माँछो का चुप होय गेलै । ओकरो चेहरा पर दुख के भाव उभरी ऐलै ।

बण्टा कें लागलै, बात जरूर कुछ गड़बड़ छै । मतरकि बात छेकै की ? ओकरो मनो के जिज्ञासा चंगेरा में पड़लौ मछलिये रं उछलें-कूदें लागलै, तें बण्टा दोहराय कें पूछलकै, “तहियो काका ?”

बण्टा दोनों केहुनी के दोनों जांघों पर टिकैलके आरो तरहथी फलकाय के ओकरो बीचों में ठुड्डी के जमाय लेलके ।

“तोहें कभी पोखरी में मरलों मछली के उपलैतें देखलें छौ ?”

“हों, एक दाफी । हमरों चौधरी काका के पोखरी में एक दाफी एक मॉन सें ज्यादा मछली मरी के उपलाय गेलों छेलै । सब बोली रहलें छेलै, कोय डाही सें राते में जहर दे देलें छेलै ।”

“बस, बस बेटा, आबें तोरा सब बात समझै में कुछओ देर नै लागतौं । आबें तोंहीं सोचौ, एक चुटकी जहर सें सौ मन मछली मरी गेलै, तें गंगा में जे हजारो-हजार मॉन रोज जहर कल-कारखाना उगली रहलें छै, ओकरा सें मछली मरतै की बचतै ? गंगा तें जहर बनी रहलें छै । आरो जे मछली बचलें छै, वहू में जहरे बूझों । मछली के तें वंशे जना खतम होय गेलों, ई फैक्टरी-कारखाना के कारण । आपना यहाँ तें नै, कहै छै अकेले उत्तर प्रदेश मं गंगा के किनारी-किनारी डेढ हजार कल-कारखाना छै, जेकरों जहरीला पानी आरो कूड़ा-कचरा गंगा में जैतें रहै छै । रहें पारतै भला गंगा आरो रहें पारतै मछली जीतौं ? फेनू पानियो तें एकदम घटलें जाय रहलें छै । कभियो मौसी-मौसा साथें गंगा जैभौ, तें देखभौ कि गंगा केन्हों नाला नाँखी बहें लागलें छै ।”

“गंगा कन्ने छै ?”

“हुन्ने ।” माँछों कां उत्तर दिश हाथ करतें कहलकै । एक समय ई गंगा एत्तें चौड़ा छेलै आरो वैमें एत्तें पानी रहै छेलै कि गर्मियो दिनों में जहाज डूबी जाय, तें पता नै लागें ।”

“तें आबें की होलै ?”

“गंगा में पानिये नै आबै छै ।”

“गंगा में पानी कहाँ सें आबै छै काका ?”

“हिमालय पहाड़ों सें ।”

“हिमालय पहाड़ में की बड़का पोखर छै ?”

“नै हो, नै” माँछो का खिलखिलैतें बोललै, “तोहें बरफ वाला इस्क्रीम खाय छौ नी । बस हिमालय में वहें बरफ के खान छै । कोस भरी के नै; हजारो हजार कोस के । वही बरफ पिघली-पिघली के गंगा में आबै छै, तें गंगा बहै छै । सुनै छियै कि हिमालय परकों वहू बरफ खतम होय

रहलौं छै ।”

“कैन्हें, ऊ सब बरफ कोय राकस आरनी जरूरे खाय जैतै होतै ?”
बड़ी चिन्तित होतें बण्टा पूछलकै ।

“राकस तें की कहबौ, तबें राकसे बूझौं । सब मिली कें जंगल काटलें जाय छै । पहिलकों जमलौं बरफ गली कें बहलौं जाय छै, आरो जमबौं रुकी गेलौं छै । तहिया पहाड़ गाछी सें भरलौं छेलै, तें पहाड़ ठण्डैलौं रहै छेलै । ठण्डैलौं रहै छेलै, तें मेघ उड़ी-उड़ी कें आवै आरो जमी कें बरफ बनी जाय, तें समय पर पिघलबो करै । आबें तें गाछे नै छै, तें बरफ की जमतै । पहाड़ चूल्हा पर खपड़ी रं गरम होलौं जाय रहलौं छै । गंगा नाला नै बनतै तें आरो की । सब जग्धों के गंगा मरगांग बनी गेलै ।” कहतें-कहतें लागलै माँछो का जेना कानी भरतै ।

“काका, पहाड़ों पर हमरा सिनी गाछ नै लगाबें पारौं ।”

“की बोलै छौं नूनू, ओत्तें बड़ौं पहाड़ों पर गाछ सिनी के लगाबें पारतै कोय्यो । ई पहाड़ की बौंसी के मनार छेकै कि जेठोरों के पहाड़ । वहू पहाड़ों पर तें गाछ नै लगाबें पारै छै आदमी । हिन्नें एक लगावै छै, तें हुन्नें दू ठो काटी लै छै ।”

“अच्छा, हममें बड़ौं होबै नी काका, तें ढेर गाछ लगैबै ।” बण्टा आपनों दोनों हाथ एकदम पीछू तानतें कहलकै । ओकरों चेहरो पर एकदम वीर भाव जागी उठलौं छेलै ।

ऊ शायत आरो कुछ बोलतियै कि तखनिये झट सना ऊ चुकुमुकु बैठी रहलै आरो टानलौं हाथों कें चूतड़ पर राखी कें जल्दी-जल्दी धुरदा झाड़ें लागलै । असल में ओकरों आँख दूर सें ऐतें मौसा पर पड़ी गेलौं छेलै । धुरदा झाड़ी-पोछी खड़ा होय गेलै आरो ई कहतें घोर घुसी गेलै, “मौसी, मौसाबू आबी गेलै ।”

“की बात छेलै, बण्टू बड़ी जांघ-जूंघ जोड़ी कें बैठलौं छेलै । कोय खिस्सा सुनी रहलौं छेलौं की ? खिस्सा-गप, खेलै कूदे में एकरों बड़ी मॉन लागै छै ।” भैरो कापरीं हाँसतें-हाँसतें कहलकै, तें माँछो का भी बोली उठलै, “जे कहौं दादा, ई लड़का निकलतौं बड़ी विलक्षण । लक्षणे बताबै छै ।”

“ई तें छै, मतरकि सबसें बड़ौं कमी यै में यही छै कि पढ़ै के नाम सुनथैं एकरों बुद्धि मंद पड़ी जाय छै । बहियार देखी आबै लें कहौ, पोखरी

पर भैंसी कें देखी आबै लें कहों, तें पूरा बात सुनै के जरूरतो नै..... ।”

“अच्छा, पढ़ना तें पढ़नै छै, जबें ई दुआरी पर आबी गेलों छै ।”
माँछो कां बड़ा विश्वास साथें कहलकै ।

“से तें ठिकके कहलौ । अच्छा छोड़ों, ई अच्छा करलौ कि तीन सेर वाला ई रेहू लानलौ । एकरा यांही राखी दौ, आरो सब बेची कें लौटों तें पैसा लै लियो ।लागै छै लौटे में हमरा बेर भै गेलै ।”

माँछो का बड़का मछली दुआरी पर राखी जाबें लागलै तें भैरो कापरीं फेनू टोकतें कहलकै, “जल्दिये लौटियो, ई मछली बनाना छौं तोहरे ।”

“ठीक छै” कही कें माँछो का आगू बढ़लै, तें रूपसावाली मछली उठाय कें ऐंगना में राखी ऐलै ।

ऊ दिन बण्टा कुछ उदासे-उदास रहलै । माँछो का के बात रही-रही कें ओकरा याद आबी जाय । दिन्हौं खाय वक्ती ऊ बहुते खुश नै दिखलै, नै तें थरिया पर मछली देखतहैं ओकरो चेहरा हजारी गेंदा नाँखी खिली उठै । मतरकि आय होनों कोनो बात नै छेलै । तहियो मछली तें मछलिये छेलै । खुश केना नै होतियै ।

तीन-तीन सेर वाला मछली भला की एक्के शाम खतम होय वाला छेलै । दिनको खाना में चार ठो खवैया ऐलों छै, तुनुक मिसिर, अंजनी शर्मा, दिलीप कर्ण आरो शरदेन्दु शेखर । कत्तें खैतियै । दुए परोसन में अघाय गेलै । भरी-भरी डब्बो सें कुट्टी आरो झोल गिरैलें छेलै इकबारगिये । रूपसावाली के हाथों के बनैलों के स्वाद अलगे मूँ मारी दै छै ।

हौ माहौली में कोय ई गमे नै पारलकै कि बण्टा के मूँ कुछकुछ मनझमान छै । साँझकियो वक्ती बण्टा के मूं बहुत खिललों-खिललों नै छेलै, खाय पर बस तीने आदमी तें बैठलों छेलै—भैरो कापरी, बिल्टा आरो बण्टा । रूपसावालीं आपने सें खाना परोसी रहलों छेलै । कि हठाते ओकरो नजर बण्टा पर पड़लै । आय मछली पर गुमसुम छै, कैन्हें—सोचतहैं पूछी बैठलै, “की बण्टू, मॉन तें ठीक छौं ?”

“एकदम ठीक छै ।” बण्टा मुस्कैतें बोललै, आरो झबझब कौर मुँहों में लिएँ लागलै ।

“काँटों-कूसों देखी कें बण्टू । होना कें आयको मछली में तें काठी हेनों काँटों छै, तहियो देखिये कें ।” भैरो कापरीं टोकलें छेलै ।

खैला-पीला रों बाद जबें खटिया पर बण्टा आरो बिलटा गेलै, तें ऊ दिन बिल्टा के पहिलें बंटाहै के नीन आवी गेलै, नै तें गपसप करते पहलें बिल्टाहे के नीन आवी जाय छेलै । बण्टा तें कुछ देर हेन्है उकुस-पुकुस करते रहै, तभिये ओकरा नीन आबै । बिल्टा के आचरजो होलै ।

हुन्नें बण्टा नीन में एक दूसरे लोक पहुँची गेलों छेलै, जहाँ नद्दी बहै छेलै । नद्दियो हेनों, जैमें घुटनौ सें बहुत नीचें पानी छेलै । नीचे के बालू साफ दिखाबै ।

बण्टा नद्दी किनारी खाड़ों होय के नद्दी सें कहलकै,

नद्दी नद्दी पानी दे,
नै तें मछली रानी दे ।

बण्टा के बात सुनी के नद्दी हुन्नें से जवाब देलकै,

कहाँ सें देभौ पानी के
चमचम मछली रानी के
आबें मेघ नै आबै छै
पानी नै बरसाबै छै
बादल के जाय विनती कर
नद्दी के पानी सें भर ।

नद्दी के बात सुनी के बण्टा आकाश दिश देखलकै आरो फेनू दोनों हाथ के हौले-हौले ऊपर-नीचे करे लागलै । हेना के करतैं ऊ आकाश दिश उड़ें लागलै । ऊपर, एकदम ऊपर कि उड़तें-उड़तें ऊ बादल लुग पहुँची गेलै आरो कहलकै,

बादल-बादल पानी दे
नै तें बिजली रानी दे ।

ओकरो बात सुनी के बादल बड़ी उदास होय गेलै । फेनू सोची के बोललै,

कहाँ सें देभौ पानी के
चमचम बिजली रानी के
जंगल नै तें छाया दै
खड़ा हुवै लें पाया दै
गरम हवा ठण्डै नै

बादल भी तें ऐतै नै ।

बादल के बात सुनी के ऊ वहाँ एक्को मिनट नै ठहरलै आरो पूरब दिश उड़ें लागलै । उड़तें-उड़तें एक जग्घों पर उतरी गेलै, जैठां कुछ गाछ खाड़ों छेलै । ऊ कटलों-छटलों जंगल छेलै । एक उचकवा पर खाड़ों होय के वें जंगल सें कहवों शुरु करलकै,

जंगल मेघ के छाया दें
खड़ा हुवै लें पाया दें ।

बण्टा देखलकै कि ओकरो बात सुनी के सब्भे गाछ एक्के साथ बोली उठलों छै,

कहाँ सें देबौ छाया के
खड़ा हुवै लें पाया के
जंगल तें सब कटी गेलौ
करखाना में बँटी गेलौ
गाछ लगाबें पहिलें जो
सब लोगों सें कहलें जो ।

गाछ-बिरिछ के बात सुनी के बण्टा वहाँ सें तुरत आपनों गामों दिश चली देलके । रास्ता में कबूतर, मैना, बगरो सब आपस में बतियावें लागलै,

बुतरु चललै गामे-गाम
गाछ लगैनें ठामे-ठाम

सपना में बण्टा यहू देखलकै कि ओकरो साथें आरो ढेरे बुतरु गामे गाम गाछ लगैबों करी रहलों छै । गाँव-गाँव गाछ-बिरिछ सें सुहावन हुएँ लागलै छै । जंगल देखी के बादल घुमड़ें लागलों छै । नद्दियो खल-खल करी के बहें लागलों छै । बण्टा साथें सब्भे बच्चा-बुतरु उछली-उछली के गीत गैलें जाय छै,

बुतरु जेन्हें जुटी गेलै
धरती वन सें पटी गेलै
जंगल-जंगल घूमी के
ऐलै बादल झूमी के
आरो नद्दी बहलै सब
सुख आबै-दुख सहलै सब ।

पता नै, कखनी तांय सपना में बण्टा खुशी मनैतें रहलै । कौन-कौन जंगल के बीच दौड़ लगैतें रहलै आरो नै जानौं, कौन-कौन नद्दी के खलखल धारा देखी ऐलै ।

जे भी हुएँ आरो जखनी ऊ भोरकी बेरा उठलै, ओकरो चेहरा एकदम खिललौं छेलै । उठहैं वै सरपट पोखरी दिश उड़ान दै देलकै । ओकरा विश्वासे नै होलौं छेलै कि वै राती जे सपना देखी रहलौं छेलै, हौ तें बस सपनाहै छेलै आरो यहू मानै लें तैयार नै छेलै कि सपनाहौ के बात कही सच्चो होय छै की !

मतरकि वैठां नै तें कोय जंगल छेलै, नै कोय नद्दी । बस चार-पाँच ठो बस वहें शीशम रौं गाछ आरो खदैया नाँखी पोखर । तहियो मरद भरी पानी तें वै में होभे करतै । बण्टा के मूँ सूखी कें टोय्यां होय गेलै ।

बण्टा कें पोखर सें बड़ी डोर लागै छै । वै आपनों आँखी सें घुंघरू कें पोखरी में डुबतें देखलें छै । केकरो बात नै मानी कें ऊ पोखरी में फुललौं कमलगट्टा कें तोड़ै लें होले-होले उतरलौं छेलै आरो हेनौं गोड़ ससरी गेलै कि चुभ सना डुबी गेलै । सब्भे चिल्लावें लागलै । लोग जुटलै । खूब खोजला पर घुंघरू मिलवो करलै, मतरकि बोली-बाजी सब बंद । घुंघरू के माय-बाप जे रं कानवों शुरु करलकै, कि मत पूछौं ।

ओकरो बाद बण्टा पोखरी, नदी पर गेवो करलौं तें दूरे सें सब कुछ देखलकौं । ओतहै दूरो सें कि कोय पीछू सें धकेलियो दें तें पोखरी आ नद्दी में नै गिरें ।

बण्टा पोखरी सें दूर एक टिल्ला पर खड़ा छेलै कि तखनिये बिल्टा वहाँ पहुँची गेलै आरो पीछू सें जोर सें बोली उठले—‘हुआ’ ।

बण्टा के सौंसे शरीर भौवाय उठलै । बिल्टा ठठाय कें हंसलै तें ओकरो जानौं में जान ऐलै ।

“की सोचलैं, भूत छेकै ?” बिल्टा हाँसतें-हांसतें बोललै ।

“हेनै करै के छेकै ? चल मौसा-मौसी के कही के मार खिलाय छियौ ।”

“मार तें तोहें खेबे आबें गुरु जी सें । नूनू, कल तोरों नाम लिखैलौ जैतौ । होय गेलौ तोरों टुकनी नाँखी दिन भर उड़तें रहवों ।”

“तोरा ई बात के कहलकौ ?”

“बस, समझें, जानी लेलियै । बाबू जी सरकारी इस्कूल के एक गुरु जी सें बात करी रहलौ छेलै । आरो गुरु जी सें बात करी रहलौ छेलै तें कथी लें करतें होतै, तोहीं समझें ।”

“अनुमान तें तोरों ठिक्के छौ, मतरकि हम्मं इस्कूल जैबै, तबें नी ।”

“इस्कूल नै जैबे नूनू, तें बाबू तोरा तोरों घोर भेजी देतौ । एक दिन माय बोली रहलौ छेलै, ‘बन्टा हेन्हें हट्टो-हट्टो करतें रहतै आरो पढ़तै-लिखतै नै, तें दीदी की सोचतै । नै पढ़ै तें दीदी लुग भेजिये देला में भलो छै । वहाँ तें मारो डरों सें पढ़ते, यहाँ तें डांटवो मुश्किल छै ।”

बिल्टा के बात सुनी के बण्टा हठाते एकदम उदास होय गेलै ।

“कैन्हें, की होय गेलौ तोरा ?” बिल्टा गंभीर होतें बोललै ।

“मतरकि हम्मं घरो नै जाय लें चाहै छियै ।”

“तें तोहें यहाँ इस्कूले गेलौ कर । अरे सब जग्घों के इस्कूल मास्टर एक्के रं थोड़े होय छै ।”

“की यहाँकरों गुरु जी चेला-चटिया के नै पीटै छै ?”

“कथी लें पीटतै । आबें बदमाशी करतै, तें पीटतै नै । मतरकि बिना बदमाशी के कैन्हें पीटतै ?”

बण्टा फेनू हठाते सार्चे-विचारें लागलै ।

“फेनू की सोचें लागलै ?”

“यहें कि हमरा इस्कूल जाना चाही ।”

“ठीक साचेले छैं । देखें, दिन भरी हम्मं इस्कूल में रहै छियै आरो तोहें हिन्नं-हुन्नं करतें रहै छैं । फालतुए नी । साँझे इस्कूली से लौटवे, तें दोनों खूब जमी के खेलवों-धुपवों । आरो तोहें आबें जत्तें जानै छैं, ओत्तें तें तोरों कलासी के कोय लड़का की जानें पारतै ।”

“अच्छा एक बात बताव बिल्टू । की तोरों इस्कूली में चटिया के गाछी सें बांधी के गुरु जी साटों सें पीटै छै ? मौगली बांध लगाय के

देह-हाथ फोड़ी दे छै ।”

“अरे नै रे, ई सब अंगरेजी स्कूल में नै होय छै ।”

“तें, ई सब सरकारी इस्कूले में कैन्हें होय छै बिल्टू ?”

“नै बतावें पारवौ । मतरकि इकबाल काकां बतैलें छेलै कि जे गुरुं लड़का कें पीटलकों, समझी लें कि वैमें जरूरे ज्ञान के कमी छै । आपनों कमजोरिये छिपाय लें गुरु जी चटिया कें डंगैलकों, नै तें जे गुरु जी ज्ञानी रहै छै, ऊ तें ज्ञान दे लें चटिया कें खोजलें फिरै छै ।”

“ई इकबाल काका के छेकै ?” बड़ी उत्सुकता सें बण्टा पूछलकै ।

“सरकारिये इस्कूल के गुरु जी छेकै ।”

“तबें तें हुनियो चेला कें डंगैतें होतै ?”

“आय तांय केकरो नै डंगैलें छै । हमरा सिनी पहिलें हुनकै सें पढ़ै छेलियै ।”

“सच ?” बड़ी आचरज सें बण्टां पूछलकै ।

“अरे, तें यै में झूठ बोलला सें कौन मिठाय मिलै वाला छै । सुन, तोरा तें इस्कूल जाना नै छौ, हम्में भागलियौ । ऐवौ, तें एकठो बात बतैवौ ।” ई कही कें बिल्टा सीधे घोर दिश दड़वनियाँ दे देलकै ।

बण्टा बड़ी देर तांय वहीं बैठलौ सोचतें रहलै । कभी बादल लेली, कभी मछली लेली, तें कभी इस्कूल के बारे में आरो कभी इकबाल काका के बारे में ।

यहू अलग सें दिमाग में चक्कर काटी रहलौ छेलै कि आखिर बिल्टू आवी कें की एक ठो बात बतैतै । मतर ओकरा की मालूम कि बिल्टू नें तें हेन्हें कें खाली कही देलें छेलै ।

फेनू मने-मन बोललै, “मौसा-मौसी बूझै छै कि हम्में पढ़ै-लिखै लें नै जानै छियै । मौसा कें की मालूम कि बिल्टू दां हमरा नवे महिना में अक्षर जोड़ी-जोड़ी कें कतें पढ़ै-लिखै लें सिखाय देलें छै । सिलोटी-काँपी पर नै, है एतें बड़ों धरती वाला सिलोटी पर, आरो पेन्सिल कथी के, तें मोटों रं सुखलौ छड़ी के । धरती पर गांधी-गांधी कें, बालू में अंगुरी सें अक्षर खींची-खींची वै ओनामासी धंग सिखलें छै आरो आबें तें चौथी कलास के किताबो पढ़ें सकै छियै ।...एक दिन जबें मौसा-मौसी ई सब जानतै, तें आचरज में खुशी सें पागल होय जैतै । मतरकि इखनी नै बताना छै ।

बिल्टुओ दा कें कही देलें छियै कि मौसी-मौसा कें नै बतावें । एक्के दिन सब ज्ञान खोली कें राखी देबै ।” एतना सोचतैं बण्टा के दिल-दिमाग गौरव सें गनगन करे लागलै । खुशी में वें वहे मोखलें छड़ी लै आनलकै आरो सौर करलें भुरभुरों जमीन पर यहाँ से वहाँ तक लिखना शुरु करलकै,

१. हम्में आपनों पढ़ाय आरो काम पूरा निष्ठा सें करवै आरो महान बनवै ।

२. आय सें हम्में, कम-से-कम दस अनपढ़ लोगों कें पढ़े लिखे लें सिखैबै ।

बण्टां दू के बाद तीन तें लिखलकै, मतरकि ओकरो बाद कुछ लिखलकै नै । अभी तांय ऐड़िया बल्लों ऊ जे उछली-उछली लिखलें जाय रहलें छेलै, रुकी गेलै आरो पालथी मारी सोचें लागलै, “अभी तांय यहे दू काम तें होलें छै । वें बिल्टू दा सें जे-जे सिखलकै, हौ सबटा, भोलू, गणेशी, मुकुटनाथ, गिदरा, अनारसी, अजनसिया, खोको, चम्मो, हिरदा, वैष्णव आरो गन्हौरी कें सिखलें छै । आबें ये सिनी हमरा सें दुए पैसा कम जानै छै । कल यहू सब महान बनतै, जेन्हों हम्में आपना लें सोचै छियै । मतरकि पहलें हमरा महान बनना छै ।” आरो फेनू छड़ी एक दिश राखी कें बण्टा बैठले-बैठले दोनों हाथों कें तीरतें पीछू तांय लै जैतें आपने-आप बोललै, “एत्तें बड़ों महान ।”

आरो ओकरो मॉन एकदम सें गनगनाय उठलै । जहें तेजी सें वें आपनों दोनों हाथ पीछू करलें छेलै, ओहें तेजी सें वें झबझब, सबटा लिखलें दोनों हाथों सें मेटाय कें, घोर दिश चिड़ियै नांखी फुर होय गेलै । घोर ऐलै तें आपनों वस्ता खोली कें एक कॉपी निकाललकै आरो ओकरा बीचे बीच खोललकै । बड़ी मनो सें अखबार के एक टुकड़ा, जे कॉपी के एक पन्ना सें साटी देलें गेलें छेलै, पर अंगुरी कें ऊपर सें नीचें तांय हौले-हौले लै जैतें मने-मन वाक्य सिनी पढ़तें गेलै, फेनू आँख मुनी कें सिहारतो गेलै ।

औंगरी कें ऊपर सें नीचें तांय लै जाय आरो आँख मुनी कें सिहारै में दस मिनिट सें कम नै लागलें होतै । एकरों बाद कॉपी कें बंद करी हेनो किसिम सें बस्ता में रखी देलकै, जेना कोय बूढ़ी-पुरानी जनानी रामायण कें पढ़ी ओकरा कपड़ा में लपेटी कें ताखै पर राखै छै ।

“इकबाल भाय, आबें तोहीं हमरों पगड़ी राखें पारें छौ । बण्टू के बारे में तोहें सब जानिये रहलौ छौ । तोरा सें कोय बात छिपलौ नै छै । दिन भरी हिन्न-हुन्न हट्टो-हट्टो करलें फुरै छै । कुछ डाँटो-डपटें नै पारें । जे सोची कें राखलें छेलियै, ऊ समझों एकदम गलत निकललै । पढ़ै-लिखै में जरियो टा मॉन नै लगाबै छै । ने मालूम, पोखरी पर जाय कें दिन भरी की करतें रहै छै । एक दिन हुन्न गेलों छेलियै, तें देखलियै कि चौरस जमीन पर यहाँ सें वहाँ कुछ-कुछ मेटैलों रेखा सिनी छै । की करतें होतै ? छड़ी या औंगुरी सें राकस सिनी के फोटू बनैतें होतै, आकि कौआ, मैना, गाछी के । मतरकि फोटू बनैला सें होय वाला छै की, जों अक्षर नै जानलकै, तें सब बेरथ । बदनामी जे माथा पर लिखना छै, से ऊ अलग ।...आबें तोहीं ओकरा समझाय बुझाय कें आपनों इस्कूली में नाम लिखी ला, तें ई चिन्ता दूर हुएँ । घरों में रूपसावाली ये बातों कें लै कें रोज माथों खैतें रहै छै, ओकरों सें छुटकारा मिलतों ।”

भैरो कापरी के बात सुनी कें इकबाल ठठाय पड़लै आरो मजाके-मजाक में कहलकै, “तें, आपनों बोझों हमरों माथा पर राखें लें चाहै छौ । की भैरो जी ।”

“आबें जे बूझों भाय ।” भैरों बड़ा टुटलों आवाजों में कहलकै ।

“चिन्ता करै के कोय बात नै भैरू, तोहें बण्टू कें कैन्हों कें हमरों घोर भेजी दियौ । सीधे इस्कूल भेजवौ तें ऐतों नै । हममें घरों में नै रहवै, तें इस्कूल आवी जैतै । खाली हाथों में कोय लिफाफा थमाय दै दियौ, हमरा दै दै लें । बस चार-पाँच बार हेन्हें करना छै । सब अपने आप ठीक होय जैतै ।”

आरो वहे होलौ छेलै । भैरो कापरी एक लिफाफा बण्टा कें थमैतें कहलें छेलै, “जो, इकबाल काका कें दै अइयें, घरों पर नै मिलौ, तें इस्कूलिये में जाय कें दै अइयें ।”

बण्टा कें जबें इकबाल के घरों पर गेलै आरो पता चललै कि हुनी घरों पर नै छै, इस्कूल में छै, तें ऊ सीधे इस्कूल पहुँची गेलै ।

इकबालें देखलकै, तें ओकरा कलास के आगू में बिठाय कें पढ़ावें लागलै, “कल तोरा सिनी जे खिस्सा सुनलें छेलौ, ओकरा सें ई तें मालूम

होय्ये गेलों होतों कि राजां चूँकि गलत समय में, गलत मांटी पर, ऊ सोना के गाछ लगैनें छेलै, यही लेँ गाछ मरी गेलै । आय तोरों सिनी केँ सम्मुख हम्में बारह बुझौव्वल राखवों, जे ज्यादा उत्तर देतै, यानी जौनें फस्ट करतै, ओकरा एक गाँधी जी के किताब पुरस्कार में मिलतै । ठीइइक । तें आबें बुझौव्वल सुनों,

काक फरै गुल्लर फरै...

ऊ बुझौव्वल इकबाल गुरु जी अभी पूरा करलो नै छेलै कि सब केँ ‘ठहरोँ ठहरोँ’ कहतें उत्तर दे सें रोकलकै आरो कहलकै, “सब आपनों-आपनों सिलोटी पर पहिलें सबटा बुझौव्वल लिखी लेँ, तबें नीचें में एकेक करी केँ ऊ सिनी के उत्तर लिखों आरो सिलोट हमरा लुग जमा करों । हम्में एकेक करी केँ देखभौं । समझलौ, तें लिखों, पहिलों लिखों,

काक फरै गुल्लर फरै, फरै बत्तीसो डार

चिड़ियां चुनमुन लटकी रहै, मानुख फोड़ी-फोड़ी खाय ।

दुसरोँ लिखों,

उजरी बिलाय, हरी पूँछ

नै जानै तें हमरा सें पूँछ ।

आबें तेसरोँ लिखों,

तीन रंग के तितली

हाथ धोय केँ निकली ।

चौथों लिखों,

एक चिड़ैया ऐंसनी खुट्टा पर बैसनी

पान खाय मुचुर-मुचुर से चिड़ैया कैसनी

होलौ तें, पाँचमों लिखों,

इती टा भाल मिया बड़के ठो पूँछ ।

आबें छठमों लिखों,

तनी टा छौड़ा जनम जहरी

तेकरा पिन्हला लाल घँघरी ।

आबें सातमों बुझौव्वल लिखों,

चाकरोँ-चाकरोँ पात तेकरोँ गदद लडुआ

जे नै बुझें ऊ नकचढुआ
 आठमों लिखों,
 हिलै नै डुलै बैठलों गिलै ।
 नौमों लिखों,
 बाप रहलै पेटों में बेटा गेलै गया ।
 होलौ ? तें दसमों लिखों,
 छेकां हम्मैं रात रों रानी
 लोर चुआबों कानी-कानी ।
 ग्यारमों छेकै,
 सब राजा रों अजगुत रानी
 दुमड़ी रस्ता सें पीयै पानी
 आरो बारहमो छेकों,
 नाथ नगर जात बरै दिग्धी में कुय्याँ
 दरियापुर में आग लगै खैरे में धुय्याँ ।

सब लड़का आपनों-आपनों सिलोटी पर तड़ातड़ लिखी लेलें छेलै,
 मजकि एक कोण्टा में बैठलों बण्टा खाली आगू-पीछू मूड़ी घुराय रहलों छेलै ।
 शुरु में वै, चाहलकै कि ओकरौ केन्हौं के कोय सिलोट मिली जाय, तें वहुँ
 ई सब लिखी लै, मजकि जबे हेनों नै होलै, तें ऊ आँख बन्द करी आपनों
 ध्यान इकबाल गुरु के बातों पर लगाय देलकै आरो हुनकों एकेक बुझौव्वल
 के मनो में बैठलें जाय रहलों छेलै आरो वही बीचों में ओकरों उत्तरो । जबे
 बारमों बुझौव्वल खतम होलै, तें एक दाफी ऊ फेनू उकुस-पुकुस करें
 लागलै । ओकरों आँख हौ लड़काहौ सिनी पर घुरी-फुरी के जाय, जे माथों
 पकड़ी-पकड़ी उत्तर सोचै में लीन छेलै, तें कभियो गुरुओ जी पर कि, सबसैं
 पहिलें ओकरै सें उत्तर पूछें । की होलै जे वै सिलोटी पर नहिये लिखलें छै ।

मतरकि गुरु जी के ध्यान तें सब लड़का सिनी पर छेलै ।

घण्टी खतम होय में आबें बीस मिनट बची गेलों छेलै । गुरु जीं
 सिलोट जमा करै के आदेश देलकै, ई देखी के सबसैं ज्यादा खुशी बण्टाहै के
 होलों छेलै ।

देखथैं-देखथैं गुरु जी के बगलों में सिलोट पर सिलोट जमा होय
 गेलै । सिलोट जमा करी के सब आपनों जग्घा पर बैठलों गलगुदुर करें

लागलों छेलै । हुन्नें गुरु जी सिलोट देखी-देखी आरो वें पर खल्ली सें सही-गलत के चेन्हों लगैतें, सिलोटी के उलटाय-उलटाय राखलें जाय रहलों छेलै ।

जबें सब सिलोट जाँचलों होय गेलै, तें बण्टा सें नै रहलों गेलै । ऊ बोली पड़लै, “हम्मूं बुझौव्वल के उत्तर दै लें चाहै छी । हमरौ सें पूछों ।”

गुरुवे जी के नै, सब लड़काहौ के ध्यान एकबारगिये बण्टा दिश चल्लों गेलै, जे खाली गुरुवे जी के देखी रहलों छेलै ।

“तोहें जवाब देबौ, तें ठीक छै, तोरों सें आखरी में एकेक करी के सब बुझौव्वल पूछवों । इखनी बैठों ।” इकबाल गुरु जी मुस्कैतें कहलकै ।

आपनों बात कहै लें जे बण्टा खाड़ों होय गेलों छेलै, बैठी रहलै । गुरु जी अब तांय सब सिलोट जाँची चुकलों छेलै आरो नाम पुकारी-पुकारी लड़का सिनी के सिलोट लौटाय देलकै । नम्बरो बोल्लों जाय रहलों छेलै—सितुआ—दू नम्बर, चांदो—एक नम्बर, अखिलेश—सुन्ना, किसुन—दू नम्बर, फागो—दू नम्बर.....क्लास के तीसो लड़का के नम्बर आरो सिलोट लौटैला के बाद गुरु जी फेनू एक लड़का सें सिलोट लै के बण्टा दिश होतें कहलकै, “अच्छा तोरा से पूछै छियों, एकेक करी के जवाब देलें जय्यो; जेकरों नै जानों, तें कहियौ ‘नै’ ।”

सब लड़का आचरज में डूबी गेलै, जबें बण्टा पहले बुझौव्वल के सही-सही उत्तर में बोललै, “एकरों उत्तर छेकै सुपारी ।” तीसो लड़का में से एक्को टा एकरों उत्तरे नै लिखलें छेलै ।

गुरु जी के चेहरा पर चमक आवी गेलै आरो क्लास भरी में एक चुप्पी । वैठां खाली गुरु जी के रही-रही के बुझौव्वल गूंजी रहलों छेलै आरो बण्टा के खटा-खट करी के एक-एक बुझौव्वल ठीक-ठीक उत्तर—मूरय, सिंघाड़ा, जाँतों, सूई-धागा, मिरचाय, ताड़, कोठी, आगिन आरो धुआँ, मोमबत्ती, दीया, हुक्का ।

रहलों नै गेलै तें इकबाल गुरु जी कोण्टा तक बढ़ी के बण्टा के गोदी में उठाय लेलकै आरो पीठ थपथपैतें बोललै, “एक दिन नूनू तोहें बहुत बड़ों आदमी बनवौ, हमरों बात खाली नै जावें पारें ।”

ई तें नै कहलों जावें पारें कि गुरु जी के ई बात आरो बण्टा के हौ सबटा उत्तर देबों—सब बच्चा के अच्छे लागलै, मतरकि कुछ लड़का स्कूल

खत्म होला के बाद ओकरो पीछू लागी गेलों छेलै आरो वहेँ दिन ऊ दसो लड़का ओकरो लंगोटिया दोस्त बनी गेलै। यही तांय नै, दसो बण्टा के ओकरो घोर तांय छोड़े लें ऐलों छेलै । ऊ दिन हौ सब के लौटै वक्ती बण्टाहौ, होन्है सब के द्वार के बाहर सड़क तांय छोड़लकै, जेना बाहर सेँ ऐलै कोय आत्मीय पोर-परिजन केँ घरों के लोग बस्ती तांय आवी केँ छोड़े छै ।

दोसरों दिन भैरो कापरी केँ इकबाल गुरु जी तांय बण्टा केँ भेजै के कोय उपाय नै ढूँढ़े लें लागलै । बण्टा आपन्हें स्लेट-कॉपी बस्ता में लैकेँ इस्कूल जाय लें तैयार छेलै । ओकरा एकरों फिकिर नै छेलै कि वै इस्कूली में आकरों नाम नै छै । एकरा सेँ की होय छै, इकबाल गुरु जी कल कहलें तें छेलै, “तोहें रोज आवी गेलों करों । तोरा हम्मं पढ़ैभौं ।” बण्टा मनेमन सोचलकै आरो मने मन कहलकै, “बस काफी छै ।”

ऊ दिन ढेर समय तक पोखरी हिन्नें नै पड़लों रहलों छेलै । बिल्टे साथें वहुँ मूँ-हाथ धोलों छेलै, नहैलें छेलै, इस्कूल जाय लें कपड़ा पिन्हलें छेलै । बिल्टा नांखी बण्टा इस्कूल ड्रेस तें नै पिन्हलें छेलै, मजकि साफ-साफ पैंट आरो कमीज पहनी केँ वै बस्ता केँ कांखी में जखनी दबाय लेलकै, तें ओकरो गदगदी के कोय ठिकानों नै रहलै ।

बिल्टा दुआरी सेँ निकललहैं बारी-बारी सेँ हाथ डुलाय-डुलाय केँ माय-बाबू केँ ‘बाय मम्मी, बाय पापा’ कहलकै, तें माय के चेहरा पर खुशी दौड़ी गेलै ।

बण्टो के मॉन होलै कि वहुँ होने करै, मजकि वै चाहियो केँ हेनों नै करेँ पारलकै । बिल्टा इस्कूली के रिक्सा पर बैठी चुकलों छेलै आरो बण्टा के नया दोस्त सिनी सड़के सेँ हुलुक-पुलुक करी रहलों छेलै कि बण्टा जल्दी सेँ निकलौक । बण्टा के नजर आपनों दोस्त सिनी पर पड़लै, तें ऊ मौसी-मौसी लुग ऐलै आरो काँखी के बस्ता नीचेँ राखी केँ दोनों के गोड़ छुवी-छुवी आपनों हाथों केँ माथा सेँ लगाय लेलकै ।

पता नै की होलै कि रूपसा वाली के सौंसे देह जेना बरफ बनी केँ पिघली उठलै । झुकी केँ गल्ला सें लगाय लेलकै, तें आंखो लोराय गेलै । याद ऐलै कि रूपसा में हेनै केँ इस्कूल जाय वक्ती हमरौ सिनी माय-बाबू के गोड़ छुविये केँ इस्कूल जाय छेलियै ।

भैरो कापरी केँ तें लागलै, जेना वै सब कुछ पावी लेलें रहें । बोललै कुछ नै । बस मनेमन सुख लेतें रहलै । आँख एक क्षण लेली आपने आप बन्द होय गेलै । खुललै, तें देखलकै, बण्टा आपनों साथी-संगी साथें हँसलौ-कुदलौ इस्कूल दिश चल्लौ जाय रहलौ छै । घुमी केँ रूपसा वाली सें कहलकै, “आबें की; बस समझौ कि पठार पर मलदैया आमों के गाछ फरै वाला छौं । घोरै की, टोला-गाँव जखनी गमकतै, तखनी देखियौ ।”

दोनों के मॉन हेनौ जुड़ाय गेलै कि कुछ बोलनाहौ मुश्किल छेलै ।

घोषणा मोताबिक बण्टा केँ सब लड़का के बीचों में “गांधी जी के आत्मकथा’ किताब देलौ गेलौ । किताब देलकै इकबाल गुरु जी, आपनों हाथों सें । सब लड़का ये पर ताली बजैलें छेलै आरो बण्टा के दस ठो खासम खास दोस्तें तें जरूरत सें ज्यादा देर तांय मुड़ी झुकाय केँ ताली पीटतें रहलौ छेलै ।

रुकलौ छेलै तब्बै, जबें गुरु जीं रुकै लें कहलकै । ऊ दिन सें तें बण्टा आपनों किलासों के मुनीटरे बनी गेलै ।

कोय लड़का केँ कुछ काम करना रहै, तें ओकरा जरुरे पूछै, यहाँ तांय कि कोय कठिन सवालो के उत्तर पहिलें वै बण्टाहै सें पूछै ।

जों बण्टा ऊ सवालौ के उत्तर नै जानै आरो कहै कि हम्में नै जानै छी, तें पुछवैय्या केँ कम्मे विश्वास हुऐ कि वै नै जानै छै । सोचै, इखनी नै बताय लें नै चाहै छै, दुसरोँ दिन बताय देतै । आरो ठिक्के में बण्टा ऊ सवालौ के जवाब दूसरोँ दिन जरुरे बताय दै । हुऐ है कि, जबें ऊ घोर लौटै, तें रात में खाय वक्ती मौसा सें हौ सिनी सवाल के उत्तर पूछै, जे इस्कूली में

ओकरोँ दोस्तेँ पूछलेँ छेले ।

यहू नै हुऐ कि इस्कूल जैतेँ, सीधे उत्तर बताय दे । हौ लड़का के दू-तीन दाफी पूछले पर बताबै—कुछ हेनोँ भाव सेँ कि ई सवाल के उत्तर तेँ पहिलेँ सेँ वेँ जानै छेले, मजकि कल मूड नै छेले, येँ लेली नै बतैलकै । एकरा सेँ बण्टा के ज्ञान के धाक भले इस्कूली में जमेँ लागलोँ छेले, मजकि ओकरा हौ सब के उत्तर जानै लेँ मेहनतो खूब करै लेँ पड़े । खेल-कूद सेँ धीरेँ-धीरेँ ओकरोँ साथ छूटेँ लागलोँ छेले ।

हौ दिन इस्कूल सेँ लौटला पर वेँ बड़ी हुलासोँ सेँ पहिलेँ मौसी केँ फेनू सँझकी मौसाहौ केँ ऊ किताब दिखैनेँ छेले आरो वहेँ दिन किताब के कतेँ नी पन्ना पीछुवे दिश सेँ पढ़ी गेलोँ छेले ।

पढ़तेँ-पढ़तेँ ऊ सहसा चौकी उठले । किताब के लेन्हैँ ऊ बस्ता दिश दौड़ले आरो कॉपी के बीच में राखलोँ वहेँ अखबार के टुकड़ा पर अंगुरी बढ़ाय-बढ़ाय केँ मनेमन पढ़लकै ।

ओकरोँ चेहरा पर आचरज के भाव उड़ी रहलोँ छेले । वेँ कभियो कॉपी के बीच पन्ना केँ पढ़ै, कभियो गांधी जी के आत्मकथा केँ । फेनू की होले कि हो पोथी के बीचोँ में राखलोँ अखबार के टुकड़ा केँ ‘गांधी जी के आत्मकथा’ वाला किताबोँ के बीचोँ में हिफाजतोँ सेँ राखी देलकै आरो किताब बन्द करी ताखा पर होने के राखी देलकै ।

वेँ माय केँ देखतेँ ऐलोँ छेले—रामायन केँ हेन्हैँ सहेजी ताखा पर राखतेँ ।

छुट्टी के दिन छेले आरो हवो हौल्कोँ-हौल्कोँ ठहार बुझावेँ लागलोँ छेले । बण्टा साथेँ दसो दोस्त के योजना शनिचरे केँ तै होय गेलोँ छेले कि पोखरी पर पिकनिक मनैलोँ जाय । योजना यहू बनले कि पांडे का के फुलवारी में घुसी केँ कबरंगा तोड़लोँ जाय ।

पहलेँ तेँ बण्टा चोरी-चपारी सेँ साफ मुकरी गेले । कहलकै, ‘हे सब

कामों में हममें तोरा सिनी के साथ नै देबौं, आरो नै कहबौं—हेनों करै लें । जों कि पकड़ाय भै गेलौं तें देह-हाथ के भरता निकली जैतौं । घरों में धुनाठन पड़तौं—से तें अलगे ।”

बण्टा के हठातें जमुआर गुरु जी के मार याद आवी गेलौं छेलै ।

“तोहें बेकारे डरै छैं, पांडेका तें आपनों फुलवारी कभियो नै आवै छै । बस एकठो बूढ़ों रं जोगवारों फुलवारी जोगै छै । वहू में ओकरा सुझवो करै छै कम । आबें जों तोरा एत्तै डोर लागै छी, तें तोहें बाहरे रहियें । हमरै सिनी भीतर घुसबै । कबरंगा तोरो वास्तें बाहर फेकी देबौ ।”

बार-बार कबरंगा के नाम सुनी बण्टाहौं चुप्पी लगाय देलकै । सोचलकै, “हरजे की छै । धरैतै तें यहें सब, नै धरैतें तें बांट-चूट तें बराबरे होतै ।”

“सोचै की छैं” मीरवां टन सना बोललै, “जानै छिये कि तोरों रं डरपोक दीवाल फानै नै पारें । खैर, तोहें एक काम कर—तोरा बाहरे सें गाछी पर खाली डेपों मारतें रहना छी, कभी सामना सें, कभियो पीछू सें, कभी दायां दीवाली दिश सें, आरो कभियो बायां दीवाली दिशों सें । जोगवारों के तें ठीक सें सूझै नै छै । गाछी पर डेपों के आवाज सुनी जबें ऊ बायां दीवाल दिश दौड़तै, तें हमरा सिनी बायां दीवाली पर चढ़ी गाछी के कबरंगा तोड़बै; बायां दिश दौड़तै तें दायां दिश के तोड़बै; हिन्नं दौड़तै, तें हुन्नं सें तोड़बै आरो हुन्नं दौड़तै, तें हमरा सिनी हिन्नं सें तोड़बै । की समझलें ।”

“समझी गेलियै ।” योजना सुनी के बण्टा के हँसी आवी गेलै आरु ऊ सिनी मूं पर हाथ राखी खिलखिलाय पड़लै । हँसै वक्ती सिपकियो भर नै आवाज निकलै लें देलकै कि काँही जोगवारो नै आवाज सुनी लें । लड़का के आवाज सुनलें सावधान होय जाय छै, आँख के कमजोर रहला सें की, कान के बड़्डी पातरों छै ।

“तें, चल शुरु ।” बण्टा कहलकै ।

कमाण्डर के इशारा भर होना छेलै कि दसो लड़का दीवाली सें सटलों-सटलों फुलवारी के पिछुलका दिश चल्लों गेलै आरो हिन्नं बण्टा दोनों जेबी में आठ, दस छोटों-छोटों डेपों भरी के फुलवारी के बाहर वाला एक ठुट्ठा गाछी पर बैठी रहलै । कथी के गाछ छेलै, पता नै, मतरकि छेलै बड़ी मजबूत । से बण्टा गाछी के ओतै फुनगी तक पहुँची गेलै, जहाँ सें फुलवारी

के पछिया दीवारी के पिछुलका भाग दिखावें पारें । बण्टां देखलकै कि तीन लड़का दीवारी पर चढ़ै में लागलौं छै । पहिलें दीवारी पर छः पंजा दिखलैलै, फेनू तीन-तीन टांग आरो देखतहैं-देखतहैं तीन लड़का दीवारी पर छेलै । फेनू की छेलै, बण्टा पूवारी ओर के गाछ सिनी पर ढेपों कस्सी कें मारलकै । पत्ता पर खर-खर के आवाज होलै आरो फेनू एक्के साथ ढेपों साथें कोय आरो चीज भद सें गिरलै ।

जोगवारों, जे चुपचाप खटिया पर बैठलौं खैनी रगड़बो करी रहलौं छेलै, आवाज सुनतहैं झट सना खैनी मुँहों में राखलकै आरो, “हो, हो, के छेकें रे, के छेकें रे, के कबरंगा तोड़ी रहलौं छें रे, ओकरो टांग तोड़ी देबौ रे” कहतें-कहतें आवाजे दिश दौड़लै ।

जोगवारों कें दौड़तें देखलकै, तें बण्टा आरो ढेपों नै फेकलकै । जोगवारों पूवारी दिश आवी कें बायां कान के भुरकी में बायां हाथ के अंगूठा घुसैलकै आरो आवाज के दिशा पहचानै के कोशिश करलकै । ई जानी कें कि आवाज पछिया दीवारी दिश सें आवी रहलौं छै, ऊ एक बड़का साटों उठलें वहे दिश दौड़ी पड़लै, ई कहतें कि, “ठहर कबरंगा तोड़ै छें, तोरों अभी टांग तोड़ै छियौ ।”

जोगवारों ई किसिम सें दौड़लौं छेलै कि दीवाली पर खाड़ों तीनो लड़का धप-धप करी कें बाहर कुदी गेलै । बची गेलै भीतर में रमखेलिया, जे गिरलौं कबरंगा चुनै लें भीतर घुसी गेलौं छेलै । भीतर घुसै के मनसुआ देलें छेलै शेखरें । से ऊ सबसे ज्यादा चिन्तित छेलै कि केना ओकरा बाहर करलौं जाय ।

“रमखेलिया जरूर कोय गाछी के पीछू में खाड़ों होतै आरो जोगवारों सें बचै के कोशिश करतें होतै ।”

“जों कजायत रमखेलिया पकड़ाय गेलै, तबें ?” मीरकां चिन्ता जाहिर करलकै ।

“तबें तें हमरा सिनी के बदला वहीं बेचारा मार खैतै ।” अंजुम बोललै ।

“मार खाय के चिन्ता नै छै” तखनिये पीछू सें आवी बण्टा कहलकै, “चिन्ता तें एकरों छै कि जों रमखेलिया पकड़ाय छै, तबें वैं एकेक धौल पर एक-एक के नाम बोलतै कि के, के कबरंगा तोड़ै में छेलै, जेना बिज्जी के डांग

पर गदहीं हीरा, मोती, हागै छेलै ।”

“आरू समय रहतियै, तें बिज्जी-गधी बातों पर बण्टा खूब हँसतियै, मतरकि ऊ कटियो टा नै हँसलै ।

“से तें तोहें एकदम ठीक कहलैं बण्टा, तबें की करलौं जाय ?” शेखर बोललै । सब के आँखी में डोर काँपें लागलौं छेलै ।

“देखें, आबें एक्के उपाय छै । हममें दक्खिन दिश सें गाछी पर ढेपों चलाय छियौ; आरो जोगवारों जेन्हें दक्खिन के दीवाली दिश जाव; तोरा में सें कोय दीवाली पर चढ़ी रमोखिलया के हाथ पकड़ी कें खीची लियैं ।”

“ठीक छै ।” अंजुम बोललै

आरो योजना मोताबिक बण्टा दक्खिन दीवाली दिश पहुँची गेलै आरो जेन्हें देखलकै कि अंजुम दीवाली पर चढ़लौं होलौं छै, वैं हुन्नें सें नगीच वाला गाछी पर ढेपों चलाना शुरू करी देलकै । दक्खिन दिश गाछी पर ढेपों चलतैं जोगवारों वहे दिश साटों लै कें दौड़लै आरो हिन्नें, झुकी कें अंजुम रमखेलिया कें घीचें लागलै । मतरकि दुर्भाग्य हेनौं होलै कि रमखेलिया कें अंजुम की घीचतै, रमखेलिया छेवै करलै एतें घुमाँटों कि अंजुमे फुलवारी दिश खिंचाय गेलै ।

खूब जोरों सें धम्म के आवाज भेलै, तें दक्खिन दिश छोड़ी कें जोगवारों पछिया दिश दौड़लै । आरो एकरों पहिले कि ऊ दोनों फेनू दीवारी पर चढ़ै के कोशिश करतियै, जोगवारों ओकरों सामना में जमराज नाँखी खाड़ों भै गेलै ।

ओकरों हाथों में मोटों साटों देखी कें दोनों के सिट्टी-पिट्टी गुम छेलै । अभी वैं साटों उठैबे करतियै कि फुरती सें रमखेलियां जोगवारों कें हेनौं लंग्घी मारलकै कि ऊ सीधे लद सें जमीन पर चित्त गिरी पड़लै । हाथों के साटों छिटकी कें दूर गिरी गेलै । आरो ई सब देखै कें पहिलैं अंजुम आरो रमखेलिया सीधे दीवाली सें सटलौं गाछी दिश भागलै । जानें कहाँ सें ऊ फुरती आवी गेलौं छेलै कि दनादन बन्दर नांखी ठाहुर पकड़ी दोनों गाछी पर चढ़ी गेलै आरो फेनू दीवारी पर खड़ा होय कें सीधे हौ पार हुनमान कूद लगाय देलकै । हौ दोनों के बाहर निकलना छेलै कि सब एक्के दाफी सबौरों दिश दरबनिया लगाय देलकै । कन्नें कबरंगा गिरलै, के कर्तें लेलकै, केकरों होश ने छेलै । के आगू रहलै, के एकदम पीछू ? एकरों होश नै ।

हुन्नें जोगवारों ताड़ गाछी के पकलों ताड़ नाँखी भद सना जे गिरलै, तें पाँच मिनिट बादे उठलै । उठलै तें चारो दिश देखलकै । तब तांय तें सब फुरपार छेलै । ऊ थोड़ों नेंगचैतें-नेंगचैतें आपनों खटिया ओर बढ़लै आरो वहीं पर बैठतें बड़बड़ावें लागलै, “अच्छा बरगाहो सांय सिनी, कोय दिन हम्मू पकड़ी के कचूमर नै निकाललियौ, तें हमरों नाम बगोछों महतो नै ।”

“बण्टा अंजुम, रमखेली, शेखर, मीरका, शेखावत, घोल्टू, सोराजी, अठोंगर, बमबम, सब खड़ा हो जा ।” हाजरी लेला के बाद इकबाल गुरु जी फेनू ग्यारहो के खड़ा करी देलकै ।

आरो सब लड़का ई देखी के सन्न छेलै । खास करी के ई देखी के कि आय बण्टाहौ के गुरु जी खाड़ों करलें छेलै । सब के नजर कभी गुरु जी दिश जाय, कभी बण्टा दिश ।

“तोरो सिनी के चोरी कल हम्मं आपनों आँखी सें देखलें छियौं, आपनों खेतों के मचानी सें । तोरा सिनी की बुझलौ, कि मचान खाली छै । हम्मं सुतलों-सुतलों तोरो सिनी के सब तमाशा देखी रहलौं छेलियौं । आबें यहे में भलाय छौं कि दसो डाँड़ों बल्लों पर झुकी के खाड़ों होय जा ।”

इकबाल गुरु जी के आदेश होतैं दसो डाँड़ों बल्लों पर कमर के सीधा करी खाड़ों होय गेलै । कमर भारों पर सौंसे देह । कुछुवे घंटा में सब डगमग करें लागलै, तें गुरु जी के भीतरे-भीतर दया लागें लागलै । सोचलकै, “हेना के तें सबके ठेहुना, जांघ धरी लेते । ई सजा ठीक नै ।”

सोचतैं कहलकै, “ठीक छै, सब सोझों होय जा । आरो कैन्हें कि ई दसो के मुखिया बण्टा छेकै, यै लेली जों बण्टा हमरों सवाल्लों के उत्तर दै दें, तें सबक सजा माफ । जो उत्तर नै दिऐ पारतै, तें होने के सबके खाड़ों करबौं ।

गुरु जी के बात सुनतैं दसो ठो सोझों होय गेलै आरो सवाल के प्रतीक्षा में गुरु जी के मूं देखें लागलै । एक क्षण चुप्पी साधला के बाद गुरु

जी कहलकै, “तोरा सिनी फल के चोरी करी रहलौं छेलौ, यै लेली बण्टा कें तीस ताजा फल आरो दस सुक्खा फल के नाम लै लें लागतै, नै तें दसो के सजा फेनू पहलके वाला मिलतै ।”

तीस ताजा फल आरो दस सुक्खा फल, बाप रे बाप, एत्तें नाम के बताबें पारतै—क्लास भरी के दिमाग सुनतहैं सन्न छेलै आरो खास करी कें बण्टा छोड़ी कें दसो ठो के मूं एकदम झमान कि आबें फेनू वहे रं खाड़ों होनाहै छै ।

मतरकि गुरु जी के सवाल सुनतहैं बण्टा के दिमाग आटा-चक्की नाँखी हन-हन चलें लागलौं छेलै । ठीक-ठीक मने-मन हिसाब लगाय कें वें अंगुली के पोरों पर गिनाना शुरु करलकै, “ताजा फलों में छेकै—अमरुद, अनानास, अनार, अंगूर, आम, केला, ककड़ी, कटहल, खिरनी, खीरा, खजूर, खरबूजा, गुलाब जामुन, जामुन, तरबुज, नींबू, जमेरी नींबू, नासपाती, पपीता, फलसा, बेल, बैर, लीची, सपाटू, शरीफा, शहतूत, सन्तरा, सेव, सिंघाड़ा आरो कबरंगा ।”

कबरंगा के नाम सुनतहैं बण्टा रों नवो खासम खास दोस्त के देह काँपी गेलै । सोचलकै, यें कबरंगा के नाम गिनाय कें नाश करलकै । गुरु जी के गोस्सा बढ़तै । मतरकि है नै होलौं छेलै । हेकरो बदला सब के आँखी में चमक छेलै । गुरुवे जी नै, क्लास के सब लड़को दोनों हाथों के अंगुली के पोरों पर बुढ़बा अंगुली कें फिराय-फिराय संख्या गिनवो करी रहलौं छेलै । तीस सें एक ज्यादाहै, पूरे एकतीस ताजा फलों के नाम बण्टा गिनैलै छेलै ।

फेनू वें गुरु जी दिश देखतहैं कहलें छेलै, “आबें सुक्खा फल में प्रमुख छेकै—अखरोट, अंजीर, काजू, चिरौंजी, चिलगोचा, नारियल, पिशता, कागजी बादाम, चिनिया बादाम, किशमिश आरो खूबानी ।”

किलास भरी के आँख फटलों के फटलों रही गेलै आरो इकबाल गुरु जी तें एकदम दंग । हेनों विलक्षण चटिया आय तक हुनका नै मिललौं छेलै । बण्टा के पीठ थपथपैतें हुनी गदगद भाव सें बोललै, “बण्टू, खूबानी के खाली नामे सुनलें छैं कि खैलौं छैं ।”

“खैलें छियै गुरु जी, फल के ऊपरलका सुखलों भाग खाय में मीटूँ लागै छै । फल के भीतर में बादाम नाँखी गुठली होय छै आरो गुठली में गिरी रहै छै, जे खाय में बादामें रं स्वादिष्ट होय छै । हम्में यहू जानै छियै

कि ई फल खाली उत्तर प्रदेश के ठंडे क्षेत्र में होलौं ।”

“आरो चिलगोजा ?” गुरु जी के कण्ठों से हठाते ई सवाल निकली गेलै, तें बण्टाहौ रुकलै नै । कहलकै, “चिलगोजा, भारत केरौ फॉल नै छेकै, अफगानिस्तान दिश होय छै । ई कच्चो आरो भुजियो के खेलौं जाय छै ।”

“आचरज, घोर आचरज” इकबाल गुरु जी के मॉन बोललै, “ई कोय सामान्य बच्चा हुऐ नै पारौं ।”

क्लास केरौ ई घटना के एक अलगे असर बच्चा सिनी के दिमाग पर होलै । खाली दूसरे सिनी बच्चा पर नै, बण्टा के मंडलियो में कुछ के यहे विश्वास हुऐ लागलै कि ओकरा जरूरे कोय जिन, भूत से दोस्ती छै, जे बण्टा के भीतरे-भीतर मदद करै छै ।

ई बात तखनी कोय बोललै तें नै, केन्हें कि दसो वास्तें यहे बहुत बड़ौ बात छेलै कि बण्टा के बुद्धिये कारण सब्हे मार आरो सजा से बची गेलौं छेलै । मजकि भूत आरो जिनवाला बात नै तें अंजुम, शेखर, रामखेली, मीरका, बिहारी, शेखावत के मनौं से गेलै, नै तें घोल्टू, सोराजी, अठोंगर आरो बमबम के । असल में ई बात वही क्लासों के एक कोना से उड़लौं छेलै आरो क्लास भरी के माथा पर हठाते बैठी गेलै । मतरकि बोलै कोय कुछुवो नै ।

आखिर बोलतियै की ? बण्टा के हाव-भाव कुछ हेनौं छेवे नै करलै । मजकि शेखावत हे केन्हौं के मानै ले तैयार नै छेलै के बण्टा के वशों में जिन्न आकि भूत नै छै, वै कहै, “देखें रमखेलिया, जेकरौ वशों में भूत आकि जिन्न हुऐ छै, ऊ भूत-जिन्न नाँखी थोड़े दिखावै छै, आकि कुछ काम करै छै; काम तें करै छै जिन्न, भूत । देखलें नै, बण्टा ऊ दिन केना सब बुझौवल के मानें फटाफट बताय देलकै आरो पाँच रोज पहिलें ओत्ते-ओत्ते फलों के नाम केना बताय देलकै । अरे जिन आवी के ओकरौ कानों में बोललौं गेलौं होतै, आरो बण्टा तहीं से ओत्ते-ओत्ते नाम बोलै पारलै ।”

“अच्छा है बात, हममें ओकरा पूछयै ।” रमखेलिया गंभीर होतें बोललै ।

“पुछबो नै करियें, कहीं जिन, भूत कें हमरा सिनी के पीछू लगाय देलकौ, तें बुझी ले ।”

दोनों चुप भै गेलै ।

मतरकि फलवाला घटना सें बण्टा के आदर लड़का सिनी के बीच आरो बढी गेलों छेलै । आबें वैं आपनों मंडली के दसे लड़का कें की, कलासों के कोय्यो विद्यार्थी कें कुछुवो बोली दै, तें वैं बण्टा के बात कें नकारै नै, ऊ जेना हुएँ करी दै, नहियो मॉन रहै, तहियो ।

शुरु-शुरु में तें बण्टो कें हठाते ई बढलों आवभगत के कुछ मानी नै बुझैलै, मतरकि धीरें-धीरें एकरों भेद खुलें लागलै, जबें एक दिन अंजुमें ओकरा सें कहलकै, “किलासों के कुछ लड़का ई मानै छै कि बण्टा के वशों में जिन आकि भूत छै, जेकरा सें वै जखनी चाहै छै, पूछी कें उत्तर बताय दै छै, नै तें ओतें-ओतें बुझौव्वल आरो फलों के नाम केना बताय देलकै ।”

बण्टा बड़ी मनो सें अंजुम के बात सुनलकै आरो फेनू बोललै, “ई बात आबें केकरो नै मालूम होना चाही, नै तें सब हमरा सें डरतै ।”

बण्टा ई बात कें हौ किसिम सें कहलें छेलै कि ई बात सच्चे रहें । जे जानी लेलकै, जानी लेलकै, आबें कोय नै जानें । कम-से-कम अंजुम यहें अर्थ बुझैलकै ।

“अजी सुनै छों ।” रुपसावालीं एंगन्हें सें बराण्डा पर बैठलों भैरो कापरी सें कहलकै ।

“की बात छेकै ।” भैरो नगीच ऐतें पूछलकै ।

“बण्टू इस्कूली के बाद कहाँ जाय छै, केकरा-केकरा कन जाय छै कौन घाट-कुघाट, एकरों खयाल राखै छौ की नै ?”

“तोहें तें हेनो बोलै छौ, जेना ऊ टुअर रहें आरो ओकरो देखभाल

रहबे नै करें ।”

“ओह, तोहें हमरों कहै के मतलब नै बुझी रहलौ छौ ।”

“खूब बुझी रहलौ छियै बिल्टू-माय । तोहें यहें नी कहै लें चाहै छौ कि आयकल ऊ केकरा-तेकरा कन नी बैठलौ फुरै छै, यही नी ?”

“खाली यहें बात रहतियै तें चलौ कुछु बात नै छेलै । जबें बिल्टू साथ में रहै छेलै, तबें तें कोय बाते नै छेलै । आबें बिल्टुओ बड़ों पढ़ाय लें भागलपुर चल्लौ गेलै । की करतै, बंटुओ कें मॉन नै लागै छै तें हिन्नै-हुन्नै घाट-कुघाट भेलौ फुरै छै ।

“ई तोहें घाट-कुघाट की बार-बार बोली रहलौ छौ ?”

“आबें तोरा की बतैय्यौं कि मुहल्ला-टोला में बण्टू बारे में ई केन्हों कनफुसकी सुनै छियै कि वैं कोय भूत के सिद्धि करी लेलें छै । भला एतना टा बच्चा, आबें तोंही कहौ, जे उमिर भूत-जिन सें डरै के छेकै, ऊ सिद्धि की करतै ।”

“बिल्टू-माय, कहावत छै कि रुपसा गाँव के बिल्लियो पढ़लौ-लिखलौ होय छै; तोहें केना बची गेलौ ।”

“की तोहें कहै लें चाहै छौ ।” रुपसावाली चिढ़तें बोली उठलै तें भाव कें भाँपतें हुँ भैरो कापरी तुरत आपनौं बातों में आरो बात मिलैतें कहलकै, “होना कें तें हम्मू ई बात सुनलें छियै, मतरकि अब तांय ई बात कें हम्मैं अनठियाय रहलौ छेलियै । लागै छै, जरूर बण्टा कोय फकीर, या तांत्रिक सें हेनौं मंत्र पावी लेलें छै, जेकरों बल्लों पर वैं गजब के कारगुजारी करी रहलौ छै, आयकल ।”

“अरे यहें तें हम्मू कहै लें चाहै छेलियौं । गोस्साबों नै, तें एकटा बात कहै छियौं—डेढ़ दू महीना सें बण्टु के रंग-ढंग कुछु बदललौ-बदललौ देखै छियै । देर रात तांय की-की लालटेन के रोशनी में निरयासी-निरयासी पढ़तें-घोकतें रहै छै, नै कहें पारियौं । इस्कूली के पाठ होतियै, तें सुनाय-सुनाय कें पढ़तियै, मजकि मनेमन पढ़ै के की मतलब ! जेना मंतर जपतें रहें ।”

“हम्मू महीना भरी सें बंटू के ई रंग-ढंग देखी रहलौ छियै । मतरकि घबड़ावों नै बिल्टू-माय, ऊ भूत सिनी के बारे में हम्मू जानै के कोशिश करी रहलौ छियै । जे पता लागलौ छै, वै में तें एक जिन्न छेकै, बाकी सब प्रेत । ई प्रेत कतना छै, से नै कहें पारौं । तीन-चार प्रेत के पता करनैं छियै । ई

प्रेत सिनी आपनों मशानों से केन्हों के नै हटै छै । शकल सूरत एकदम आदमिये नाँखी । पकड़ें नै पारभौ कि ऊ हवा छेकै, आदमी नै । छूलौ से लागतौ कि हम्मं आदमिये के छुवी रहलौ छियै । मतरकि छै बड़ी ज्ञानी प्रेत सब । वै आपनों वहें ज्ञान से, जेकरा चाहै छै, आपनों वश में करी लै छै, आरो जे चाहै छै, कराय छै । यहू मालूम होलौ छै, कि जे बच्चा ओकरो शिकार होय जाय छै आरो ओकरो माय-बाप जो ऊ बच्चा के बाहर जाय से रोके छै, तें एक्के साथ गाछी से उतरी-उतरी के सब प्रेत जिन के लेले ओकरो घरों पर आवी के मंडराबे लागै छै । आरो आंखी सामनाहै में ऊ बच्चा के उठाय के लै जाय छै ।”

“की?” रुपसावाली एक अजीब भय से भौआय उठलै ।

“झूठ थोड़े कहै छियौ । कै आदमी, ओझा-गुनी से पूछी के ऐलौ छियै, तबे कहै छियौ । आबे तोहें बण्टू के एक टा कहानी सुनौ कि भूत-प्रेत के सिद्धि केन्हें आरो केना करलकै । वै, पोखरी के नगीच डेढ़ महीना पहिले, लतामों के एक टा गाछ लगैने छेलै । बित्ता भरी खद्दो खोदी के वैमें मुंह भरी गोबर भरी देलकै । फेनू ऊपर से मिट्टी दै के आधों गाछ के गाड़ी देलकै, ताकि गाछ हवा नै से गिरे पारें । बच्चा रं गाछ छेलै । जो बड़बो करतिये, तें दस-बीस दिन के बादें । से नै, वै रोज-रोज गोबर खोदी के गाछ निकालै कि जोड़ बढ़लै की नै । भला है रं रोज-रोज गाछ के निकाली के देखला से गाछ लगै वाला छेलै । गाछ धीरे-धीरे कुम्हलाय के गिरी पड़लै ।

“बण्टा सोचलकै, ई काम हवा के छेकै । हवाएं ओकरो गाछी के गिरैले छै । से हवा के सजा देलौ जाय । जानै छौ, ओकरो बाद बण्टू दिन भरी इस्कूली से गायब रहलै । पता नै, कहाँ गेलै, आरो हवा के बारे में सब बात लेलकै । हवा के बारे में सब बात तें प्रेते बतावें पारें; भूत-प्रेत तें हवे नी होय छै बिल्टू-माय ।”

“हौ देखौ, बंटू कहाँ से असकल्ले हफसलों-धपसलों आवी रहलौ छौ । कुछ टोकियौ-टाकियौ नै । हवा वाला बात तें आबे सौंसे गाँव भरी के लोग जानें लागलौ छै । नै विश्वास छौ तें अभी देखियौ, की रं वै टन-टन जवाब देतौ ।”

तब तांय बण्टा ऊ सब के एकदम नगीच आवी गेलौ छेलै । थकान के बावजूदो चेहरा पर काफ़ी खुशी लहरी रहलौ छेलै । भैरो कापरीं ओकरो

पीठ सहलैतें पूछलकै, “कहाँ गेलों छेलें बण्टू ?”

“हौ दिश । बिसूबा थान के हुन्नै; हौ पार ।” बण्टा हाथ सें इशारा करतें कहलकै ।

“अरे, हौ दिश तें खाली आमे के गाछ छै । हुन्नै कथी लें गेलों छेलें ? आरो के-के साथों में छेलौ ?”

“आय कोय नै छेलै । असकल्ले छेलियै ।”

“असकल्ले ! डोर नै लगलों ?” भैरो कापरी आचरज सें पुछलकै । बण्टा मुस्कैतें हुएँ मूड़ी डोलाय कें बोललै—“नै ।”

“अच्छा, वहाँ कथी लें गेलों छेलें ?”

“वहाँ हवा बड़ी अच्छा बहै छै ।”

हवा के बात सुनल्लैँ रुपसावाली के दोनों कान फेनू खाड़ों होय गेलै ।

“अच्छा बंटू, तोहें हवा के बारे में की-की जानै छें, बताबें पारें ?”

भैरो कापरी लगले पूछलकै आरो लगले बण्टाहीं बिना रुकले जवाब देना शुरु करलकै, “हवा कें देखना मुश्किल छै, एकरा केन्हौ कें नै देखलों जाबें पारै । हवा जबें हमरों देहों कें छुवै छै, तें पता चलै छै—हवा छै आरो बही रहलों छै ।”

“अच्छा बण्टू, तोहें है केना पता लगैबें कि हवा चली रहलों छै कि नै चली रहलों छै ?”

“गाछ देखी कें ।”

‘गाछ देखी कें’ सुनल्लैँ रुपसावाली हठाते कांपी गेलै । अभी, कुछ देर पहलें तें भैरो कापरी बतैलें छेलै कि भूत-प्रेत गाछी सें उतरी कें.....

“सुनलौ, बिल्टू-माय, गाछी कें देखी कें पता लगाय लै छै ।” भैरो कापरी रुपसावाली दिश देखी कें बोललै । फेनू बण्टा दिश मूं करी कहलकै, “गाछ देखी कें केना ?”

“जबें गाछ इस्थिर रहें, आगिन सें धुआँ उठी कें सीधे ऊपर जाय, तें जानी लें हवा प्रति घंटा, आधों कोस सें कम चली रहलों छै । जों पत्ता खड़खड़ाबै, तें समझों कि हवा प्रति घंटा दू कोस सें तीन कोस तांय के गति सें चली रहलों छै । जों पत्ता साथें ठाहुरो हिलें, तें समझों हवा प्रति घंटा चार सें छों कोस बही रहलों छै आरो जों धूल उड़ें लागें तें बूझों कि प्रति घंटा सात सें नों कोस बही रहलों छै । जों छोटों गाछ डोलें लागें, तें हवा निश्चित

रूपों से प्रति घंटा नों से बारह कोस बही रहलौं छै । आरो जों बड़ों गाछ के ठाहुर साथें गाछों डोलें लागें, तें समझों कि तखनी हवा प्रति घंटा बारह से लै के उन्नीस कोस तांय बहतें रहै छै । हेन्हें के जों गाछ टूटें लागै छै, तें समझी लें कि हवा उन्नीस कोस से लै के सत्ताइस कोस तांय प्रति घंटा बही रहलौं छै आरो जों गाछे उखड़ें लागै तें बूझों कि हवा प्रति घंटा सत्ताइस कोस से लै के सैंतीस कोस के रफतार से बही रहलौं छै आरो आगू, जो तेज हवा से छोर-छप्पर उड़ें लागै, तें बुझों कि हवा सत्ताइस कोसों से ज्यादा प्रति घंटा के हिसाब से बही रहलौं छै । आ जों कि हवा से गाछ टूटें लागें, ऊ आंधी छेकै, जे गाछ उखाड़ें, ऊ तेज आंधी आरो जे छप्पर उड़ाबै, ऊ तूफान छेकै ।”

“सुनलौ नी बिल्टू माय ।” भैरो कापरीं रूपसावाली दिश घूमतें कहलकै । मतरकि रूपसावाली सुनतिये की । ओकरो तें सौंसे ध्यान हवा के गति, आंधी, तूफान, पेड़ के गिरवों-उखड़वों आरो वही हवा के बीच मछली के पुछड़ी रं हाथ-गोड़ डुलैतें भूत-प्रेत आँखी के सामना नाचें लागलौं छेलै ।

“अच्छा बेटा, जल्दी से तैयार होय जा, आय हममें तोरा नवयुग विद्यालय के गुरु अनिल शंकर झा जी से मिलवाय लें लै चलबौं । हुनी यहाँ काली मठों में आवी के ठहरलौं छै ।”

बण्टा, ई बात सुनतैं, गदगदाय गेलै । दौड़ी के आपनों कोठरी में घुसी गेलै आरो ओकरो वहाँ से हटतैं भैरो कापरीं रूपसावाली से कहलकै, “देखलौ नी, की रं सब टा ओझा, भगत नाँखी बोललौं गेलै ।”

“एक बात कहियौं, तोहें बण्टू के दीदी लुग दै आवौं । कोय किसिम के बात होय जाय, तें लांछन लेला से की फायदा ? पढ़ै-लिखै लें जानिये लेलें छै, आबें घरे पर पढ़तै तें ठीक । होन्हौ के बच्चा मैय्ये-बाप के नियंत्रण में ठीक रहें पारें । आबें होय्यो तें रहलौं छै पाँच-छों महीना । आपनों बच्चा के देखलें बिना की मैय्यो-बाप के चैन मिलै छै ।”

“देखौं बिल्टू-माय, तोहें बण्टू के भगाय पर केन्हें लागलौं छौ । एक तें बिल्टू घरों से बाहर रहें लागलै । पता नै, ई केन्हों पढ़ाय-लिखाय शुरु होय गेलै कि आँखी तरों से बच्चे हटी जाय छै । की जानतै बच्चां माय-बाबू के बच्चा प्रति लगाव । आरो बच्चो सिनी के माय-बाबू, घोर-गाँव के प्रति जे लगाव नै रहलै—सब यहें कारण । ई पढ़ाय तें गाँव के

सुख-चैन-प्रतिभा, सब छिनी रहलौं छै । हमरा सिनी के जमाना में ई फैशन नै छेलै ।”

“यहें सें तें कहै छियौं कि बंटू के ओकरों माय-बाप लुग दै आवौ ।”

“है रं केन्हें बोलै छै । मौसी तें माय सें बड़ी के होय छै । कहलौं कथी लें गेलौं छै—मरें माय, जिऐं मौसी । चलौं उठौं, बण्टू के तैयार करी दौ । जरा ओकरा झड़वैय्यो देबै, सुनै छियै, झा जी मुंगेरी के चण्डी थान में सिद्धि पैलौं होलौं छै ।”

आरो जबें रूपसावाली वैठां सें उठलै, तें भैरो कापरी नैं जानौ कौन सोचौं में हठाते डूबी गेलै ।

“इकबाल भाय, आरो सब बात तें ठीक । बण्टू आपनों उमिर सें बीस गुणा ज्यादाहै जानै छै । ओकरा कृषि कॉलेज के प्रोफेसरो सिनी एहै मानै छै कि मत पूछौं । मतरकि आयकल ऊ असकल्ले बीस बिधिया आम बगीचा दिश भागी जाय छै । कभी-कभी दिन भरी वहीं रही गेलौं । है एकदम ठीक नै । आखिर छेकै तें बच्चे नी ।”

“अरे, रात भरी तें वॉन, बगीचा, बहियार में नहिये नी रहतै होतै भैरो । रहै लें दें । वैं आयतक जत्तें भी जानलें छै, वही वन, बगीचा, नदी, बहियार, पोखरी, सरंग सें । हमरा सिनी सें वैं इकन्नी भरी सीखै छै आरो पन्द्रह आना वही सिनी सें, समाज सें, समाज के रीति-रिवाज, व्यवहार सें । तोहें चिन्ता नै करलौं करें ।” इकबालें भैरो के आपने खटिया पर बैठे के इशारा करतें कहलकै ।

आरो जबें भैरो कापरी खटिया पर बैठी गेलै, तें इकबालें फेनू कहना शुरु करलकै, “भैरो कापरी पुराण के कथा छेकै, तहूं जानतें होभैं कि की रं एक बालक शिक्षा पाबै खातिर एक ऋषि लुग पहुँचलै, तें ऋषि ओकरा एक गाय देतें कहलकै कि, ‘जौन दिन ई गाय सें सौ गाय हो जावं, वही दिन तोहें ऐयौं आरो हम्मैं तोरा आपनों चटिया बनाय लेबौं ।’ ऋषि के शर्त ऊ

लड़का मानी लेलकै आरो जंगल दिश चली देलकै । जंगल में ओकरा कै साल तें बीती गेलै आरो जबें एक गाय सें सौ गाय होय गेलै, तें सब गाय कें लै कें ऊ लड़का वहें ऋषि लुग ऐलै । सौ गाय देखी कें ऋषिं कहलकै, ‘ठीक छै, आय सें तोहें यहाँ रही कें शिक्षा पावें सकै छों । आय सें हम्में तोरा शिक्षा देभौं । ये पर जाने छैं, वैं लड़का की कहलकै ? कहलकै ‘हम्में आपनें के ऋणी छियै गुरुदेव, आपनें तें हमरा शिक्षा दै चुकलौं छियै ।’ जानै छैं, ई बातों पर वैं ऋषि आचरज सें पूछलकै ‘सें केना ?’ तबें वैं लड़का कहलकै, ‘जंगल में एत्तें साल रहै के क्रम में वैं पशु, पक्षी, नदी, हवा-बतास, आकाश, तारा, चांद-सुरुज सबके गतिविधि के ढेर-ढेर बात जानी लेलें छै । कौन ऋतु में की-की बदलै छै, कौन-कौन फल-फूल उगै छै, कौन-कौन पशु-पक्षी के जनम होय छै, केन्हों हवा केना चलै छै, कोन बादल की किसिम के होय छै । सब । के केना बोलै छै, ओकरों की मानै छै, यहू सब । आखिर आपन्हों तें वहें सब के बारे में शिक्षा-दीक्षा देतियै । आरो ऊ सब तें हम्में प्रकृतिये बीच रही कें जानी लेलें छियै ।’ बालक के ई बात सुनीकें ऋषि मुस्कैलै आरो माथा पर हाथ रखी आशीर्वाद देलकै कि वैं लड़का ऋषि के मनसा खाली जानबे नै करलकै, बलुक बढ़िया चटिया बनलै ।

“आबें समझलैं भैरू, हमरों जिनगी में जंगल-नदी, पहाड़-पर्वत, पक्षी, पशु के की महत्व छै । छोड़ी दें बण्टा कें, जों ऊ पोखर किनारी में बैठलौं रहै छै, गंगा नदी कें निहारतें रहै छै, पास-पड़ोस के धरों में केकरौ सें खिस्सा-गप्प सुनतें रहै छै । आभी ओकरों उमिरे की होलौं छै । खेलै-धूपै के ही तें उमिर छेकै । एक बात जानी लें भैरू, समाज के एक-एक व्यक्ति हमरा कुछ-न-कुछ शिक्षा जरूरे दै छै । दत्तात्रेय मुनि के गुरु तें गिद्ध तक छेलै । आबें तोहें जानै छै कि नैं, नै जानौं, तहियो है सुनी लें—महात्मा बुद्ध कें ज्ञान कोय भगवान, देवी-देवता सें नै मिललौं छेलै । मिललौं छेलै तें केकरा सें—समाज के एक अदना गवैया-बजवैया सें । योग-तप करी कें बुद्ध आपनों हाड़-मांस सुखाय कें बैठलौं छेलै कि तखनिये हुनकों सामना सें एक गायक-मंडली गुजरलै । जे मंडली में पुरुष तें एकतारा बजाय रहलौं छेलै आरो जनानी गीत गाबै छेलै । हो जे गीत गैलौं जाय रहलौं छेलै आकरों अर्थ ई छेलै कि सितार के तार कें एत्तें नै कस्सों कि तारे टूटी जाय, एत्तें ढिल्लौं नै छोड़ों कि सुरे नै निकलें । जों तोहें तार ठीक सें बजैबौ, तें सब

के मोन झूमी उठतै ।

“जानै छै भैरू, बुद्ध नें जबें ई बात सुनलकै, तें हुनको ज्ञान खुली गेलै । हुनी मध्यम मार्ग कें पकड़ी लेलकै आरो हुनको शिष्य सौंसे दुनिया होय गेलै । आरो है बुद्ध के गुरु के छेलै, तें छोटों-मोटों अदना रं गवैया । तहीं सें कहै छियौ कि समाज के एक छोटों-सैं-छोटों आदमी हमरों जीवन कें महान बनावें पारें ।

“भैरू, हमरा सिनी जे ज्ञान दै छियै, ऊ खाली सिद्धान्त छेकै, हमरों आँखी के आगू में कुछ नै होय छै । प्रकृति आरो समाज के बीच रही कें जे आदमी ज्ञान हासिल करै छै, वैं जेटा हासिल करै छै, वहें सुच्चा ज्ञान छेकै—जेकरा तोहें प्रामाणिक ज्ञान कहै छैं । ऊ ज्ञान पर जत्तें भरोसों करलौ जावें सकै, तें करलौ जावें सकें । हमरो सिनी के ज्ञान तें किताबिये ज्ञान छेकै, अक्षर पर टिकलौ ज्ञान, कहलौ गेलौ ज्ञान पर आधारित ज्ञान । एकरों कौन भरोसों । छुच्छे कठदलीली ।” ई कहतें-कहतें इकबाल हँसी पड़लै । आरो कुछ देर की सोचतहैं रही गेलै ।

भैरो कापरी तें पुराणवाला कथाहै से जें चुप छेलै, तें चुप्पे छेलै । खाली दोस्त इकबाल के वहें बात कें गुनी रहलौ छेलै ।

“भैरू, दू रोजों सें एक टा बात गमतें होबें ।” इकबालें भैरो के कान्हा पर हाथ धरी टोकलकै, तें जेना ऊ अनचोके नीनों सें जागी उठलौ रहें आरो बोललै, “की ?”

“यहें कि बंटू भोरे-भोर कांही निकली जैतै होतौ ।”

“हों, ई दस रोजों सें देखी रहलौ छियै, मजकि ओकरा सें पूछलें नै छियै ।”

“पूछे के जरूरतो नै छै । रमखेली के जानै छैं, जे बंटू के गहरा दोस्त छेकै ?”

“हों, जानै छियै, ई तें ओकरों साथे लागले रहै छै ।”

“यहू जानै छैं कि रमखेलिया केकरों बेटा छेकै ?”

“केकरों ?”

“भगवत्ता मोची के । आय पाँच रोजों सें भगवत्ता बीमार छै । बस सोचें कि मरले दाखिल छै । कोय देखबैय्या नै । रमखेलिया के मैय्यो तें नहिये छै । बस वहें रमखेलिया; वैं पानी पिलैतै, कि असपताली सें दवाय

माँगी कें लानतै । वहू में भगवत्ता हेनों आदमी के कौनें सुनै छै ।.....जानै छैं भैरू, आयकल बण्टू आपनों आठ-नों साथी लै लैकें भगवत्ता के ही सेवा में लागलौ रहै छै ।

“आबें तें भगवत्ता भागवत होय गेलौ छै । बीमारी सें पहिलें जेहनों छेलै, ओकरो सें बढ़िया । बुलबे-चालबे नै करै छै, कामो पर जावें लागलौ छै ।...हौ देखैं, हौ देखैं ।” हठाते इकबालें भैरू कापरी कें दक्खिन दिश हाथों सें देखैतें बोललै, “ई सब दोस्तों कें लैकें, बण्टू भगवत मोची के टोले सें निकल्लौ छै । सुनै में यहू मिललौ छै कि ये सिनी मिली कें हौ टोला में बच्चा सब कें जौरो करी, एकआध घंटा ओना मासी धंग भी पढ़ावै छै ।”

तखनिये तांय भैरो कापरी के चुप्पे देखी कें इकबालें ओकरो दिश देखतें कहलकै, “तोहें कुछ सोचें तें नै लागलैं भैरू, अरे बण्टू के मंडली में कोन जातों के लड़का नै छै, कैथ, कहार, बामन, राजपूत, धानुक, वैस, सब जातों के । भैरू, हमरा सिनी जे व्यवस्था बनैलें छियै, आबें ऊ, यहें बच्चा-बुतरु तोड़तै, अश्वमेघ वाला घोड़ा कें लव, कुश रोकै लें तैयार छौ । देखी लें आवी रहलौ छौ ।”

दोनों देखलकै, बण्टा आरो रमखेलिया आगू-आगू हर कदम पर उछललौ-कूदलौ आगू बढ़ी रहलौ छेलै, तें पीछू के छौड़ो, हाथों में ढेलों उठाय कें दूर तांय फेंकै वास्तें, दौड़ी कें आगू निकली जाय । सब में होड़ा-होड़ी छेलै । कोय दोनों हाथों कें तुतरु रं बनैलें मुँहों सें फूकी रहलौ छेलै, तें कोय तरहथी पर ताली बजाय कें जग्घा पर, कलाई कें कलाई पर ठोकी कें नगाड़ा बजाय के नाटक में मशगूल । केकरो कुछ सुध-बुध नै ।

ई सब देखी भैरो आरो इकबाल एक्के साथें खिलखिलाय कें हाँसी पड़लै ।

सुनहैं सब मनझमान होय गेलै । जुटै के तें सब जुटलौ छेलै इस्कूली में, मजकि बण्टा बिना सचमुचे में कलास हवांक हेनों लागी रहलौ छेलै । गुरुओ

जी के चेहरा पर हौ चमक आरो पढ़ाय में तेज नै छेलै । होना कें एकरा इकबालें केन्हौ कें जाहिर हुएँ दै लें नै चाही रहलौ छेलै । बस कठहँस्सी में एतनै टा बोललै, “की रमखेली, आबें बण्टू बिना तोरों खेलकूद कना होतै?”

मजकि तखनिये गंभीर होतें फेनू कहलकै, “देख अंजुम, मीरवा, बिहारी, शेखावत आरनी, बंटू घोर गेलों छै तें की, वैं जे काम शुरु करनें छै, ऊ बंद नै हुएँ । सुनै छियै, तोरा सिनी डोमासियो में जाय कें पढ़ाना शुरु करनें छौ । हममें तें चाहै छियै कि हमरों इस्कूल के सब बच्चा, जे पढ़ै लिखै में तेज छै, आपनों-आपनों मुहल्ला के बच्चा कें अंगुरी पकड़ी कें अक्षर सिखाना शुरु करी दौ । खाली सरकारे पर भरोसे करी कें रहवों बेवकूफी छेकै । आरो सरकार के भरोसे रही के कोय अच्छा काम पूरा होलौ छै की ? ऊ तें बण्टू हेनों लड़का के जिद्दे सें पूरा होतै ।

“आरू बण्टू की वहाँ ढेरे दिन रहें पारतै । ओकरो माय बीमार छेलै; ई बात सुनलकै, तें घोर जाय लें जिद्द पकड़ी लेलकै । एक दिन तें खैवो नै करलकै । हारी-पारी कें मौसां ओकरा भीखनपुर पहुँचाय ऐलै, मजकि ई शरतो पर कि माय के मॉन ठीक होहैं ऊ भिट्टी आवी जैतै । हौ तें नहियो शर्त करवैतियै, तहियो ऐतियो । ओकरो मॉन यहाँ लागी गेलों छै । हममें जानै छियै नी कि ऊ वहाँ बहुते दिन नै रहें पारें ।”

इकबाल गुरु जी के ई बात सुनी कें शेखर, सोराजी, अठोंगर, बमबम आरनी तें भीतरे-भीतर गदगदाय गेलै । सोचलकै—चलें, ज्यादा सें ज्यादा दस रोज, या आरो ज्यादा, तें बीस रोज; होन्हौं कें महिनो तें देखहैं-देखहैं फुर होय जाय छै ।

ई ढाढस सें बण्टा के सब साथी कें बड़ी बोल मिललौ छेलै । सब ठीक समय पर कलासो जाय, ठीक समय पर कलासो लै । हौ सिनी वक्ती तें बण्टा के बहुत ज्यादा कमी नै अखड़ै, मजकि खेल के वकत हुऐ, तखनी बण्टा बिना ऊ खेल बेकारे लागै ।

खेल के बात याद ऐहैं मीरवा कें हौ दिनकों जरूर याद आवी जाय, जबें वैं दौड़ै वक्ती, ई फेकड़ा पढ़ना शुरु करलें छेलै,

कबडी कबडुआ बाप तोरों भडुआ

माय तोरी नेंगड़ी, घीच बेटा टेंगड़ी

तें बण्टा बीचे में खेल रोकतें कहलें छेलै, “देख, आय सें खेल खेलै

वक्ती ई फेंकड़ा कोय नै पड़तै । आरो नै तें “सेल कबड्डी आला, भगत मोर साला’ वालाहै फेंकड़ा पढ़तै । बस एक फेंकड़ा पढ़लौ जैतै ।”

आरो बण्टा दस कदम दौड़ी कें फेनू वहीं ठां आगू-पीछू होतें एक्के सांस बोलतें गेलों छेलै,

सेल कबड्डी आला, तबला बजाला

तबला में पैसा, लाल बतासा ।

आरो वहें दिनों सें कोय्यो हौ दोनों फेकड़ा कबड्डी खेलै वक्ती, नै पढ़लें छेलै ।

यहें रं एक दिन हेन्हें कें जबें सोराजीं ई गीत पढ़ना शुरु करलकै,

एक तारा, दू तारा

मदन गोपाल तारा

मदना रों बेटी बड़ी झगड़ाई

अक्का गोल-गोल, पक्का पान

शिवों के बेटी कन्यादान

काना रे कनतुल्ला-तुल्ला

पीपर गाछी मारै गुल्ला

साँप बोलै कों-कों कबूतर मांगै दाना

हम्मं तोरों नाना ।

तें बण्टा गीत के आखरी में कहलें छेलै, “यै सें ‘काना’ शब्द हटाय कें पढ़लौ करें । काना बदला कुछुवो बोली ले नी, है सिनी कथी लें बोलै छें ।”

मीरवां माथा पर जोर देतें सोचलकै, “आखिर बण्टा ई सब बातों सें एत्तें चिढ़ै छै कथी लें । ई की हम्मं बनैलें छियै, सब्भे तें बोलै छै । आय तांय कोय्यो तें केकरौ मना नै करलकै । जों बण्टू के माय-बाप हेनों होतियै आरो चिढ़तियै तें एक ठो बातो छेलै । तहियो बण्टू यहें चाहै छै, तें हमरौ सिनी कें यहें करना चाही । आखिर ऊ हमरा सिनी लें कत्तें-कत्तें अच्छा बात सोचै छै ।”

कि तखनिये इस्कूली के घण्टी तीन दाफी टन-टन-टन के बाद एकदम सें टनटनाय उठलै । घण्टी टनटनाना छेलै कि सब कॉपी-बस्ता लेलें बिरनी रं बाहर निकली पड़लै आरो झुण्ड में चलतें, एक दुसरा कें धकेलतें,

लेरू-बाछा रं आगू बढ़ें लागलै ।

“अरे कहाँ छैं कापरी ? बाहर निकल, घरों में की घुसियैलों छैं ।” भैरो कापरी के द्वारी पर आवी कें इकबालें गदगद कण्ठ से कहलकै ।

“अरे इकबाल भाय, ठहरो, ठहरो, तुरत आवै छियौं ।” कहतें-कहतें भैरो बाहर निकली ऐलै आरो बरण्डे पर खटिया बिछैतें-बिछैतें पूछलकै, “से एतें भोरे-भोर ? कौन खुशी आनलें छै दोस्त कि पूसों में कोयल रं कंठ फूटी रहलौं छैं । ला बैठों, आरो बतावों कि खुशी के बात की छेकै ।”

“पागल होय गेलौं छैं । हेन्हें कें बतैभौ, भौजी कें कहैं, पहिलें सबोरों से रसकदम के मिठाय दुकानी से मगैतौ, तें पुछियें कि बात की छेकै ?” इकबाल ने गोल करलौं अखबार कें दायां हाथों से बामां में लेतें कहलकै ।

“मीटू ऐतै आरो मछलियो ऐतै, पहिलें बतावों तें दोस्त ।”

“अरे, बण्टू तें सौंसे इलाका के नाम रौशन करी देलकौ । है देखें, जागृत हिन्दुस्तान में की छपलौं छै—बालक बण्टा को राज्य सरकार सम्मानित करेगी । एकदम मोटों-मोटों अक्षर में ई पंक्ति छपलौं छै आरो नीचू में नान्हों-नान्हों अक्षर में ढेर सिनी बात ।”

भैरो इकबाल के हाथों से अखबार ले कें पढ़ें लागलै । एकेक पंक्ति पर ओकरो मुंह कदम्ब नाँखी खिली रहलौं छेलै ।

“भागवत, चौरासी आरनी के घरों में जबे मिठाय बँटी रहलौं छै, तबें तें तोरा मिठाय के भोज टोला भरी में करी देना चाहियौं भैरो ।” इकबाल जना खुशी से पागल होतें कहलकै, “पढ़बे करलैं, हमरों इस्कूलो पुरस्कृत होतै, केन्हें कि बण्टू ई स्कूल के छात्र छेकै । हममें तें यहें बूझै छियै—बण्टू ई इलाका लेली अल्लाह के नियामत बनी कें ऐलै ।.....इखनी चलै छियौ भैरो, खबर ऐलौं छै—डी. एम. कमिश्नर यहें संदर्भ में आपनों आदमी साथें इस्कूल आवै वाला छै । साँझै मिटूओं, मछली दोनों खैभौ ।”

एतना कही झटकलों-झटकलों इकबाल आपनों टोला दिश मुड़ी गेलै ।

भैरो कापरी अखबार लेलें घरों के भीतर हेनों भागलै, जेना देर सें बाहर बंधलों बछड़ा बथानी दिश उड़ै छै । रूपसावाली के सामना में अखबार कें फैलाय कें राखी देलकै आरो कहलकै, “पढ़ें सकै छों तें पढ़ों । बंटू के वश में भूते-प्रेत नै, सरकारो वश में होय गेलों छै ।” आरो ई कही भैरो बच्चे नाँखी खिलखिलाय कें हाँसी पड़लै ।

सौँसे भीखनपुर मुहल्ला में भोरे सें गलगुदुर होय रहलों छै । ई मानै लें कोय्यो तैयारे नै छै कि जोन बण्टा कें राज्य सरकार सें पुरस्कृत करै के बात छपलों छै, ऊ पचरासिये के बेटा छेकै । हेनों बात रहैतियै तें भीखनपुर के नाम नै छपतियै । इस्कूलों के नाम छपलों छै तें भिट्टी के, जों यहें बण्टा रहतियै, तें भीखनपुरो के नाम जरूरे छपतियै । की बण्टा नाम के आरो लड़का आरो पचरासी नाम के बाप आरो कहीं नै हुएँ सकै छै ।

जत्तें किसिम के लोग, ओत्तें रकम के बात । मतरकि टोला भरी के बच्चा-बुतरु लें काका कनक लाल चौधरी हेनों-तेहनों आदमी नै छेकै । बड़ों वकिलाय पढ़लें छै, बड़का-बड़का जज-मिनिस्टर सें परिचय छै, ई बात के नै जानै छै । हुनी जेन्हें अखबार में ई समाचार पढ़लकै, तें सरकारी ऑफिसों में टेलीफोन करी-करी कें सब बात के पता लगाय लेलकै कि बण्टा केकरो लड़का छेकै, मूल बासिन्दा कहाँकरो छेकै, भिट्टी में ओकरो की रिश्ता छै, ओकरा कथी लें पुरस्कार मिली रहलों छै, पुरस्कार में ओकरा सरकारों सें की मिलतै, कहिया मिलतै, के देतै, कोनी स्थानों पर मिलतै, विशेष स्थिति में स्थान बदलें पारें की नै ? आरनी आरनी । आरो सब तरफ सें निश्चिन्त होय कें, साथे साथ यहू जानी कें कि बण्टा आरो कोय नै, ओकरो पड़ोसी पचरासिये के बेटा छेकै, हुनी मारे गदगद होतें घरों सें बाहर निकली ऐलों छेलै । दू नम्बर गुमटी पहुँची कें शंकर साव के मिठाय दुकानी में चार सेर मिहिन दाना के लड्डू लेलकै । आरो पचरासी घोर दिश लौटी पड़लै । पटरिये-पटरी होलें हुनी एक नम्बर गुमटी तांय ऐलों छेलै आरो कारू मंडल

के दुकानी से दस टाका के चॉकलेटो लै लेलकै। जेकरा खादी के आपनों लम्बा कुर्ता के जेबी में डाललकै आरो आगू बड़ी गेलै। हुनी बण्टा के बात के लैके एत्तै खुश छेलै, जेना ई पुरस्कार पचरासी बेटा के नै, हुनके बेटा के मिललौ रहै।

चौधरी काका पचरासी के दुआरी पर आवी के रुकी गेलै, तें बण्टा के आवाज देलकै। हुनको आवाज सुनतैं पचरासी झपटी के घरों से बाहर आवी गेलै।

“की बात छेके दादा ?” चौधरी काका के हाथों में मिठाय के डलिया देखी वै आचरज से पूछलकै।

“अरे बण्टू कहां छै ?” चौधरी का के उतावलापन के कोय सीमा नै छेलै।

“ऊ तें बगीचा में सुखलौ लकड़ी, काठी, पत्ता जौरो करी रहलौ होतै। देखै नै छौ, कुहासों की रं राती घिरी आवै छै। लागै छै सबटा लगलौ आलू पौधा के झुलसा रोग मारी जैतै। तरसुए नी ऊ यहाँ ऐलौ छै, आरो वही दिनो से, हमरो मना करलही पर बगीचा भागी जाय छै, झाड़पात जमा करै लें। तबे एक बात होय जाय छै कि जखनी बण्टा खेतों के बीचों-बीचों में खोर-पात राती जराय दे छै, तें कुहासों खेतों पर कम्मे गिरै छै। मनाहो करला पर मानै छै, जोरी से बाल्टी-बाल्टी पानी लै आनै छै, फसलों पर छीटी देलकौ आरो खोर-पतारों पर ताकि देर रात तांय ऊ धुएँतें रहें। देखौ, ई ठहारों में ऊ बहियार गेलों होलौ छै, तबे गांती बांधी देलें छियै आरो आपनों कम्बलो दे देलें छियै।” कहतें-कहतें पचरासी के बोली झमान होय गेलों छेलै, मजकि तखनिये कुछ हुलासों से बोली उठलै, “मतरकि जे कहौ दादा, सालो भर तें नै होलौ होतै बण्टा के भिट्टी गेलौ, आरो वहाँ से ऐलौ छै, तें पच्चीस साल के इलिम लै के ऐलौ छै।”

“अरे यहे इलिम लें तें सरकारें ओकरा पुरस्कृत करी रहलौ छै। पहलें है मिठाय घरों में रखी के आवों। ये में कुछ तें बण्टा के संगी-साथियों में बांटी दियो।”

पचरासी के है सब बहुत कुच्छू समझै में नै ऐलै। वै अभी तांय ई खबर के जानलो नै छेलै। कोय कहवो नै करलें छेलै, जानतिये कहाँ से। ऊ आपने में हेरैलों-हेरैलों हेनौ बुझैलै। जबे चौधरी कां फेनू घरों में मिठाय

धरी आय कें कहलकै, तें पचरासी तखनी बिना कुछ पूछले मिठाय घरों में राखी ऐलै आरो तुरते बाहर निकली ऐलै, एक कुर्सियो लै ऐलों छेलै ।

“आबों, बैठों दादा ।” कुर्सी दुआरी के बाहर रखतें पचरासी कहलें छेलै ।

“अरे नै, नै, एकरों कोय जरूरत नै छै ।” चौधरी कां हाथों सें इनकार करतें कहलें छेलै आरो बाकी बात अखबार पढ़ी कें सुनैलें छेलै । सुनैला के बाद बड़्डी गौरव के साथ कहने छेलै, “की समझलौ, आबें बण्टा कें सरकारें पढ़ैतै । सरकारे के पैसा पर ऊ पटना जैतै, दिल्ली जैतै, लन्दन जैतै । आरो तोहें जानिये लेलौ कि कथी लें बण्टा कें सरकार है सुविधा दै रहलौ छै । पूरे कदरसी-डोमासी कें बण्टा जे रं आपनों साथी संगें मिली कें स्वर्ग बनाय देलकै, वहे लें । पचरासी, ई काम तें आजादी पैला के बाद, नेहरु सें लैकें आपनों झुट्टा सांसद आरो विधायको नै करें पारलकै । डपोर संख रं बाजी लौ कतो ।”

पचरासी तें खुशी सें कुछ बोल्लै नै पारी रहलौ छेलै । की बोलतियै ऊ । वैं तें अभी तांय के ई जिनगी में कभी है बात सपन्हों में नै सोचलें छेलै । जों सोचलें छेलै, तें एतने टा कि बण्टा चार अक्षर पढ़ी लै छै, तें बारह नम्बर गुमटिये पर कोय मनिहारी के दुकान खोलवाय देवै, नै घरों में दिऐं पारतै तें नै, आपनों जेब तें चलैतै ।

“अरे, सोचें की लागलौ । ई सपना के बात नै छेकै । अखबारों में छपलौ बात छेकै । अखबारो झूठ हुऐं पारें, मजकि हम्में तें भागलपुर कमिश्नरी सें लैकें पटना तक पूछी लेलें छियै । एकदम सच-सच बात छेकै ।” ई कहतें चौधरी कां आपनों जेबी में हाथ डाली कें सब टा चौकलेट निकाललें छेलै आरो पचरासी के दायां तरहत्थी आपनों बायां तरहत्थी पर धरतें, वै पर सब चॉकलेट राखी देलकै, ई कहतें कि, “है खाली बण्टू वास्तें छेकै । हमरों दिश सें दै दियौ । पता नै, ऊ कखनी लौटें, नै तें हम्मी आपनों हाथों सें देतियै । है रं पूत तें घरों-घरों में हुऐं ।”

कहतें-कहतें हुनी एकदम गंभीर होय उठलौ छेलै आरो जेन्हें लौटे लें घुमलै, ओन्है कें फेनू पचरासी दिश होतें बोललै, “आरो सुनों, बण्टू पुरस्कृत तें होतियै भिट्टिये में, मजकि मॉर-मिनिस्टर सें पैरवी करी कें ऊ स्थान बदलवाय कें हम्में भीखनपुर करवाय लेलें छियै । आबें कालिये

थानवाला इस्कूली में सबटा मोर-मिनिस्टर, डी. एम. कमिश्नर ऐतै । सरकार सें कहीं देलियै कि बण्टू के माय के मॉन बहुत खराब छै, से सब बातों के देखतें हुएँ ई समारोह भीखनपुरे में हुएँ । डी. एम., कमिश्नरें मानियो लेलकै । आरो एक बात, ई कार्यक्रम अगले महिना के पहिलकों मंगलवार कें होना छै । यहू सबकें कही दियौ । से तें अखबार में ई सब बात निकलबे करतै ।” कहतें-कहतें चौधरी काका विषहरी-थान दिश बढी गेलों छेलै ।

पचरासी तें वहीं पर बक्खों नाँखी खाड़े रही गेलों छेलै—ढेर देरी लें । ई सब बातों पर जेना विश्वास होय्यो कें ओकरा विश्वास नै होय रहलें छेलै ।

भीखनपुर के प्राइमरी इस्कूल सजी-धजी कें बड़का घरकुण्डा रं सुन्दर दिखावें लागलें छेलै । आमों पल्लों कें, नारियल रस्सी सें गूंधी-गूंधी कें, माला नांखी बनैलें गेलै, जेकराहै इस्कूली छत के बीच में खड़ा सीक आरो बीस गज के दायरा में आवैवाला गाछ, मकान सें हेनों बांधलें गेलौ छेलै, जेना सीधा तनलों आधों छतरी रहें । बाहर-बाहर जहाँ रस्सी के छोर खतम हुएँ, वहाँ-वहाँ गेंदा फूलों के माला लटकैलें गेलों छेलै ।

छतरी के भीतर दू सौ सें ज्यादा प्लास्टिक वाला लाल-लाल कुर्सी दू भागों में राखलें गेलों छेलै—तीन हाथों के बीच बीच खाली जग्घों छोड़ी कें, कि बड़ों-बड़का लोगों कें आबै-जाबै में कोय दिक्कत नै हुएँ ।

इस्कूली के बरण्डा सें लागलें पाया-वाया तें कुछुवे नै छेलै, से वहीं पर लम्बा रं तीन टेबुल जोड़ी कें रखलें गेलै आरो वैं पर बगुला के उजरो पंख नाँखी बगबग एकसलगा चादर हेनों बिछैलें गेलै कि तीन टेबुल जोड़ी कें एक करलें गेलों के पतो नै चलें । टेबुल के बीचों-बीचों में काँचों के गुलदस्ता में हजार गेंदा आरो पत्ता सहित गुलाबो गोलियाय कें राखलें । वही टेबुल पीछू पांच ठो काठ वाला कुर्सी । कृष्णमोहन घोष बाबू के यहां से मंगैलें गेलों छेलै । बीचों में सिंहासननुमा एक काठों के कुर्सियो छेलै, जे

कनक लाल चौधरी के यहाँ से मंगवैलों गेलों छेलै, जेकरा चौधरी जी आपने लेली खास करी के बनवैलें रहै । आय वही कुर्सी शिक्षा मंत्री वास्तें ऐलै ।

बरण्डा के नीचें दायां दिश वाला कुर्सी सिनी के सबसें आगू वाला कुर्सी सिनी पर इकबाल गुरु जी साथें, भैरो कापरी, पचरासी महतो, कनक लाल चौधरी, हरि दूबे, उमाकांत भारती साथें बण्टा केरों नवो साथी अंजुम, रमखेली, मिरवा, शेखावत, घोल्टू, सोराजी, अठोंगर आरो बमबम बैठलों छेलै ।

ऊ पंक्ति के ठीक पीछू वही इस्कूल के गुरु जी सिनी बैठलै । साथें साथें मुहल्ला भरी के आरो कुछ गणमान्य लोगो । बाकी पीछू कुर्सी पर मुंदीचक, बरहपुरा, लालूचक, लोदीपुर, इशाकचक, के लोग सिनी जमलों होलों छेलै । होन्हें के दायां दिश के अगुलका कुर्सी पर कुछ अफसर टाइप के लोग बैठलों छेलै आरो पिछुलका कुर्सी पर पूरे भीखनपुर भरी के लोग पहिलें से जमी चुकलों रहै ।

मंच के पश्चिम, पूरब, आरो दक्खिन के पटरी तांय देखवैय्या के खचाखच भीड़, गड़लों खुट्आ रं, स्थिर दिखावै । मंच के एकदम पीछू प्लास्टिक के पाँच कुर्सी पर पाँच जनानियो बैठलों छेलै, जे में बण्टा आरो बिल्टू माय तें अलगे से पहचान में आवी रहलों छेलै, बाकी तीन कुर्सी पर चौधरी, भारती आरो दुबे जी के जनानी बैठलों छेलै कि हठाते हुचक्का उठलै—मिनिस्टर साहब आवी गेलै, मिनिस्टर साहब आवी गेलै । जे खाड़ों छेलै, ऊ तें खाड़े रहलै, लेकिन बैठलों सब हेनों खाड़ों होय गेलै, जेना हठाते कलासों में हेडमास्टर साहब घुसी गेलों रहें ।

सबभें देखलकै, शिक्षा मंत्री जी सबसें आगू-आगू दोनों दिश बिछलों कुर्सी सिनी के बीच के रास्ता से निकली मंचों दिश बढ़ी गेलै । एकरों साथे पुलिस के रौन खतम होय गेलों छेलै । सब एक दिश खाड़ों होय गेलों रहै ।

मंत्री जी के कुर्सी पर बैठलैं सांसद, विधायक हुनकों एक दिश आरो मंत्री जी के साथ ऐलों दू आदमी एक दिश बैठलै ।

मंत्री जी के जयजयकार के बीच जबें स्वागत गान खतम होलै, तें शिक्षा मंत्री होय के नाता मंत्री जी खाड़ों होय के अंग्रेजी में आधों घंटा तांय बोललै, ताकि लोग हुनका कम पढ़लों-लिखलों नै समझें । सुनवैया में कुछ

तें आचरज में छेलै, बाकी ढेरे हेनों मूडों में, जेना हुनी मंत्री जी के एक-एक बातों के समझी रहलौ छेलै । कभियो-कभियो बगल के आदमी के गुराय के देखियो लै, है बताय लें कि ओकरो बोलला सें मंत्री के सुनै में दिक्कत होय रहलौ छै ।

मंत्री जी के भाषण खतम होलै, तें दायां दिश खड़ा एक आदमी सामना में आवी के बोललै, “आबें आपना सिनी के सामना में भिट्टी स्कूल के हेडमास्टर इकबाल जी आपनों बात राखतै ।”

मंच के नीचें जेना नया उत्तेजना उठी गेलौ छेलै । इकबाल गुरु मंच पर चढ़लौ छेलै । सफेद चूड़ीदार पजामा आरो सफेदे लंबा कुर्ता । चेहरा पर कटलौ-छटलौ कारों-घन्नो दाढ़ी आरो दाढ़ी के रंग सें मिलतें पातरों मूँछ । आँखी पर पातरों फ्रेम में सफेद शीशा के चश्मा । देखलै सें लागै कि खूब पढ़लौ-लिखलौ आदमी छेकै, यही सें सब्भे यहें सोचलकै कि हिनियो जरूरे अंग्रेजिये में बोलतै । मतरकि बात उल्टा निकललै । मंच पर आवी के हुनी जबें माइक आपनों हाथों में लेलकै, तें एतनै टा कहलकै, “आय देश में जो शिक्षा, बच्चा सिनी के शिक्षित नै करे पारी रहलौ छै, तें ओकरो एक्के कारण छेकै, कि शिक्षा ओकरो मातृभाषा में नै देलौ जाय रहलौ छै । एक बच्चा वहें भाषा में, सिर्फ वही भाषा में दुनिया भरी के बात समझें पारें, जे भाषा में ऊ बच्चा के पुरखां सब बातों के हजारो लाखो बरसों सें समझतें ऐलौ छै । ई देश के ज्ञान, ई देश के भाषा में छुपलौ छै, आरो हम्में ई देश के शिक्षित यहाँकरे माँटी के भाषा में करे पारौं, वही भाषा, जे दुबड़ी रं ई जमीन पर गड़लौ छै, जेकरा जत्तें मोचारलौ जाय, कत्तो काटलौ जाय, ऊ फेनू उगी आवै छै, केन्हें कि दुबड़ी कभियो नै मरै छै । बण्टा आरो एकरों साथी टोला-टोला के ओकरे भाषा में शिक्षित करी के यहें देखैलें छै, जे काम कोय दूसरो भाषा सें दू सौ साल मे नै होतियै, ऊ काम बण्टू आरो ओकरो साथी सिर्फ पाँच महीना में करी दिखैलें छै । हमरा बड़्डी गौरव होतै, जो ई बात के ई देश के शिक्षाविद् समझें पारतै ।”

जब तांय इकबाल गुरु के भाषण होतें रहलै, तब तांय तें एकदम चुप्पी रहलै, मजकि हुनको बात खतम होतैं ताली के गड़गड़ाहट हेनों गूँजलै कि मत पूछौं । तीन मिनिट तांय गूँजतै रहलै । कम हुऐ कि फेनू तेज होय जाय । इकबाल जी के आपनों कुर्सी पर बैठी गेला के बादो ।

मंच-संचालक की बोललकै, केकरौ कुछ नै मालूम होलै । ताली बजबों तें तबे रुकलै, जबे मंच पर बण्टा आपनों नवो साथी साथें खाड़ों होय गेलों छेलै ।

बण्टा के आपनों साथी साथें मंच पर खड़ा होवों तें एक अलगे दृश्य खाड़ों करी देलें छेलै । जे सिनी नीचें कुर्सी पर बैठलों छलै आकि कुर्सी के पीछू खड़ा छेलै, ऊ तें बैठले आरू खड़े रहलै, मजकि दायां-बायां खड़ा देखवैय्या के पीछू वाला लोग गजब के हुलुक-बुलुक करें लागलों छेलै । छोटों-छोटों बुतरु तें जन्हें भीड़ों में फांक देखै, मूड़ी घुसाय कें आगू निकली आवै । देखवैय्या के आँखी में अजीब भाव छेलै, जेना मंच पर खड़ा बुतरु सिनी अभी हवा में उड़ी कें देखतै ।

मंच संचालकें माइक बण्टा के आगू में करी देलकै आरो कुछ बोलै के इशारो करलकै । बण्टा एक क्षण लेली आपनों दोस्त सिनी कें दायां-बायां दिश मूड़ी करी कें देखलकै—कि वैं की बोलतै ? कि तखनिये मंचों सें नीचें उतरी कें ऊ पचरासी लुग आवी गेलै । पचरासी के हाथों में राखलों बस्ता कें लेलकै । एक कापी निकाललकै आरो वहीं सें एक कागज निकाली कें मंचों पर फेनू खाड़ों होय गेलै । ठीक वही जग्घा पर । एक दाफी दायां-बायां दिश के आपनों नवो साथी कें देखलकै आरो मूं के माइक सें लगभग सटाय लेलकै । ठोर बंद करले हूं-हूं करी कें गल्ला साफ करलकै आरो बोलें लागलै, “हमरों साथी सिनी बोलै छेलै कि हम्में एत्तें बात केना जानै छियै । हम्में जरूर कोय भूत-प्रेत पोसलें छियै । आय हम्में एकरों राज बतावै छियै कि कना हम्में एत्तें-एत्तें बात जानलियै आरो करलियै । है देखों अखबारों के ई टुकड़ा ।”

ई कही कें बण्टा दायां हाथ सें ऊ अखबार के टुकड़ा हवा में कुछ देर तांय लहरैलें छेलै आरो फेनू नीचें करी कहना शुरु करलें छेलै, “ई छेकै हमरों पहिलकों राष्ट्रपति अब्दुल कलाम द्वारा हमरा सिनी लेली बनैलों गेलों दस मंत्र, जेकरा हम्में रोज एकान्ती में घोकियै आरो वहे मंत्र मोताबिक काम करियै, जहाँ दिक्कत हुएँ, बड़ों-बड़ों विद्वानों सें पूछियै । ई मंत्र सिनी हमरा में बड़ी हिम्मत लानी देलकै । आबें तोरा सिनी जानै लें चाहबौ कि ऊ मंत्र की छेकै, हम्में पढ़ी कें सुनाय छियौ ।”

आरो बण्टा दोनों हाथों सें ऊ कतरन के पंक्ति सिनी कें ठीक सें

रेघाय-रेघाय कें पढ़ना शुरु करलकै,

“पहिलों मंत्र छेकै—हम्में आपनों पढ़ाय आरो कार्य भीतरी मनो सें करवै आरो महान बनबै ।

“दूसरों छेकै, आबें सें हम्में कम-सें-कम दस अनपढ़ लोगो कें पढ़बों-लिखवों सिखैबै ।

“तेसरों मंत्र छेके, हम्में कम-सें-कम दस गाछ लगैवै आरो ओकरो अच्छा नांखी देखभल करबै ।

“आबें चौथों मंत्र छेकै, हम्में शहर-गाँव जाय कें कम-सें-कम पांचो लोगो कें नशाखोरी आरो जुआ खेलै के आदत सें मुक्ति दिलैबै ।’

“पाँचमों मंत्र सुनों, पाँचमों मंत्र छेकै कि हम्में बीमार आदमी के दुख दूर करै के सदोखिन प्रयास करबै ।’

“वहें रं छठमों मंत्र ई छेकै कि हम्में धम्र, जाति आरो भाषा के नामों पर केकरो भेदभाव के समर्थन नै करबै ।

“सातमों मंत्र छेकै कि हम्में ईमानदार बनबै आरो समाज कें भ्रष्टाचार सें मुक्त करै के प्रयास करबै ।

“आठमों छेकै कि हम्में बुद्धिमान नागरिक बनै लेली काम करबै आरो आपनों परिवारो कें आदर्शवान बनैबै ।

“रहलै नौमों, तें नौमों मंत्र ई छेकै कि हम्में मंद बुद्धि आरो शारीरिक रूप सें कमजोर लोगो साथें दोस्ताना व्यवहार करवै आरो सहयोग देबै ताकि हुनको सिनी हमरे नांखी जीवन जीएँ सकें ।’

कहतें-कहतें बण्टा हठाते रुकलों छेलै आरो कतरन कें बायां हाथों सें लेतें दायां हाथों सें दोस्त सिनी के छूवी-छूवी कें जल्दी-जल्दी गिनलें छेलै, “एक, दू, तीन, चार, पाँच, छों, सात, आठ नौ आरो फेनू आपना पर अंगुरी रखतें कहलें छेलै, दस ।’

वैं एकरों बाद होन्हें कें अखबार दोनों हाथों के दोनों चुटकी के बीच दबैतें बोललै छेलै, “आरो मिसाइल मानव डॉ. ए. पी. जे अब्दुल कलाम जी कें दशमों दैलों मंत्र छेकै कि हम्में आपनों देशवासी आरो देश के सफलता पर गौरव करबै ।’

पढ़ला के बाद बड़ी हिफाजत सें वैं ऊ कतरन चपोती कें कमीज के ऊपरलका जेबी में राखी कें दोस्ते सिनी के पंक्ति में सीधा खाड़ों होय

गेलै ।

बण्टा के दशमों मंत्र पढ़हैं सब्भे दिशा सें ताली के हेनों गड़गड़ाहट होलों छेलै कि मत पूछों ।

तालिये के गड़गड़ाहट के बीच मंत्री जी उठलों छेलै आरो मंत्री जी साथें, मंचों के आरो सब आदमियो ।

टेबुल पर गांधी जी रों डेढ़-डेढ़ बित्ता के चमचम करतें स्टील वाला दस मूर्ति एक अर्दली आवी कें राखी गेलों छेलै ।

ताली के गड़गड़ाहट रुकिये नै रहलों छेलै ।

एक आदमी मंत्री जी के हाथों में एकेक करी कें मूर्ति राखलें जाय आरो मंत्री जी एकेक करी कें मूर्ति बहादुर बच्चा कें देलें जाय । पत्रकार आरो फोटो खिंचवैया के तें तांता । धाय-धाय कैमरा सें फोटो खिचलों जाय रहलों छेलै, कैमरा के छटाक-छटाक-छटाक सें बण्टा, अंजुम, रमखेली, मिरवा, शेखावत, घोल्टू, सोराजी, अठोंगर, बमबम, शेखर के चेहरा रही-रही कें वहे रं चमकी उठै, जेना धारापाती सजैलों आइना पर सुरुज के किरिन सब्भे पर एक्के साथ चमकी-चमकी जैतें रहें । बण्टा आरनी के आँख तें एकदम चौंधियैलों जाय छेलै । सामना में मूं राखवों एकदम कठिन । मजकि फोटो खिंचाय के हुलास के कोय ठिकानों नै छेलै । सब मूर्ति लेलें मूर्तिये नाँखी खाड़ों रहलै । ऊ बीचों में पीछू खड़ा होय कें मंत्री जी फेनू की बोललै, कोय नै सुनलकै । भला हौ ताली में कोय्यो केकरों की सुनें पारतियै ।

धीरें-धीरें मंच खाली होय गेलै । बण्टौ आपनों साथी साथें नीचे उतरी इकबाल गुरु जी कें घेरी खाड़ों होय गेलों छेलै ।

चौधरी जी घूमी कें जमुआर गुरु जी सें कुछ कहै लें चाहलकै, मजकि हुनी आपनों साथी साथें होलें सें कखनिये खिसकी गेलों छेलै ।

आरो मंत्रियो आरनी जाय चुकलै, मजकि देखवैय्या, सुनवैय्या के ठसाठस भीड़ होन्है कें खाड़ों छेलै, जेना बिना नगीचों सें बण्टा कें देखलें जाय लें तैयार नै रहें । ताली के गड़गड़ाहट थमी गेलों छेलै, तहियो नै जानों, सबके कानों में हौ गड़गड़ाहट कतें देर तांय गनगनैतें रहलै । जेकरा भी कोय कुछ बोलतें सुनलकै, तें बस यही कि “बेटा हुएँ तें बण्टा जेन्हों !”

